

新唐書

冊二



唐書卷六

宋 翰 林 學 士 歐 陽 修 撰

本紀第六

肅宗文明武德大聖大宣孝皇帝諱亨玄宗第三子也母曰元獻皇后楊氏初名嗣昇封陝王開元四年爲安西大都護性仁孝好學玄宗尤愛之遣賀知章潘肅呂向皇甫彬邢璣等侍讀左右十五年更名浚徙封忠王爲朔方節度大使單于大都護十八年奚契丹寇邊乃以肅宗爲河北道行軍元帥遣御史大夫李朝隱等八總管兵十萬以伐之居二歲朝隱等敗奚契丹於范陽北肅宗以統帥功遷司徒二十三年又更名瑛二十五年皇太子瑛廢死明年立爲皇太子有司行冊禮其儀有中嚴外辦其服絳紗太子曰此天子禮也乃下公卿議太師蕭嵩左丞相裴耀卿請改外辦爲外備絳紗衣爲朱明服乃從之二十八年又更名紹天寶三載又更名亨安祿山來朝太子識其有反相請以罪誅之玄宗不聽祿山反十五載玄宗避賊行至馬嵬父老遮道請留太子討賊玄

宗許之遣壽王瑁及內侍高力士諭太子太子乃還六月丁酉至渭北便橋橋絕募水濱居民得三千餘人涉而濟遇潼關散卒以爲賊與戰多傷旣而覺之收其餘以涉後軍多沒者夕次永壽縣吏民稍持牛酒來獻新平郡太守薛羽保定郡太守徐穀聞賊且至皆棄城走己亥太子次保定捕得羽穀斬之辛丑次平涼郡得牧馬牛羊兵始振朔方留後支度副使杜鴻漸六城水陸運使魏少游節度判官崔漪支度判官崔簡金關內鹽池判官李涵河西行軍司馬裴冕迎太子治兵于朔方庚戌次豐寧見大河之險將保之會天大風迴趨靈武七月辛酉至于靈武壬戌裴冕等請皇太子卽皇帝位甲子卽皇帝位于靈武尊皇帝曰上皇天帝大赦改元至德賜文武官階勳爵版授侍老太守縣令裴冕爲中書侍郎同中書門下平章事甲戌安祿山寇扶風太守薛景仙敗之八月辛卯張巡及安祿山將李廷望戰于雍丘敗之十月辛巳朔日有食之癸未次彭原郡詔御史諫官論事勿先白大夫及宰相始鬻爵度僧尼房瑄爲招討西京防禦蒲潼兩關兵馬元帥兵部尙書王思禮副之南軍入于宜壽中軍入

于武功北軍入于奉天辛卯河南節度副使張巡及令狐潮戰于雍丘敗之辛丑房琯以中軍北軍及安祿山之衆戰于陳濤斜敗績癸卯琯又以南軍戰敗績是月遣永王璘朝上皇帝于蜀郡璘反丹徒郡太守闔敬之及璘戰于伊婁埭死之十一月辛卯河西地震戊午崔渙爲江南宣慰使郭子儀率回紇及安祿山戰于河上敗之史思明寇太原十二月安祿山陷魯東平濟陰三郡戊子給復平原郡二載安祿山陷潁川執太守薛愿及長史龐堅是歲吐蕃陷巋州嶺南溪獠梁崇牽陷容州

二載正月永王璘陷鄱陽郡乙卯安慶緒弑其父祿山丙寅河西兵馬使孟庭倫殺其節度使周似以武威郡反乙亥安慶緒將尹子奇寇睢陽郡張巡敗之二月戊子次于鳳翔李光弼及安慶緒之衆戰于太原敗之丁酉關西節度兵馬使郭英乂及安慶緒戰于武功敗績慶緒陷馮翊郡太守蕭竇死之慶緒將蔡希德寇太原戊戌庶人璘伏誅庚子郭子儀及安慶緒戰于潼關敗之壬寅河西判官崔偁克武威郡孟庭倫伏誅甲辰郭子儀及安慶緒戰于永豐倉敗

之大將李韶光王祚死之三月辛酉韋見素裴冕罷憲部尙書致仕苗晉卿爲左相四月戊寅郭子儀爲關內河東副元帥壬午瘞陣亡者庚寅郭子儀及安慶緒將李歸仁戰于劉運橋敗之五月癸丑子儀及慶緒將安守忠戰于清渠敗績丁巳房瑄罷諫議大夫張鎬爲中書侍郎同中書門下平章事六月癸未尹子奇寇睢陽丁酉南充郡民何滔執其太守楊齊曾以反劍南節度使盧元裕敗之七月己酉太白經天丁巳安慶緒將安武臣陷陝郡八月丁丑焚長春宮甲申崔渙罷張鎬兼河南節度使都統淮南諸軍事靈昌郡太守許叔冀奔于彭城癸巳大閱閏月甲寅安慶緒寇好時渭北節度使李光進敗之丁卯廣平郡王俶爲天下兵馬元帥郭子儀副之以朔方安西回紇南蠻大食兵討安慶緒辛未京畿採訪宣慰使崔光遠及慶緒戰于駱谷敗之行軍司馬王伯倫戰于苑北死之九月丁丑慶緒陷上黨郡執節度使程千里壬寅廣平郡王俶及慶緒戰于澧水敗之癸卯復京師慶緒奔于陝郡尙書左僕射裴冕告太清宮郊廟社稷五陵宣慰百姓十月戊申廣平郡王俶及安慶緒戰于新店敗之

克陝郡壬子復東京慶緒奔于河北興平軍兵馬使李奐及慶緒之衆戰于武關敗之克上洛郡吐蕃陷西平郡癸丑安慶緒陷睢陽太守許遠及張巡鄆州刺史姚閻左金吾衛將軍南霽雲皆死之癸亥給復鳳翔五載版授父老官遣太子太師韋見素迎上皇帝于蜀郡丁卯至自靈武饗于太廟哭三日己巳關內節度使王思禮及安慶緒戰于絳郡敗之十一月丙子張鎰率四鎮伊西北庭行營兵馬使李嗣業陝西節度使來瑱河南都知兵馬使嗣吳王祗克河南郡縣庾子作九廟神主告享于長樂殿十二月丙子上皇帝至自蜀郡甲寅苗晉卿爲中書侍郎同中書門下平章事戊午大赦靈武元從蜀郡扈從官三品以上予一子官四品以下一子出身瘞陣亡者致祭之給復其家二載免天下租庸來歲三之一禁珠玉寶鈿平脫金泥刺繡復諸州及官名以蜀郡爲南京鳳翔郡爲西京西京爲中京給復潞州五載并鄧許滑宋五州雍丘好畤奉先縣二載益州三載賜文武官階勳爵父老八十以上版授加緋衣銀魚民酺五日廣平郡王俶爲太尉進爵楚王苗晉卿爲侍中崔圓爲中書令李麟同

中書門下三品進封子南陽郡王係爲趙王新城郡王僅彭王潁川郡王憫克
王東陽郡王倓涇王封子儻爲襄王倓杞王偲召王佖興王侗定王乙丑史思
明降壬申達奚珣等伏誅

乾元元年正月戊寅上皇天帝御宣政殿授皇帝傳國受命寶符冊號曰光天
文武大聖孝感皇帝乙酉出宮女三千人庚寅大閱二月癸卯安慶緒將能元
皓以淄青降以元皓爲河北招討使乙巳上上皇天帝冊號曰聖皇天帝丁未
大赦改元贈死事及拒僞命者官成都靈州扈從三品以上予一子官五品以
上一子出身六品以下敘進之免陷賊州三歲稅賜文武官階爵三月甲戌徙
封倓爲成王戊寅立淑妃張氏爲皇后四月辛亥祔神主于太廟甲寅朝享于
太廟有事于南郊乙卯大赦賜文武官階勳爵天下非租庸毋輒役使有能賑
貧窮寵以官爵京官九品以上言事二王三恪予一子官史思明殺范陽節度
副使烏承恩以反五月戊子張鎰罷乙未崔圓李麟罷太常少卿王璵爲中書
侍郎同中書門下平章事七月党項羌寇邊九月丙子招討党項使王仲昇殺

拓拔戎德庚寅郭子儀率李光弼李嗣業王思禮淮西節度使魯炅與平軍節度使李奐滑濮節度使許叔冀平盧兵馬使董秦鄭蔡節度使季廣琛以討安慶緒癸巳大食波斯寇廣州十月甲辰立成王俶爲皇太子大赦賜文武官階爵五品以上子爲父後者勳兩轉舉忠正孝友堪東宮官者十一月壬申王思禮及安慶緒戰于相州敗之十二月庚戌戶部尙書李峘都統淮南江東江西節度使丁卯史思明陷魏州

二年正月己巳羣臣上尊號曰乾元大聖光天文武孝感皇帝郭子儀及安慶緒戰于愁思岡敗之丁丑祠九宮貴神戊寅耕籍田二月壬戌中書門下慮囚三月己巳皇后親蠶壬申九節度之師潰于湓水史思明殺安慶緒東京留守崔圓河南尹蘇震汝州刺史賈至奔于襄鄧郭子儀屯于東京丁亥以旱降死罪流以下原之流民還者給復三年甲午兵部侍郎呂諲同中書門下平章事乙未苗晉卿王璵罷京兆尹李峴爲吏部尙書中書舍人李揆爲中書侍郎戶部侍郎第五琦同中書門下平章事丙申郭子儀爲東畿山南東河南等道諸

節度防禦兵馬元帥四月庚子王思禮及史思明戰于直千嶺敗之壬寅詔減常膳服御武德中尙作坊非賜蕃客戎祀所須者皆罷之五月辛巳貶李峴爲蜀州刺史七月辛巳趙王係爲天下兵馬元帥李光弼副之辛卯呂諲罷八月乙巳襄州防禦將康楚元張嘉延反逐其刺史王政九月甲子張嘉延陷荊州丁亥太子少保崔光遠爲荆襄招討山南東道處置兵馬使庚寅史思明陷東京及齊汝鄭滑四州十月乙巳李光弼及史思明戰于河陽敗之壬戌呂諲起復十一月庚午貶第五琦爲忠州刺史十二月乙巳康楚元伏誅史思明寇陝州神策軍將衛伯玉敗之

上元元年三月丙子降死罪流以下原之四月戊申山南東道將張維瑾反殺其節度使史翹丁巳有彗星出于婁胃己未來瑱爲山南東道節度使以討張維瑾閏月辛酉有彗星出于西方甲戌徙封係爲越王己卯大赦改元賜文武官爵追封太公望爲武成王復死刑三覆奏是月大饑張維瑾降五月丙午太子太傅苗晉卿爲侍中壬子呂諲罷六月乙丑鳳翔節度使崔光遠及羌渾党

項戰于涇隴敗之乙酉又敗之于普潤李光弼及史思明戰于懷州敗之七月
丁未聖皇天帝遷于西內十一月甲午揚州長史劉展反陷潤州丙申陷昇州
壬子李峘淮南節度使鄧景山及劉展戰于淮上敗績是歲吐蕃陷廓州西原
蠻寇邊桂州經略使邢濟敗之

二年正月甲寅降死罪流以下原之乙卯劉展伏誅二月己未奴剌党項羌寇
寶雞焚大散關寇鳳州刺史蕭悺死之鳳翔尹李鼎敗之戊寅李光弼及史思
明戰于北邙敗績思明陷河陽癸未貶李揆爲袁州長史河中節度使蕭華爲
中書侍郎同中書門下平章事乙酉來瑱及史思明戰于魯山敗之三月甲午
史朝義寇陝州神策軍節度使衛伯玉敗之戊戌史朝義殺其父思明李光弼
罷副元帥四月己未吏部侍郎裴遵慶爲黃門侍郎同中書門下平章事乙亥
青密節度使尙衡及史朝義戰敗之丁丑鄆節度使能元皓又敗之壬午劍
南東川節度兵馬使段子璋反陷綿州遂州刺史嗣號王巨死之節度使李奐
奔于成都五月甲午史朝義將令狐彰以滑州降戊戌平盧軍節度使侯希逸

及史朝義戰于幽州敗之庚子李光弼爲河南道副元帥劍南節度使崔光遠克東川段子璋伏誅七月癸未朔日有食之八月辛巳殿中監李國貞都統朔方鎮西北庭與平陳鄭河中節度使九月壬寅大赦去乾元大聖光天文武孝感號去上元號稱元年以十一月爲歲首月以斗所建辰爲名賜文武官階勳爵版授侍老官先授者敘進之停四京號元年建子月癸巳曹州刺史常休明及史朝義將薛萼戰敗之己亥朝聖皇天帝于西內丙午衛伯玉及史朝義戰于永寧敗之己酉朝獻于太清宮庚戌朝享于太廟及元獻皇后廟建丑月辛亥有事于南郊己未來瑱及史朝義戰于汝州敗之乙亥侯希逸及朝義將李懷仙戰于范陽敗之

寶應元年建寅月甲申追冊靖德太子琮爲皇帝妃竇氏爲皇后乙酉葬王公妃主遇害者丙戌盜發敬陵惠陵甲辰李光弼克許州吐蕃請和戊申史朝義陷營州建卯月辛亥大赦賜文武官階爵五品以上清望及郎官御史薦流人有行業情可矜者停貢鷹鷄狗豹以京北府爲上都河南府爲東都鳳翔府爲

西都江陵府爲南都太原府爲北都壬子羌渾奴刺寇梁州癸丑河東軍亂殺其節度使鄧景山都知兵馬使辛雲京自稱節度使乙丑河中軍亂殺李國貞及其節度使荔非元禮戊辰淮西節度使王仲昇及史朝義將謝欽讓戰于申州敗績庚午郭子儀知朔方河中北庭潞儀澤沁節度行營與平定國軍兵馬副元帥壬申鄜州刺史成公意及党項戰敗之建辰月壬午大赦官吏聽納贓免罪左降官及流人罰鎮効力者還之甲午奴刺寇梁州戊申蕭華罷戶部侍郎元載同中書門下平章事建巳月庚戌史朝義寇澤州刺史李抱玉敗之壬子楚州獻定國寶玉十有三甲寅聖皇天帝崩乙丑皇太子監國大赦改元年爲寶應元年復以正月爲歲首建巳月爲四月丙寅閑廐使李輔國飛龍廐副使程元振遷皇后于別殿殺越王係兗王憫是夜皇帝崩于長生殿年五十二代宗睿文孝武皇帝諱豫肅宗長子也母曰章敬皇后吳氏玄宗諸孫百餘人代宗最長爲嫡皇孫聰明寬厚喜愠不形於色而好學強記通易象初名俶封廣平郡王安祿山反玄宗幸蜀肅宗留討賊代宗常從於兵間肅宗已卽位郭

子儀等兵討安慶緒未克肅宗在岐至德二載九月以廣平郡王爲天下兵馬元帥率朔方安西回紇南蠻大食等兵二十萬以進討百官送于朝堂過闕而下步出木馬門然後復騎以安西北庭行營節度使李嗣業爲前軍朔方河西隴右節度使郭子儀爲中軍關內行營節度使王思禮爲後軍屯于香積寺敗賊將安守忠斬首六萬級賊將張通儒守長安聞守忠敗棄城走遂克京城乃留思禮屯于苑中代宗率大軍以東安慶緒遣其將嚴莊拒于陝州代宗及子儀嗣業戰陝西大敗之安慶緒奔于河北遂克東都肅宗還京師十二月進封

楚王

乾元元年三月徙封成王四月立爲皇太子初太子生之歲豫州獻嘉禾於是以爲祥乃更名豫肅宗去上元三年號止稱元年月以斗所建辰爲名元年建巳月肅宗寢疾乃詔皇太子監國而楚州獻定國寶十有三因曰楚者太子之所封今天降寶於楚宜以建元乃以元年爲寶應元年肅宗張皇后惡李輔國欲圖之召問太子太子不許乃與越王係謀之肅宗疾革四月丁卯皇后與係

將召太子入宮飛龍副使程元振得其謀以告輔國輔國止太子無入率兵入
殺係及兗王憫幽皇后于別殿是夕肅宗崩乃迎太子見羣臣於九仙門明日
發喪己巳卽皇帝位于柩前癸酉始聽政甲戌奉節郡王适爲天下兵馬元帥
郭子儀罷副元帥乙亥進封适爲魯王五月壬午李輔國爲司空庚寅追尊母
爲皇太后丙申李光弼反史朝義戰于宋州敗之丁酉大赦刺史予一子官賜
文武官階爵子爲父後者勳一轉免民逋租宿負進封子益昌郡王邈爲鄭王
延慶郡王迥韓王追復庶人王氏爲皇后瑛瑤瑑皆復其封號六月辛亥追廢
皇后張氏越王係兗王憫皆爲庶人七月乙酉殺山南東道節度使裴茂癸巳
劍南西川兵馬使徐知道反八月己未知道伏誅辛未台州人袁晁反乙亥徙
封适爲雍王九月戊子鳳州刺史呂日將及党項羌戰于三嗟谷敗之丙申回
紇請助戰壬寅大閱癸卯袁晁陷信州十月乙卯陷温明二州詔浙江水旱百
姓重困州縣勿輒科率民疫死不能葬者爲瘞之辛酉雍王适討史朝義壬戌
盜殺李輔國癸酉雍王适克懷州甲戌敗史朝義于橫水克河陽東都史朝義

將張獻誠以汴州降十一月丁亥朝義將薛嵩以相衛洛邢四州降丁酉朝義將張忠志以趙定深恆易五州降己亥朔方行營節度使僕固懷恩爲朔方河北副元帥十二月己酉太府左藏庫火戊辰瘞京城內外暴骨甲戌李光弼及袁鼂戰于衢州敗之是歲舒州人楊昭反殺其刺史劉秋子西原蠻叛吐蕃寇秦成渭三州

廣德元年正月癸未京兆尹劉晏爲吏部尚書同中書門下平章事甲申史朝義自殺其將李懷仙以幽州降田承嗣以魏州降壬寅山陵使山南東道節度使來瑱有罪伏誅三月甲辰山南東道兵馬使梁崇義自南陽入于襄州丁未李光弼及袁鼂戰敗之辛酉葬至道大聖大明孝皇帝于泰陵甲子党項羌寇同州郭子儀敗之于黃堆山庚午葬文明武德大聖大宣孝皇帝于建陵六月同華節度使李懷讓自殺七月壬寅羣臣上尊號曰寶應元聖文武孝皇帝壬子大赦改元免民逋負戶三丁免其一庸調給復河北三年回紇行營所經免今歲租賜內外官階勳爵給功臣鐵券藏名于太廟圖形于凌煙閣吐蕃陷隴

右諸州八月僕固懷恩反九月壬寅裴遵慶宣慰僕固懷恩于汾州乙丑涇州
刺史高暉叛附于吐蕃十月庚午吐蕃陷邠州辛未寇奉天武功京師戒嚴壬
申雍王适爲關內兵馬元帥郭子儀副之癸酉渭北行營兵馬使呂日將及吐
蕃戰于整屋敗之乙亥又戰于整屋敗績丙子如陝州丁丑次華陰豐王珙有
罪伏誅戊寅吐蕃陷京師立廣武郡王承宏爲皇帝辛巳次陝州癸巳吐蕃潰
郭子儀復京師南山五谷人高玉反十一月壬寅廣州市舶使呂太一反逐其
節度使張休十二月辛未劉晏宣慰上都甲午至自陝州乙未苗晉卿裴遵慶
罷檢校禮部尙書李峴爲黃門侍郎同中書門下平章事丙申放承宏于華州
吐蕃陷松維二州西原蠻陷道州

二年正月丙午詔舉堪御史諫官刺史縣令者乙卯立雍王适爲皇太子癸亥
劉晏李峴罷右散騎常侍王縉爲黃門侍郎太常卿杜鴻漸爲兵部侍郎同中
書門下平章事郭子儀兼河東副元帥二月辛未僕固懷恩殺朔方軍節度留
後渾釋之癸酉朝獻于太清宮甲戌朝享于太廟乙亥有事于南郊己丑大赦

賜內外官階爵武德功臣子孫予一人官成都靈武元從三品以上加賜爵一級餘加一階寶應功臣三品以上官一子仍賜爵一級餘加階勳兩轉五品以上爲父後者勳兩轉三月辛丑給復河南府二年甲子盛王琦薨四月甲午禁鈿作珠翠五月洛水溢六月丁卯有星隕于汾州七月庚子初稅青苗己酉李光弼薨八月丙寅王縉爲侍中都統河南淮南山南東道節度行營事壬申王縉罷侍中癸巳吐蕃寇邠州邠寧節度使白孝德敗之于宜祿九月己未劍南節度使嚴武及吐蕃戰于當狗城敗之是秋有蝥十月丙寅吐蕃寇邠州丁卯寇奉天京師戒嚴庚午嚴武克吐蕃鹽川城辛未朔方兵馬使郭晞及吐蕃戰于邠西敗之是月突厥寇豐州守將馬望死之十一月乙未吐蕃軍潰京師解嚴河西節度使楊志烈及僕固懷恩戰于靈州敗績癸丑袁鼂伏誅免越州今歲田租之半給復温台明三州一年十二月乙丑高玉伏誅丙寅衆星隕是歲

西原蠻陷邠州

永泰元年正月癸巳大赦改元是月欽州人殺其刺史龐濬二月戊寅党項羌

寇富平庚辰儀王璿薨三月庚子兩木冰庚戌吐蕃請和辛亥大風拔木四月
己巳自春不雨至于而是而雨是夏蓋屋糴麥生七月辛卯平盧淄青兵馬使李
懷玉逐其節度使侯希逸八月庚辰王縉爲河南副元帥僕固懷恩及吐蕃回
紇党項羌渾奴刺寇邊九月庚寅命百官觀浮屠象于光順門辛卯太白經天
甲辰吐蕃寇醴泉奉天党項羌寇同州渾奴刺寇整屋京師戒嚴己酉屯于苑
郭子儀屯于涇陽丁巳同華節度使周智光及吐蕃戰于澄城敗之智光入于
鄜州殺其刺史張麟遂焚坊州十月沙陀殺楊志烈己未吐蕃至邠州與回紇
寇邊辛酉寇奉天癸亥寇同州乙丑寇興平丁卯回紇党項羌請降癸酉郭子
儀及吐蕃戰于靈臺敗之京師解嚴閏月辛卯朔方副將李懷光克靈州辛亥
劍南西山兵馬使崔旰反寇成都節度使郭英乂奔于靈池普州刺史韓澄殺
之癸丑斂民貲作浮屠供

大曆元年二月吐蕃遣使來朝壬子杜鴻漸爲山南西道劍南東西川邛南西
山等道副元帥三月癸未劍南東川節度使張獻誠及崔旰戰于梓州敗績七

月癸酉洛水溢九月辛巳吐蕃陷原州十一月甲子大赦改元給復流民歸業者三年十二月己亥有彗星出于瓠瓜癸卯周智光反殺號州刺史龐充是冬無雪鄭王邈爲天下兵馬元帥

二年正月丁巳郭子儀討周智光己未同華將李漢惠以同州降甲子周智光伏誅淮西節度使李忠臣入于華州戊寅給復同華二州二年八月壬寅殺駙馬都尉姜慶初九月甲寅吐蕃寇靈州乙卯寇邠州郭子儀屯于涇陽京師戒嚴乙丑晝有星流于南方是秋桂州山獠反十月戊寅朔方軍節度使路嗣恭及吐蕃戰于靈州敗之京師解嚴十一月辛未雨木冰壬申京師地震

三年二月癸巳商州兵馬使劉洽殺其刺史殷仲卿三月乙巳朔日有食之五月乙卯追號齊王倓爲皇帝興信公主女張氏爲皇后癸亥地震六月壬寅幽州兵馬使朱希彩殺其節度使李懷仙自稱留後閏月庚午王縉兼幽州盧龍軍節度使七月壬申瀘州刺史楊子琳反陷成都劍南節度留後崔寬敗之克成都子琳殺夔州別駕張忠戍寅吐蕃遣使來朝八月己酉吐蕃寇靈州丁卯

寇邠州京師戒嚴戊辰邠寧節度使馬璘及吐蕃戰敗之庚午王縉兼河東節度使九月丁丑濟王環薨壬午吐蕃寇靈州朔方將白元光敗之壬辰又敗之于靈武戊辰京師解嚴十二月辛酉涇原兵馬使王童之謀反伏誅

四年正月甲戌殺潁州刺史李祐二月乙卯杜鴻漸罷副元帥丙辰京師地震三月遣御史稅商錢甲戌免京兆今歲稅五月丙戌京師地震六月戊申王縉罷副元帥都統七月癸未降死罪流以下原之十月丁巳大霧十一月辛未禁畿內弋獵壬申杜鴻漸罷癸酉元載權知門下省事甲戌吐蕃寇靈州朔方軍節度留後常謙光敗之丙子左僕射裴冕同中書門下平章事癸巳裴冕兼河南淮西山南東道副元帥十二月戊戌裴冕薨是歲廣州人馮崇道桂州人朱濟時反容管經略使王翊敗之

五年正月辛卯鳳翔節度使李抱玉爲河西隴右山南西道副元帥三月癸酉內侍監魚朝恩有罪自殺丙戌以昭陵皇堂有光赦京兆關輔四月庚子湖南兵馬使臧玠殺其團練使崔權己未有彗星出于五車五月己卯有彗星出于

北方六月己未以彗星滅降死罪流以下原之錄魏徵王珪李靖李勣房玄齡杜如晦之後是歲湖南將王國良反及西原蠻寇州縣

六年二月壬寅李抱玉罷山南西道副元帥三月王翊敗梁崇牽克容州四月戊寅藍田西原地陷禁大綱竭鑿六破錦及文紗吳綾爲龍鳳麒麟天馬辟邪者五月戊申殺殿中侍御史陸珽成都府司錄參軍事李少良大理評事韋頌七年二月庚午江水汎溢五月乙酉大雨雹大風拔木乙未以旱大赦減膳撤樂是秋幽州盧龍將李懷瑗殺其節度使朱希彩經略軍副使朱泚自稱留後十月乙亥以淮南旱免租庸三之二十一月庚辰免巴蓬渠集壁充通開八州二歲租庸十二月丙寅雨水有長星出于參

八年正月甲辰詔京官三品以上及郎官御史歲舉刺史縣令一人五月辛卯鄭王邈薨壬寅赦京師癸卯降死罪流以下原之八月己未吐蕃寇靈州郭子儀敗之于七級渠甲子廢華州屯田給貧民九月壬午循州刺史哥舒晃反殺嶺南節度使呂崇賁戊子詔京官五品以上兩省供奉官郎官御史言事十月

庚申吐蕃寇涇邠丙寅朔方兵馬使渾瑊及吐蕃戰于宜祿敗績涇原節度使
馬璘及吐蕃戰于潘原敗之
九年二月辛未徐州兵亂逐其刺史梁乘四月壬辰大赦十月壬申信王璿薨
乙亥涼王璿薨壬辰降京師死罪流以下原之
十年正月丁酉昭義軍兵馬使裴志清逐其節度使薛勣叛附于田承嗣壬寅
壽王瑁薨戊申田承嗣反癸丑承嗣陷洛州乙卯劍南西川節度使崔寧及吐
蕃戰于西山敗之二月乙丑田承嗣陷衛州刺史薛雄死之辛未封子述爲睦
王逾榔王連恩王遘鄜王造忻王暹韶王運嘉王遇端王遁循王通恭王遠原
王逸雅王丙子河陽軍亂逐三城使常休明三月甲午陝州軍亂逐其觀察使
李國清四月癸未河東節度使薛兼訓等討田承嗣給復昭義五州二年甲申
大雨雹大風拔木五月乙未魏博將霍榮國以磁州降甲寅大雨雹大風拔木
震闕門六月甲戌成德軍節度使李寶臣及田承嗣戰于冀州敗之七月己未
杭州海盜八月己丑田承嗣寇磁州九月壬寅降京師死罪流以下原之壬子

吐蕃寇臨涇癸丑寇隴州丙辰李抱玉敗之于義寧丁巳馬璘又敗之于百里城十月辛酉朔日有食之甲子昭義軍節度使李承昭及田承嗣戰于清水敗之丙寅貴妃獨孤氏薨丁卯追冊爲皇后十一月丁酉魏博將吳希光以瀛州降丁未嶺南節度使路嗣恭克廣州哥舒晃伏誅

十一年正月庚寅田承嗣降辛亥崔寧及吐蕃戰敗之五月汴宋都虞候李靈耀反殺濮州刺史孟鑿七月庚寅田承嗣寇滑州永平軍節度使李勉敗績八月甲申淮西節度使李忠臣河陽三城使馬燧及李勉討李靈耀閏月丁酉太白晝見九月乙丑李忠臣馬燧及李靈耀戰于鄭州敗績十月乙酉戰于中牟敗之壬辰忠臣又敗之于西梁固壬寅淮南節度使陳少遊及李靈耀戰于汴州敗之丙子田承嗣以兵援靈耀李忠臣敗之于匡城甲寅靈耀伏誅

十二年三月庚午敕田承嗣辛巳元載有罪伏誅貶王縉爲括州刺史四月壬午太常卿楊綰爲中書侍郎禮部侍郎常袞爲門下侍郎同中書門下平章事癸巳詔諫官獻封事勿限時側門論事者隨狀面奏六品以上官言事投匭者

無勒副章丁酉吐蕃寇黎雅二州崔寧敗之是月金州人卓英璘反六月乙巳英璘伏誅給復金州二年丁未以旱降京師死罪流以下原之七月己巳楊綰薨丙子詔尙書御史大夫左右丞侍郎舉任刺史者九月庚午吐蕃寇坊州是秋河溢十一月壬子山南西道節度使張獻恭及吐蕃戰于岷州敗之十二月丁亥崔寧及吐蕃戰于西山敗之是歲恆定趙三州地震冬無雪

十三年正月戊辰回紇寇并州癸酉河東節度留後鮑防及回紇戰于陽曲敗績二月庚辰代州刺史張光晟及回紇戰于羊虎谷敗之四月甲辰吐蕃寇靈州常謙光敗之十月己丑禁京畿持兵器捕獵是歲郴州黃岑山崩

十四年二月癸未魏博節度使田承嗣卒其兄子悅自稱留後三月丁未汴宋將李希烈逐其節度使李忠臣自稱留後五月辛酉不豫詔皇太子監國是夕皇帝崩于紫宸內殿年五十三

贊曰天寶之亂大盜遽起天子出奔方是時肅宗以皇太子治兵討賊真得其職矣然以僖宗之時唐之威德在人紀綱未壞孰與天寶之際而僖宗在蜀諸

唐書卷六考證

代宗紀乾元元年八月乙亥徙封适為雍王○舊書作九月丁丑朔 臣西按德

宗紀當從新書

廣德元年正月甲申史朝義自殺其將李懷仙以幽州降○舊書在寶應元年

十一月

唐書卷六考證

唐

書 卷六考證

中華書局聚

吳齊魯六集

十一只

吳齊魯六集

今表誠神武太平八民心受佳新益康王○書書在六民下立陳

吳齊魯六集

唐書卷七

宋 翰 林 學 士 歐 陽 修 撰

本紀第七

德宗神武聖文皇帝諱适代宗長子也母曰睿真皇太后沈氏初沈氏以開元末選入代宗宮安祿山之亂玄宗避賊于蜀諸王妃妾不及從者皆爲賊所得拘之東都之掖廷代宗克東都得沈氏留之宮中史思明再陷東都遂失所在肅宗元年建丑月封德宗奉節郡王代宗卽位史朝義據東都乃以德宗爲天下兵馬元帥進封魯王八月徙封雍王寶應元年十月屯于陝州諸將進擊史朝義敗之朝義走河北遂克東都十一月史朝義死幽州守將李懷仙斬其首來獻河北平以功兼尙書令與功臣郭子儀李光弼等皆賜鐵券圖形凌煙閣廣德二年二月立爲皇太子大曆十四年五月辛酉代宗崩癸亥卽皇帝位于太極殿閏月甲戌貶常袞爲河南少尹以河南少尹崔祐甫爲門下侍郎同中書門下平章事丙子罷諸州府及新羅渤海貢鷹鷄戊寅罷山南貢枇杷江南

甘橘非供宗廟者辛巳罷邕府歲貢奴婢癸未罷梨園樂工三百人劍南貢生
春酒甲申郭子儀爲尙父兼太尉中書令丙戌罷獻祥瑞貢器以金銀飾者還
之丁亥出宮人放舞象三十有二于荆山之陽六月己亥大赦賜文武官階爵
民爲戶者占爵一級減乘輿服御士庶田宅車服踰制者有司爲立法度禁百
官置邸販鬻武德至德將相有功者子孫子官庚子進封子宣城郡王誦爲宣
王封子謨爲舒王諶通王諒虔王詳肅王謙資王乙巳封弟迺爲益王迅隋王
遂蜀王丙午詔六品以上清望官日二人待制癸丑命皇族五等以上居四方
者家一人赴山陵己未罷揚州貢鏡幽州貢麝癸亥舉可刺史京令者七月戊
辰朔日有食之庚午弛邕州金坑禁辛卯罷權酷八月甲辰道州司馬楊炎爲
門下侍郎懷州刺史喬琳爲御史大夫同中書門下平章事乙巳還吐蕃俘十
月丁酉吐蕃雲南蠻寇黎茂文扶四州鳳翔節度使朱泚金吾衛大將軍曲環
敗之于七盤城己酉葬睿文孝武皇帝于元陵戊午罷九成宮貢立獸炭襄州
蔗蕪工辛酉以沙苑豭豕三千給貧民十一月壬午喬琳罷十二月乙卯立宣

王誦爲皇太子丙寅晦日有食之
建中元年正月丁卯改元羣臣上尊號曰聖神文武皇帝己巳朝獻于太清宮
庚午朝享于太廟辛未有事于南郊大赦賜文武官階勳爵遣黜陟使于天下
賜子爲父後者勳兩轉二月丙申初定兩稅四月乙未四鎮北庭行軍別駕劉
文喜反于涇州伏誅己亥地震六月甲午崔祐甫薨七月丙寅王國良降己丑
殺忠州刺史劉晏八月丁巳遙尊母沈氏爲皇太后九月己卯雷庚寅睦王述
爲奉迎皇太后使是冬無雪黃河滹沱易水溢

二年正月戊辰成德軍節度使李寶臣卒其子惟岳自稱留後幽州盧龍軍節
度使朱滔討之魏博節度使田悅反神策都虞候李晟河東節度使馬燧昭義
軍節度使李抱真河陽節度副使李芄討之永平軍節度使李勉爲汴滑陳懷
鄭汝陝河陽三城宋亳潁節度都統二月乙巳御史大夫盧杞爲門下侍郎同
中書門下平章事乙卯振武軍亂殺其使彭令芳及監軍劉惠光丁巳發兵屯
關東誓師于望春樓山南東道節度使梁崇義反五月京師兩霪庚申置待詔

官三十人六月熒惑太白鬪于東井癸巳淮寧軍節度使李希烈爲漢南漢北
兵馬招討使以討梁崇義辛丑郭子儀薨七月庚申楊炎罷檢校尙書右僕射
侯希逸爲司空前永平軍節度使張鎰爲中書侍郎同中書門下平章事侯希
逸薨癸未馬燧李抱真及田悅戰于臨洛敗之八月劍南西川節度使張延賞
東川節度使王叔邕山南東道節度使賈耽荆南節度使李昌巖陳少遊討梁
崇義以李希烈爲諸軍都統辛卯平盧軍節度使李正己卒其子納自稱留後
壬子梁崇義伏誅九月李納陷宋州李惟岳將張孝忠以易定二州降壬戌賜
立功士卒帛稟死事家三歲十月戊申李納將李洧以徐州降十一月辛酉納
寇徐州宣武軍節度使劉洽敗之于七里溝丁丑馬燧及田悅戰于雙岡敗之
甲申李納將王涉以海州降十二月丁酉馬萬通以密州降馬燧爲魏博招討
使是歲殺崖州司馬楊炎

三年正月丙寅朱滔成德軍節度使張孝忠及李惟岳戰于東鹿敗之辛未減
常膳及太子諸王食物復權酤癸未李納陷海密二州閏月乙未李惟岳將康

日知以趙州降甲辰惟岳伏誅其將楊榮國以深州降庚戌馬燧及田悅戰于
洹水敗之是月悅將李再春以博州降田昂以洛州降二月戊午李惟岳將楊
政義以定州降甲戌給復易定深趙恆冀六州三年赦吏民爲李惟岳迫脅者
己卯震通化門四月戊午李納將李士真以德棣二州降甲子借商錢甲戌昭
義軍節度副使盧玄卿爲魏博澶相招討使戊寅張鎰罷壬午殺殿中侍御史
鄭詹是月朱滔反陷德棣二州五月辛卯朔方軍節度使李懷光討田悅六月
甲子京師地震恆冀觀察使王武俊反辛巳李懷光馬燧李芄李抱真及朱滔
王武俊田悅戰于連篋山敗績七月壬辰殿中丞李雲端謀反伏誅癸巳停借
商錢令八月癸丑濱州司馬李孟秋峯州刺史皮岸反伏誅九月丁亥初稅商
錢茶漆竹木十月丙辰吏部侍郎關播爲中書侍郎同中書門下平章事李希
烈反丙子肅王詳薨

四年正月丁亥鳳翔節度使張鎰及吐蕃尙結贊盟于清水庚寅李希烈陷汝
州執刺史李元平戊戌東都汝行營節度使哥舒曜討李希烈二月丁卯克汝

州三月辛卯李希烈寇鄂州刺史李兼敗之丁酉荆南節度使張伯儀及李希烈戰于安州敗績四月庚申李勉爲淮西招討處置使哥舒曜副之張伯儀爲淮西應援招討使賈耽江南西道節度使嗣曹王臯副之甲子京師地震生毛丙子哥舒曜及李希烈戰于潁橋敗之五月辛巳京師地震乙酉潁王璲薨乙未劉洽爲淄青兗鄆招討制置使六月庚戌稅屋間架算除陌錢丁卯徙封逾爲丹王遘簡王七月馬燧爲魏博澶相節度招討使壬辰盧杞關播李忠臣及吐蕃區頰贊盟于京師八月丁未李希烈寇襄城乙卯希烈將曹季昌以隋州降庚申有星隕于京師九月丙戌神策軍行營兵馬使劉德信及李希烈戰于扈澗敗績庚子舒王謨爲荆襄江西沔鄂節度諸軍行營兵馬都元帥徙封普王十月涇原節度使姚令言反犯京師戊申如奉天朱泚反庚戌泚殺司農卿段秀實及左驍衛將軍劉海賓鳳翔後營將李楚琳殺其節度使張鎰自稱留後癸丑李希烈陷襄城宣武軍兵馬使高翼死之甲寅朱泚殺涇原節度都虞候何明禮乙卯殺尙書右僕射崔寧丁巳戶部尙書蕭復爲吏部尙書吏部郎

中劉從一爲刑部侍郎京兆府戶曹參軍翰林學士姜公輔爲諫議大夫同中書門下平章事朱泚犯奉天禁軍敗績于城東辛酉靈鹽節度留後杜希全鄜坊節度使李建徽及朱泚戰于漠谷敗績癸亥劉德信及泚戰于思子陵敗之甲子行在都虞候渾瑊及泚戰于城下敗之左龍武軍大將軍呂希倩死之乙丑將軍高重傑死之是月商州軍亂殺其刺史謝良輔十一月劍南西川兵馬使張勑逐其節度使張延賞勑伏誅癸巳李懷光及朱泚戰于魯店敗之懷光爲中書令朔方邠寧同華陝虢河中晉絳慈隰行營兵馬副元帥十二月朱泚陷華州壬戌貶盧杞爲新州司馬庚午李希烈陷汴鄭二州

興元元年正月癸酉大赦改元去聖神文武號復李希烈田悅王武俊李納官爵赴奉天收京城將士有罪減三等子孫減二等在行營者賜勳五轉賜文武官階勳爵罷間架竹木茶漆稅及除陌錢給復奉天五年城中十年關播罷丙戌吏部侍郎盧翰爲兵部侍郎同中書門下平章事戊子蕭復爲山南東西荆湖淮南江西鄂岳浙江東西福建嶺南宣慰安撫使戊戌劉洽爲汴滑宋亳都

統副使二月甲子李懷光爲太尉懷光反丁卯如梁州懷光將孟庭保以兵來追左衛大將軍侯仲莊敗之于驛店三月李懷光奪鄜坊京畿金商節度使李建徽神策軍兵馬使楊惠元兵惠元死之癸酉魏博兵馬使田緒殺其節度使田悅自稱留後甲戌李懷光殺左廂兵馬使張名振右武鋒兵馬使石演芬丁亥李晟爲京畿渭北鄜坊丹延節度招討使神策行營兵馬使尙可孤爲神策京畿渭南商州節度招討使壬辰次梁州丁酉劉洽權知汴滑宋亳都統兵馬事己亥渾瑊爲朔方邠寧振武永平奉天行營兵馬副元帥四月李懷光陷坊州甲辰李晟爲京畿渭北商華兵馬副元帥甲寅姜公輔罷涇原兵馬使田希鑿殺其節度使馮河清自稱留後乙丑渾瑊及朱滔戰于武亭川敗之丁卯義王玘薨是月坊州刺史竇覲克坊州五月癸酉涇王侏薨丙子李抱真王武俊及朱滔戰于京城敗之壬辰尙可孤及朱泚戰于藍田之西敗之乙未李晟又敗之于苑北戊戌又敗之于白華復京師六月癸卯姚令言伏誅甲辰朱泚伏誅己酉李晟爲司徒中書令癸丑以梁州爲興元府給復一年耆老加版授甲

寅渾瑊爲侍中乙巳給復洋州一年加給興元一年免鳳州今歲稅父老加版
授七月丙子次鳳翔免今歲秋稅八十以上版授刺史餘授上佐丁丑葬宗室
遇害者壬午至自興元丁亥李懷光殺宣慰使孔巢父辛卯大赦賜百官將士
階勳爵收京城者升八資給復京北府一年是月嗣曹王臯及李希烈戰于應
山敗之八月癸卯李晟爲鳳翔隴右諸軍涇源四鎮北庭行營兵馬副元帥馬
燧爲晉慈隰諸軍行營兵馬副元帥渾瑊爲河中同絳陝虢諸軍行營兵馬副
元帥丙午渾瑊兼朔方行營兵馬副元帥己酉延王玢隋王迅薨十月辛丑李
勉檢校司徒同中書門下平章事閏月戊子李希烈將李澄以滑州降十一月
癸卯劉洽邠隴行營節度使曲環及李希烈戰于陳州敗之戊午克汴州乙丑
蕭復罷十二月乙酉渾瑊及李懷光戰于乾坑敗績是歲陳王珪薨
貞元元年正月丁酉大赦改元罷權稅三月李懷光殺步軍兵馬使田仙浩都
虞候呂鳴岳丁未李希烈陷鄧州殺唐鄧隋招討使黃金岳是春旱四月乙丑
徙封誼爲舒王壬午渾瑊及李懷光戰于長春宮敗之丙戌馬燧渾瑊爲河中

招撫使六月己丑幽州盧龍軍節度使朱滔卒涿州刺史劉怵自稱留後辛卯
劍南西川節度使張延賞爲中書侍郎同中書門下平章事戊子馬燧及李懷
光戰于陶城敗之七月灞澇竭庚子大風拔木八月襲封配饗功臣子孫甲子
以旱避正殿減膳甲戌李懷光伏誅己卯給復河中同絳二州一年馬燧爲侍
中張延賞罷丙戌李希烈殺宣慰使顏真卿九月辛亥劉從一罷庚申幽州盧
龍軍節度使劉怵卒其子濟自稱留後是秋雨木冰十一月癸卯有事于南郊
大赦賜奉天興元扈從百官收京將士階勳爵
二年正月丙申詔減御膳之半調貧乏者授以官壬寅盧翰罷吏部侍郎劉滋
爲左散騎常侍給事中崔造中書舍人齊映同中書門下平章事二月癸亥山
南東道節度使樊澤及李希烈戰于泌河敗之四月丙寅希烈伏誅甲戌兩土
甲申給復淮西二年五月李希烈將李惠登以隨州降己酉地震六月癸未滄
州刺史程日華卒其子懷直自稱觀察留後是月淮西兵馬使吳少誠殺其節
度使陳仙奇自稱留後七月李希烈將薛翼以唐州降侯召以光州降八月丙

子大雨雹丙戌吐蕃寇邠寧涇隴四州九月乙巳寇好時李晟敗之于汧陽十月癸酉邠寧節度使韓游瓌又敗之于平川十一月甲午立淑妃王氏爲皇后丁酉皇后崩辛丑吐蕃陷鹽州十二月丁巳陷夏州馬燧爲綏銀麟勝招討使庚申崔造罷甲戌以吐蕃寇邊避正殿

三年正月壬寅尙書左僕射張延賞同中書門下平章事壬子劉滋罷貶齊映爲夔州刺史兵部侍郎柳渾同中書門下平章事二月己卯華州潼關節度使駱元光克鹽夏二州甲申葬昭德皇后于靖陵三月丁未李晟爲太尉辛亥馬燧罷副元帥五月揚州江溢吳少誠殺申州刺史張伯元殿中侍御史鄭常閏月辛未渾瑊及吐蕃盟于平涼吐蕃執會盟副使兵部尙書崔漢衡殺判官殿中侍御史韓弇戊寅太白晝見六月吐蕃寇鹽夏二州丙戌馬燧爲司徒前陝虢觀察使李泌爲中書侍郎同中書門下平章事七月甲子朔方節度使杜希全爲朔方靈鹽豐夏綏銀節度都統壬申張延賞薨八月辛巳朔日有食之己丑柳渾罷戊申吐蕃寇青石嶺隴州刺史蘇清沔敗之庚戌禁大馬出蒲潼武

關九月丁巳吐蕃寇汧陽丙寅陷華亭及連雲堡十月甲申寇豐義韓游瓌敗之乙酉寇長武城城使韓全義敗之壬辰射生將韓欽緒謀反伏誅十一月己卯京師東都河中地震十二月庚辰獵于新店

四年正月庚戌朔京師地震大赦刺史子一子官增戶墾田者加階縣令減選九品以上官言事壬申劉玄佐爲四鎮北庭行營涇原節度副元帥是月金房二州地震江溢山裂雨木冰于陳留四月河南淮海地生毛己亥福建軍亂逐其觀察使吳誥大將郝誠盜自稱留後五月吐蕃寇涇邠寧慶鄜五州六月己亥封子諫爲邕王七月庚戌渾瑊爲邠寧慶副元帥癸丑寧州軍亂邠寧都虞候楊朝晟敗之己未奚室韋寇振武是月河水黑八月灞水溢九月庚申吐蕃寇寧州邠寧節度使張獻甫敗之冬築夾城是歲京師地震二十

五年正月甲辰朔日有食之二月庚子大理卿董晉爲門下侍郎御史大夫竇參爲中書侍郎同中書門下平章事三月甲辰李泌薨夏吐蕃寇長武城韓全義敗之于佛堂原九月丙午劍南西川節度使韋臯敗吐蕃于臺登北谷克嶽

州十月嶺南節度使李復克瓊州
六年春旱閏四月乙卯詔常參官畿縣令言事免京北府夏稅八月辛卯殺皇太子妃蕭氏十一月戊辰朝獻于太清宮己巳朝享于太廟庚午有事于南郊賜文武官階爵降囚罪徒以下原之葬戰亡暴骨者是歲吐蕃陷北庭都護府節度使楊襲古奔于西州

七年正月己巳襄王儂薨四月安南首領杜英翰反伏誅五月甲申端王遇薨九月回鶻殺楊襲古十一月戊戌睦王述薨是冬無雪

八年二月庚子兩土三月甲申宣武軍節度使劉玄佐卒其子士寧自稱留後四月吐蕃寇靈州丁亥殺左諫議大夫知制誥吳通玄乙未貶竇參爲郴州別駕尙書左丞趙憬兵部侍郎陸贄爲中書侍郎同中書門下平章事五月己未大風發太廟屋瓦癸酉平盧軍節度使李納卒其子師古自稱留後六月淮水溢吐蕃寇連雲堡大將王進用死之九月丁巳韋臯及吐蕃戰于維州敗之十一月壬子朔日有食之庚午山南西道節度使嚴震及吐蕃戰于黑水堡敗之

是月幽州盧龍軍節度使劉濟及其弟瀛州刺史澶戰于瀛州澶敗奔于京師
十二月甲辰獵于城東

九年正月癸卯復稅茶四月辛酉關輔河中地震五月甲辰義成軍節度使賈
耽爲尙書右僕射尙書右丞盧邁同中書門下平章事丙午董晉罷八月庚戌
李晟薨十一月癸未朝獻于太清宮甲申朝享于太廟乙酉有事于南郊大赦
十二月丙辰宣武軍將李萬榮逐其節度使劉士寧自稱留後

十年正月壬辰南詔蠻敗吐蕃于神川來獻捷四月癸卯朔赦京城戊申地震
癸丑又震是月太白晝見六月丙寅韋臯敗吐蕃克峨和城自春不雨至于是
月辛未雨大風拔木七月西原蠻叛八月陷欽橫潯貴四州十月昭義軍節度
留後王虔休及攝洛州刺史元誼戰于雞澤敗之十二月丙辰獵于城南壬戌
貶陸贄爲太子賓客

十一年四月丙寅奚寇平州劉濟敗之于青都山五月庚午中書門下慮囚八
月辛亥馬燧薨九月橫海軍兵馬使程懷信逐其兄節度使懷直自稱留後十

月朗蜀二州江盜十二月戊辰獵于苑中

十二年二月己卯吐蕃寇雋州刺史曹高仕敗之三月丙辰韶王暹薨四月庚午魏博節度使田緒卒其子季安自稱留後六月己丑宣武軍節度使李萬榮卒其子迺自稱兵馬使伏誅七月戊戌韓王迺薨八月己未朔日有食之丙戌趙憬薨九月吐蕃寇慶州十月甲戌右諫議大夫崔損給事中趙宗儒同中書門下平章事

十三年正月壬寅吐蕃請和四月辛酉以旱慮囚壬戌雩于興慶宮五月壬寅吐蕃寇雋州曹高仕敗之庚戌義寧軍亂殺其將常楚客七月乙未京師地震九月己丑盧邁罷

十四年三月丙申鳳翔監軍使西門去奢殺其將夏侯衍五月己酉始雷閏月辛亥有星隕于西北辛酉長武城軍亂逐其使韓全義六月丙申歸化堡軍亂逐其將張國誠涇原節度使劉昌敗之七月壬申趙宗儒罷工部侍郎鄭餘慶爲中書侍郎同中書門下平章事九月丁卯杞王倓薨十二月壬寅明州將粟

鏗殺其刺史盧雲以反是冬無雪京師饑

十五年正月甲寅雅王逸薨壬戌郴州藍山崩二月乙酉宣武軍亂殺節度行軍司馬陸長源宋州刺史劉逸準自稱留後三月甲寅彰義軍節度使吳少誠反陷唐州守將張嘉瑜死之四月乙未粟鏗伏誅九月乙巳陳許節度留後上官浼及吳少誠戰于臨潁敗績丙午少誠寇許州庚戌宣武軍節度使劉全諒卒都知兵馬使韓弘自稱留後丙辰宣武河陽鄭滑東都汝成德幽州淄青魏博易定澤潞河東淮南徐泗山南東西鄂岳軍討吳少誠十月己丑邕王諫薨十一月丁未山南東道節度使于頔及吳少誠戰于吳房敗之陳許節度使上官浼又敗之于柴籬辛亥安黃節度使伊慎又敗之于鍾山十二月庚午壽州刺史王宗又敗之于秋柵辛未渾瑊薨乙未諸道兵潰于小澱河

十六年正月乙巳易定兵及吳少誠戰敗績二月乙酉鹽夏綏銀節度使韓全義爲蔡州行營招討處置使上官浼副之四月丁亥黔中宴設將傅近逐其觀察使吳士宗五月庚戌韓全義及吳少誠戰于廣利城敗績壬子徐泗濠節度

使張建封卒其子愔自稱知軍事七月丁巳伊慎及吳少誠戰于申州敗之己未韋臯克吐蕃末恭城丙寅韓全義及吳少誠戰于五樓敗績八月劉濟及其弟涿州刺史源戰于涿州源敗執之己丑殺遂州別駕崔位韋臯克吐蕃顯城九月庚戌貶鄭餘慶爲郴州司馬庚申太常卿齊抗爲中書侍郎同中書門下平章事十月辛未殺通州別駕崔河圖是歲京師饑

十七年二月丁酉大雨雹己亥霜乙巳韋臯及吐蕃戰于鹿危山敗之戊申大雨雹震電庚戌大雪兩雹五月壬戌朔日有食之六月丙申寧州軍亂殺其刺史劉南金己亥浙西觀察使李錡殺上封事人崔善貞丁巳成德軍節度使王武俊卒其子士真自稱留後七月隕霜殺菽戊寅吐蕃寇鹽州己丑陷麟州刺史郭鋒死之九月乙亥韋臯敗吐蕃于雅州克木波城是歲嘉王暉薨

十八年七月乙亥罷正衙奏事十二月環王陷驩愛二州

十九年二月己亥安南將王季元逐其經略使裴泰兵馬使趙均敗之三月壬子淮南節度使杜佑檢校司空同中書門下平章事七月己未齊抗罷自正月

不雨至于月甲戌雨閏十月庚戌鹽州將李庭俊反伏誅丁巳崔損薨十二月庚申太常卿高郢為中書侍郎吏部侍郎鄭珣瑜為門下侍郎同中書門下平章事

二十年二月庚戌大雨雹七月癸酉大雨雹冬雨木冰

二十一年正月癸巳皇帝崩于會寧殿年六十四

順宗至德弘道大聖大安孝皇帝諱誦德宗長子也母曰昭德皇后王氏始封宣城郡王大曆十四年六月進封宣王十二月乙卯立為皇太子為人寬仁喜學藝善隸書禮重師傅見輒先拜從德宗幸奉天常執弓矢居左右郃國公主以蠱事得罪太子妃其女也德宗疑之幾廢者屢矣賴李泌保護乃免後侍宴魚藻宮張水嬉綵艦宮人為擢歌眾樂間發德宗驩甚顧太子曰今日何如太子誦詩好樂無荒以為對及裴延齡韋渠牟用事世皆畏其為相太子每候顏色陳其不可故二人者卒不得用貞元二十年太子病風且瘖二十一年正月不能朝是時德宗不豫諸王皆侍左右惟太子臥病不能得見德宗悲傷涕泣

疾有加癸巳德宗崩丙申卽皇帝位于太極殿二月癸卯朝羣臣于紫宸門辛亥吏部侍郎韋執誼爲尙書左丞同中書門下平章事甲子大赦罷宮市民百歲版授下州刺史婦人郡君九十以上佐婦人縣君乙丑罷鹽鐵使月進三月庚午放後宮三百人癸酉放後宮及教坊女妓六百人癸巳立廣陵郡王純爲皇太子四月壬寅封弟諤爲欽王誠珍王進封子建康郡王經郟王洋川郡王緯均王臨淮郡王縱淑王弘農郡王紆莒王漢東郡王綱密王晉陵郡王總郇王高平郡王約邵王雲安郡王結宋王宣城郡王緡集王德陽郡王絳冀王河東郡王綺和王封子絢爲衡王纁會王縮福王紘撫王緄岳王紳袁王綸桂王纁翼王戊申以冊皇太子降死罪以下賜文武官子爲父後者勳兩轉七月辛卯橫海軍節度使程懷信卒其子執恭自稱留後乙未皇太子權句當軍國政事太常卿杜黃裳爲門下侍郎左金吾衛大將軍袁滋爲中書侍郎同中書門下平章事鄭珣瑜高郢罷

承貞元年八月庚子立皇太子爲皇帝自稱曰太上皇辛丑改元降死罪以下

立良娣王氏爲太上皇后元和元年正月皇帝率羣臣上尊號曰應乾聖壽太上皇是月崩于咸寧殿年四十六諡曰至德大聖大安孝皇帝大中三年增諡至德弘道大聖大安孝皇帝

憲宗昭文章武大聖至神孝皇帝諱純順宗長子也母曰莊憲皇太后王氏貞元四年六月己亥封廣陵郡王二十一年三月立爲皇太子永貞元年八月順宗詔立爲皇帝乙巳卽皇帝位于太極殿丁未始聽政庚戌罷獻祥瑞癸丑劍南西川節度使韋臯卒行軍司馬劉闢自稱留後戊午天有聲于西北己未袁滋爲劍南西川山南西道安撫大使癸亥尙書左丞鄭餘慶同中書門下平章事九月己巳罷教坊樂工正員官十月丁酉爲曾太皇太后舉哀賈耽薨戊戌舒王誼薨袁滋罷己酉葬神武聖文皇帝于崇陵十一月己巳祔睿真皇后于元陵寢宮壬申貶韋執誼爲崖州司馬夏綏銀節度留後楊惠琳反十二月壬戌中書舍人鄭絪爲中書侍郎同中書門下平章事

元和元年正月丁卯大赦改元賜文武官階勳爵民高年者米帛羊酒癸未長

武城使高崇文爲左神策行營節度使率左右神策京西行營兵馬使李元奕
山南西道節度使嚴礪劍南東川節度使李康以討劉闢甲申太上皇崩劉闢
陷梓州執李康三月丙子高崇文克梓州辛巳楊惠琳伏誅四月丁未杜佑爲
司徒壬戌邵王約薨初令尙書省六品諸司四品以上職事官太子師傅賓客
詹事王府傅日二人待制五月辛卯尊母爲皇太后六月癸巳降死罪以下賜
百姓有父母祖父母八十以上者粟二斛物二段九十以上粟三斛物三段丙
申大風拔木丁酉高崇文及劉闢戰于鹿頭柵敗之癸卯嚴礪又敗之于石碑
谷閏月壬戌平盧軍節度使李師古卒其弟師道自稱留後七月壬寅葬至德
大聖大安孝皇帝于豐陵癸丑高崇文及劉闢戰于玄武敗之八月丁卯進封
子平原郡王寧爲鄧王同安郡王寬禮王延安郡王宥遂王彭城郡王察深王
高密郡王寰洋王文安郡王寮絳王封子審爲建王九月丙午嚴礪及劉闢戰
于神泉敗之辛亥高崇文克成都十月甲子滅劍南東西川山南西道今歲賦
釋脅從將吏葬陣亡者廩其家五歲戊子劉闢伏誅十一月庚戌鄭餘慶罷是

歲召王偲薨

二年正月己丑朝獻于太清宮庚寅朝享于太廟辛卯有事于南郊大赦賜文武官勳爵文宣公二王後三恪公主諸王一子官高年米帛羊酒加版授乙巳杜黃裳罷己酉御史中丞武元衡爲門下侍郎中書舍人李吉甫爲中書侍郎同中書門下平章事二月己巳罷兩省官次對癸酉邕管經略使路恕敗黃洞蠻執其首領黃承慶九月乙酉密王綢薨十月鎮海軍節度使李錡反殺留後王澹乙丑淮南節度使王鏐爲諸道行營兵馬招討使以討之丁卯武元衡罷癸酉鎮海軍兵馬使張子良執李騎己卯免潤州今歲稅十一月甲申李錡伏誅十二月丙寅劍南西川節度使高崇文爲邠寧節度京西諸軍都統

三年正月癸巳羣臣上尊號曰睿聖文武皇帝大赦罷諸道受代進奉錢三月癸巳郇王總薨四月壬申大風壞含元殿西闕檻六月西原蠻首領黃少卿降七月辛巳朔日有食之九月庚寅山南東道節度使于頔爲司空同中書門下平章事丙申戶部侍郎裴均爲中書侍郎同中書門下平章事戊戌李吉甫罷

四年正月壬午免山南東道淮南江西浙東湖南荆南今歲稅戊子簡王遘薨
二月丁卯鄭綬罷給事中李藩爲門下侍郎同中書門下平章事三月乙酉成
德軍節度使王士真卒其子承宗自稱留後閏月己酉以旱降京師死罪非殺
人者禁刺史境內權率諸道旨條外進獻嶺南黔中福建掠良民爲奴婢者省
飛龍殿馬己未兩丁卯立鄧王寧爲皇太子七月癸亥吐蕃請和八月丙申環
王寇安南都護張舟敗之十月辛巳成德軍節度使王承宗反執保信軍節度
使薛昌朝癸未左神策軍護軍中尉吐突承璀爲左右神策河陽浙西宣歙鎮
州行營兵馬招討處置使以討之戊子承璀爲鎮州招討宣慰使癸巳降死罪
以下賜文武官子爲父後者勳兩轉十一月己巳彰義軍節度使吳少誠卒其
弟少陽自稱留後

五年正月己巳左神策軍大將軍鄺定進及王承宗戰死之三月甲子大風拔
木四月丁亥河東節度使范希朝義武軍節度使張茂昭及王承宗戰于木刀
溝敗之七月丁未赦王承宗乙卯幽州盧龍軍節度使劉濟卒其子總自稱留

後九月丙寅太常卿權德輿爲禮部尙書同中書門下平章事十月張茂昭以
易定二州歸于有司辛巳義武軍都虞候楊伯玉反伏誅是月義武軍兵馬使
張佐元反伏誅十一月甲辰會王纁薨庚申裴增罷

六年正月庚申淮南節度使李吉甫爲中書侍郎同中書門下平章事二月壬
申李藩罷己丑忻王造薨三月戊戌有星隕于鄆州十二月己丑戶部侍郎李
絳爲中書侍郎同中書門下平章事閏月辛卯辰瀨州首領張伯靖反寇播費
二州辛亥皇太子薨

七年正月癸酉振武河溢毀東受降城四月癸巳詔民田晦樹桑二六月癸巳
杜佑罷七月乙亥立遂王宥爲皇太子八月戊戌魏博節度使田季安卒其子
懷諫自稱知軍府事九月京師地震十月乙未魏博軍以田季安之將田興知
軍事庚戌降死罪以下賜文武官子爲父後者勳兩轉是月魏博節度使田興
以六州歸于有司十一月辛酉赦魏博貝衛澶相六州給復一年賜高年孤獨
廢疾粟帛賞軍士

八年正月辛未權德輿罷二月丁酉貶于頔爲恩王傅三月甲子劍南西川節度使武元衡爲門下侍郎同中書門下平章事四月己亥黔中經略使崔能討張伯靖五月癸亥荆南節度使嚴綬討伯靖丁丑大隗山崩六月辛卯渭水溢辛丑出宮人七月己巳劍南東川節度使潘孟陽討張伯靖八月辛巳湖南觀察使柳公綽討伯靖丁未伯靖降十二月庚寅振武將楊遵憲反逐其節度使李進賢

九年二月癸卯李絳罷三月丙辰嵩州地震丁卯隕霜殺桑五月乙丑桂王綸薨癸酉以旱免京畿夏稅六月壬寅河中節度使張弘靖爲刑部尚書同中書門下平章事閏八月丙辰彰義軍節度使吳少陽卒其子元濟自稱知軍事九月丁亥山南東道節度使嚴綬忠武軍都知兵馬使李光顏壽州團練使李文通河陽節度使烏重胤討之十月太白晝見丙午李吉甫薨甲子嚴綬爲申光蔡招撫使十一月戊子罷京北府獵獻狐兔十二月詔刑部大理官朔望入對戊辰尚書右丞韋貫之同中書門下平章事

十年正月乙酉宣武軍節度使韓弘爲司徒二月甲辰嚴綬及吳元濟戰于磁丘敗績自冬不雨至于是月丙午雪壬戌河東戍將劉輔殺豐州刺史燕重珣伏誅三月庚子忠武軍節度使李光顏及吳元濟戰于臨潁敗之四月甲辰又敗之于南頓五月丙申又敗之于時曲六月癸卯盜殺武元衡戊申京師大索乙丑御史中丞裴度爲中書侍郎同中書門下平章事七月甲戌王承宗有罪絕其朝貢八月己亥朔日有食之丁未李師道將訾嘉珍反于東都留守呂元膺敗之乙丑李光顏及吳元濟戰于時曲敗績九月癸酉韓弘爲淮西行營兵馬都統十月地震十一月壬申李光顏烏重胤及吳元濟戰于小澗河敗之丁丑李文通又敗之于固始戊寅盜焚獻陵寢宮十二月甲辰武寧軍都押衙王智興及李師道戰于平陰敗之是歲丹王逾薨

十一年正月己巳張弘靖罷乙亥幽州盧龍軍節度使劉總及王承宗戰于武彊敗之癸未免鄰賊州二歲稅甲申盜斷建陵門戟二月庚子王承宗焚蔚州乙巳中書舍人李逢吉爲門下侍郎同中書門下平章事乙丑地震三月庚午

皇太后崩四月庚子李光顏烏重胤及吳元濟戰于凌雲柵敗之乙卯劉總及王承宗戰于深州敗之己未免京畿二歲逋稅五月丁卯宥州軍亂逐其刺史駱怡夏綏銀節度使田緡敗之丁亥雲南蠻寇安南六月密州海溢甲辰唐鄧節度使高霞寓及吳元濟戰于鐵城敗績七月壬午韓弘及元濟戰于郾城敗之丙戌免淮西鄰賊州夏稅八月甲午渭水溢壬寅韋貫之罷戊申西原蠻陷賓蠻二州己未昭義軍節度使鄒士美及王承宗戰于柏鄉敗之庚申葬莊憲皇太后于豐陵十一月乙丑邕管經略使韋悅克賓蠻二州甲戌元陵火十二月丁未翰林學士工部侍郎王涯爲中書侍郎同中書門下平章事己未西原蠻陷巖州是冬桃李華

十二年正月丁丑地震戊子有彗星出于畢四月辛卯唐鄧節度使李愬及吳元濟戰于嵯岬山敗之乙未李光顏又敗之于郾城五月辛酉李愬又敗之于張柴七月丙辰裴度爲淮西宣慰處置使戶部侍郎崔羣爲中書侍郎同中書門下平章事八月癸亥烏重胤及吳元濟戰于賈店敗績九月丁未李逢吉

罷甲寅李愬及吳元濟戰于吳房敗之十月癸酉克蔡州甲戌淮南節度使李
鄴爲門下侍郎同中書門下平章事甲申給復淮西二年免旁州來歲夏稅葬
戰士稟其家五年十一月丙戌吳元濟伏誅甲午恩王連薨是歲容管經略使
陽旻克欽橫潯貴四州

十三年正月乙酉大赦免元和二年以前逋負賜高年米帛羊酒三月戊戌御
史大夫李夷簡爲門下侍郎同中書門下平章事李鄴罷己酉橫海軍節度使
程權以滄景二州歸于有司權朝于京師四月甲寅王承宗獻德棣二州庚辰
赦承宗六月癸丑朔日有食之癸亥給復德棣滄景四州一年辛未淮水溢七
月乙酉宣武魏博義成橫海軍討李師道辛丑李夷簡罷八月壬子王涯罷九
月甲辰戶部侍郎皇甫鏞諸道鹽鐵轉運使程异爲工部侍郎同中書門下平
章事十月壬戌吐蕃寇宥州靈武節度使杜叔良敗之于定遠城十一月丁亥
命山人柳泌爲台州刺史以求藥十二月庚戌迎佛骨于鳳翔

十四年正月丙午田弘正及李師道戰于陽穀敗之二月戊午師道伏誅四月

辛未程异薨丙子裴度罷七月戊寅韓弘以汴宋亳潁四州歸于有司弘朝于京師己丑羣臣上尊號曰元和聖文神武法天應道皇帝大赦賜文武官階勳爵遣黜陟使于天下辛卯沂海將王弁殺其觀察使王遂自稱留後丁酉河陽節度使令狐楚爲中書侍郎同中書門下平章事八月己酉韓弘爲中書令九月戊寅王弁伏誅十月壬戌安南將楊清殺其都護李象古以反癸酉吐蕃寇鹽州十一月辛卯朔方將史敬奉及吐蕃戰于瓠蘆河敗之十二月乙卯崔羣罷

十五年正月宦者陳弘志等反庚子皇帝崩年四十三諡曰聖神章武孝皇帝
大中三年加諡昭文章武大聖至神孝皇帝

贊曰德宗猜忌刻薄以彊明自任恥見屈於正論而忘受欺於姦諛故其疑蕭復之輕己謂姜公輔爲賣直而不能容用盧杞趙贊則至於敗亂而終不悔及奉天之難深自懲艾遂行姑息之政由是朝廷益弱而方鎮愈彊至於唐亡其患以此憲宗剛明果斷自初卽位慨然發憤志平僭叛能用忠謀不惑羣議卒

唐書卷七考證

德宗紀貞元元年八月丙戌李希烈殺宣慰使顏真卿○

臣西

按舊書在元年

正月本傳在興元元年八月

憲宗紀元和九年閏八月丙辰吳少陽卒其子元濟自稱知軍事九月丁亥山

南東道節度使嚴綬忠武軍都知兵馬使李光顏壽州團練使李文通河陽

節度使烏重胤討之○

臣西

按本傳少陽之死亦在九月且討淮西之詔在

十月甲子不應九月先命將也新書少陽之死在閏八月及此丁亥命嚴綬

之文疑皆誤

唐書卷七考證

唐書卷八

宋 翰 林 學 士 歐 陽 修 撰

本紀第八

穆宗睿聖文惠孝皇帝諱恆憲宗第三子也母曰懿安皇太后郭氏始封建安郡王進封遂王遙領彰義軍節度使元和七年惠昭太子薨左神策軍中尉吐突承瓘欲立澧王憚而憚母賤不當立乃立遂王爲皇太子十五年正月庚子憲宗崩陳弘志殺吐突承瓘及澧王辛丑遺詔皇太子卽皇帝位于柩前司空兼中書令韓弘攝冢宰閏月丙午皇太子卽皇帝位于太極殿丁未貶皇甫鏞爲崖州司戶參軍戊申始聽政辛亥御史中丞蕭俛中書舍人翰林學士段文昌爲中書侍郎同中書門下平章事乙卯尊母爲皇太后戊辰京師地震二月丁丑大赦賜文武官階爵高年粟帛二王後三恪文宣公嗣王公主縣主武德配饗及第一等功臣家子一子官放沒掖庭者幸丹鳳門觀俳優丁亥幸左神策軍觀角觝倡戲乙未吐蕃寇靈州丙申丹王逾薨三月乙巳杜叔良及吐蕃

戰敗之戊辰大風雨雹辛未楊清伏誅五月庚申葬聖神章武孝皇帝于景陵
六月丁丑韓弘罷七月丁卯令狐楚罷八月乙酉容管經略留後嚴公素及黃
洞蠻戰于神步敗之戊戌御史中丞崔植爲中書侍郎同中書門下平章事九
月辛丑觀競渡角觝于魚藻宮用樂十月庚辰王承宗卒辛巳成德軍觀察支
使王承元以鎮趙深冀四州歸于有司癸未吐蕃寇涇州右神策軍中尉梁守
謙爲左右神策京西北行營都監以禦之丙戌吐蕃遁十一月癸卯赦鎮趙
深冀四州死罪以下賜成德軍將士錢十二月庚辰獵于城南壬午擊鞠于右
神策軍遂獵于城西甲申獵于苑北
長慶元年正月己亥朝獻于太清宮庚子朝享于太廟辛丑有事于南郊大赦
改元賜文武官階勳爵己未有星孛于翼壬戌蕭俛罷丁卯有星孛于太微二
月乙亥觀樂于麟德殿丙子觀神策諸軍雜伎己卯劉總以盧龍軍八州歸于
有司壬午段文昌罷翰林學士戶部侍郎杜元穎同中書門下平章事辛卯擊
鞠于麟德殿三月庚戌太白晝見丁巳赦幽涿檀順瀛莫管平八州死罪以下

給復一年賜盧龍軍士錢戊午封弟憬爲鄜王悅瓊王恂沔王懌婺王愔茂王
怡光王協淄王憺衢王忱澶王子湛爲鄂王涵江王湊漳王溶安王瀍潁王是
月徙封湛爲景王五月丙辰建王審薨六月有彗星出于昴辛未吐蕃寇青塞
烽鹽州刺史李文悅敗之七月甲辰幽州盧龍軍都知兵馬使朱克融囚其節
度使張弘靖以反壬子羣臣上尊號曰文武孝德皇帝大赦賜文武官階勳爵
壬戌成德軍大將王廷湊殺其節度使田弘正以反八月壬申朱克融陷莫州
癸酉王廷湊陷冀州刺史王進岌死之丙子瀛州軍亂執其觀察使盧士攻叛
附于朱克融王廷湊寇深州丁丑魏博橫海昭義河東義武兵討王廷湊己丑
裴度爲幽鎮招撫使九月乙巳相州軍亂殺其刺史邢澹十月丙寅諸道鹽鐵
轉運使刑部尚書王播爲中書侍郎同中書門下平章事裴度爲鎮州西面行
營都招討使左領軍衛大將軍杜叔良爲深州諸道行營節度使戊寅王廷湊
陷貝州己卯易州刺史柳公濟及朱克融戰于白石敗之庚辰橫海軍節度使
烏重胤及王廷湊戰于饒陽敗之辛卯靈武節度使李進誠及吐蕃戰于大石

山敗之十一月甲午裴度及王廷湊戰于會星敗之丙申朱克融寇定州義武軍節度使陳楚敗之十二月庚午杜叔良及王廷湊戰于博野敗績丁丑陳楚及朱克融戰于望都敗之乙酉赦朱克融己丑陳楚及克融戰于清源敗之

二年正月庚子魏博軍潰于南宮癸卯魏博節度使田布自殺兵馬使史憲誠自稱留後海州海冰二月甲子赦王廷湊辛巳崔植罷工部侍郎元稹同中書門下平章事戊子昭義軍節度使劉悟囚其監軍使劉承偕二月乙巳武寧軍節度副使王智興逐其節度使崔羣戊午守司徒淮南節度使裴度同中書門下平章事王播罷四月辛酉朔日有食之壬戌成德軍節度使牛元翼奔于京師王廷湊陷深州五月壬寅邕州刺史李元宗叛奔于黃洞蠻六月癸亥宣武軍宿直將李臣則逐其節度使李愿衙門都將李汭反甲子裴度元稹罷兵部尚書李逢吉爲門下侍郎同中書門下平章事乙丑大風落太廟鴟尾癸酉吐蕃寇靈州鹽州刺史趙旰敗之七月丙申宋王結薨戊申李汭陷宋州丙辰兗鄆節度使曹華及李汭戰于宋州敗之丁巳忠武軍節度使李光顏又敗之于

尉氏八月壬申宣武軍節度使韓充又敗之于郭橋丙子李齊伏誅癸未詔瘞
汴宋鄭三州戰亡者稟其家三歲九月戊子鎮海軍將王國清謀反伏誅丙申
德州軍亂殺其刺史王稷十月己卯獵于咸陽十一月庚午皇太后幸華清宮
癸酉迎皇太后遂獵于驪山丙子集王湘薨十二月丁亥不豫放五坊鷹隼及
供獵狐兔癸巳立景王湛爲皇太子癸丑降死罪以下賜文武常參及州府長
官子爲父後者勳兩轉宗子諸親一轉是冬無冰草木萌

三年三月壬戌御史中丞牛僧孺爲戶部侍郎同中書門下平章事癸亥淮南
浙東西江西宣歙旱遣使宣撫理繫囚察官吏四月甲午陸州獠反五月壬申
京師雨雹七月丙寅黃洞蠻陷欽州九月壬子朔日有食之十月己丑杜元穎
罷辛卯黃洞蠻寇安南

四年正月辛亥降死罪以下減流人一歲賜文武官及宗子賀正使階勳爵詔
百官言事辛未以皇太子權句當軍國政事壬申皇帝崩于清思殿年三十

敬宗睿武昭愍孝皇帝諱湛穆宗長子也母曰恭僖皇太后王氏始封鄂王徙

封景王長慶二年十二月穆宗因擊毬暴得疾不見羣臣者三日左僕射裴度
三上疏請立皇太子而翰林學士兩省官相次皆以爲言居數日穆宗疾少間
宰相李逢吉請立景王爲皇太子四年正月穆宗崩癸酉門下侍郎平章事李
逢吉攝冢宰丙子皇太子卽皇帝位于太極殿二月辛巳始聽政癸未尊母爲
皇太后皇太后爲太皇太后辛卯放掖庭內園沒入者丁未擊鞠于中和殿戊
申擊鞠于飛龍院黃洞蠻降己酉擊鞠用樂三月壬子大赦免京畿河南青苗
稅減宮禁經費乘輿服膳罷貢鷹犬元和以來兩河藩鎮歸地者予一子官庚
午太白經天四月丙申擊鞠于清思殿染坊匠張韶反幸左神策軍韶伏誅丁
酉還宮五月乙卯吏部侍郎李程戶部侍郎判度支竇易直同中書門下平章
事六月庚辰大風壞延喜景風門是夏漢水溢八月丁亥太白晝見丁酉中官
李文德謀反伏誅黃洞蠻寇安南十一月戊午環王反黃洞蠻陷陸州刺史葛
維死之庚申葬睿聖文惠孝皇帝于光陵

寶曆元年正月己酉朝獻于太清宮庚戌朝享于太廟辛亥有事于南郊大赦

改元乙卯牛僧孺罷四月癸巳羣臣上尊號曰文武大聖廣孝皇帝大赦賜文武官階爵五月庚戌觀競渡于魚藻宮九月壬午昭義軍節度使劉悟卒其子從諫自稱留後十一月丙申封子普爲晉王

二年正月甲戌發神策六軍穿池于禁中二月丁未山南西道節度使裴度守司空同中書門下平章事三月戊寅觀競渡于魚藻宮四月戊戌橫海軍節度使李全略卒其子同捷反五月戊寅觀競渡于魚藻宮庚辰幽州盧龍軍亂殺其節度使朱克融其子廷嗣自稱節度使六月辛酉觀漁于臨碧池甲子觀驢鞠角觝于三殿七月癸未衡王絢薨以泜陂隸尙食禁民漁八月丙午觀競渡于新池九月甲戌觀百戲于宣和殿三日而罷戊寅幽州盧龍軍兵馬使李載義殺朱延嗣自稱留後壬午李程罷十一月甲申李逢吉罷己丑禁朝官方鎮置私白身十二月中官劉克明反辛丑皇帝崩年十八

文宗元聖昭獻孝皇帝諱昂穆宗第二子也母曰貞獻皇太后蕭氏始封江王寶曆二年十二月敬宗崩劉克明等矯詔以絳王悟尙當軍國事壬寅內樞密

使王守澄楊承和神策護軍中尉魏從簡梁守謙奉江王而立之率神策六軍飛龍兵誅克明殺絳王乙巳江王卽皇帝位于宣政殿戊申始聽政尊母爲皇太后庚戌兵部侍郎翰林學士韋處厚爲中書侍郎同中書門下平章事庚申出宮人三千省教坊樂工翰林技術冗員千二百七十人縱五坊鷹犬停貢纂組雕鏤金筐寶飾牀榻

太和元年二月乙巳大赦改元免京兆今歲夏稅半賜九廟陪位者子孫二階立功將士階爵始封諸王後予一子出身五月戊辰罷宰臣奏事監搜丙子橫海軍節度使烏重胤討李同捷六月癸巳淮南節度副大使王播爲尙書左僕射同中書門下平章事乙卯以旱降京畿死罪以下七月癸酉葬睿武昭愍孝皇帝于莊陵十一月庚辰橫海軍節度使李寰討李同捷十二月庚戌王智興爲滄州行營招撫使

二年正月壬申地震六月乙卯晉王普薨己巳大風拔木乙亥峰州刺史王昇朝反伏誅是夏河溢壞棣州城越州海溢七月辛丑魏博節度使史憲誠及同

捷戰于平原敗之甲辰有彗星出于右攝提八月己巳王廷湊反壬申義武軍節度使柳公濟及廷湊戰于新樂敗之己卯劉從諫又敗之于臨城辛巳史憲誠及李同捷戰于平原敗之癸未劉從諫及王廷湊戰于昭慶敗之九月癸卯柳公濟又敗之于博野丁未岳王緄薨庚戌安南軍亂逐其都護韓約十月庚申史憲誠及李同捷戰于平原敗之丁卯洋王忻薨癸酉竇易直罷戊寅史憲誠及李同捷戰于平原敗之壬午幽州盧龍軍節度使李載義又敗之于長蘆十一月壬辰給復棣州一年稟戰士創廢者終身甲辰昭德寺火十二月乙丑魏博行營兵馬使丁志沼反壬申韋處厚薨戊寅兵部侍郎翰林學士路隋爲中書侍郎同中書門下平章事

三年正月丁亥宣武河陽兵討丁志沼庚子志沼奔于鎮州三月乙酉罷教坊日直樂工乙巳以太原兵馬使傅毅爲義武軍節度使義武軍不受命都知兵馬使張璠自稱節度使戊申以璠爲義武軍節度使四月戊辰滄景節度使李祐克德州李同捷降乙亥滄德宣慰使柏耆以同捷歸于京師殺之于將陵五

月辛卯給復滄景德棣四州一年六月甲戌魏博軍亂殺其節度使史憲誠都知兵馬使何進滔自稱留後八月辛亥以相衛澶三州隸相衛節度使進滔不受命辛酉以旱免京畿九縣今歲租壬申赦王廷湊甲戌吏部侍郎李宗閔同中書門下平章事十月癸丑仗內火十一月壬辰朝獻于太清宮癸巳朝享于太廟甲午有事于南郊大赦詔毋獻難成非常之物焚絲布撩綾機杼是月雲南蠻陷巽邛二州十二月丁未鄂岳襄鄧忠武軍伐雲南蠻庚戌雲南蠻寇成都右領軍衛大將軍董重質爲左右神策及諸道行營西川都知兵馬使以伐之己未雲南蠻寇梓州壬戌寇蜀州

四年正月戊子封子永爲魯王辛卯武昌軍節度使牛僧孺爲兵部尙書同中書門下平章事甲午王播薨二月乙卯興元軍亂殺其節度使李絳三月癸卯禁京畿弋獵四月丁未奚寇邊李載義敗之六月丁未裴度平章軍國重事是夏舒州江溢七月癸未尙書右丞宋申錫同中書門下平章事九月壬午裴度

罷

五年正月庚申幽州盧龍軍亂逐其節度使李載義殺莫州刺史張慶初兵馬使楊志誠自稱留後三月庚子貶宋申錫爲太子右庶子癸卯降封漳王湊爲巢縣公六月甲午梓州玄武江盜

六年正月壬子降死罪以下二月蘇州地震生白毛五月庚申給民疫死者棺十歲以下不能自存者二月糧七月戊申原王逵薨十一月甲子立魯王永爲皇太子十二月乙丑牛僧孺罷己巳珍王誠薨

七年正月壬辰罷吳蜀冬貢茶二月丙戌兵部尙書李德裕同中書門下平章事三月辛卯幽州盧龍軍節度使楊志誠執春衣使邊奉鸞送奚契丹使尹士恭辛丑和王綺薨六月甲戌地震乙亥李宗閔罷七月壬寅尙書右僕射諸道鹽鐵轉運使王涯同中書門下平章事閏月乙卯以旱避正殿減膳徹樂出宮女千人縱五坊鷹犬八月庚寅降死罪以下賜文武及州府長官子爲父後者勳兩轉十二月庚子不豫

八年二月壬午朔日有食之庚寅以疾愈降死罪以下四月丙戌詔答罪毋鞭

背五月己巳飛龍神駒中廐火六月丙戌莒王紆薨七月辛酉震定陵寢宮癸亥鄆王經薨九月辛亥有彗星出于太微十月辛巳幽州盧龍軍大將史元忠逐其節度使楊志誠自稱權句當節度兵馬庚寅山南西道節度使李宗閔爲中書侍郎同中書門下平章事甲午李德裕罷十一月癸丑成德軍節度使王廷湊卒其子元逵自稱權句當節度事丙子莫州軍亂逐其刺史張惟汎十二月己卯降京畿死罪以下

九年正月癸亥巢縣公湊薨三月辛亥冀王綵薨乙卯京師地震四月丙申路隋罷戊戌浙江東道觀察使賈鍊爲中書侍郎同中書門下平章事辛丑大風拔木落舍元殿鴟尾壞門觀五月辛未王涯爲司空六月壬寅貶李宗閔爲明州刺史七月辛亥御史大夫李固言爲門下侍郎同中書門下平章事九月癸亥殺陳弘志丁卯李固言罷己巳御史中丞舒元興爲刑部侍郎翰林學士兵部郎中李訓爲禮部侍郎同中書門下平章事十月辛巳殺觀軍容使王守澄十一月乙巳殺武寧軍監軍使王守涓壬戌李訓及河東節度使王璠邠寧節

度使郭行餘御史中丞李孝本京兆少尹羅立言謀誅中官不克訓奔于鳳翔
甲子尚書右僕射鄭覃同中書門下平章事乙丑權知戶部侍郎李石同中書
門下平章事左神策軍中尉仇士良殺王涯賈餗舒元興李孝本羅立言王璠
郭行餘鳳翔少尹魏逢戍辰晝晦鳳翔監軍使張仲清殺其節度使鄭注己巳
仇士良殺右金吾衛大將軍韓約十二月壬申殺左金吾衛將軍李貞素翰林
學士顧師邕丁亥降京師死罪以下

開成元年正月辛丑朔日有食之大赦改元免太和五年以前逋負京畿今歲
稅賜文武官階爵二月乙亥停獻鷲鳥畋犬三月京師地震四月辛卯淄王協
薨甲午山南西道節度使李固言爲門下侍郎同中書門下平章事七月滹沱
溢乙亥兩土十二月己未淑王縱薨

二年二月丙午有彗星出于東方己未均王緯薨三月丙寅以彗見減膳壬申
素服避正殿徹樂降死罪流以下原之縱五坊鷹隼禁京畿採捕四月戊戌工
部侍郎陳夷行同中書門下平章事乙卯以旱避正殿六月丙午河陽軍亂逐

其節度使李泳己未綿州獠反七月癸亥党項羌寇振武八月庚戌封兄子休復爲梁王執中襄王言揚杞王成美陳王癸丑封子宗儉爲蔣王十月戊申李固言罷十一月乙丑京師地震丁丑有星隕于興元

三年正月甲子盜傷李石戊申大風拔木諸道鹽鐵轉運使戶部尙書楊嗣復戶部侍郎李珣同中書門下平章事丙子李石罷夏漢水溢八月己亥嘉王運薨十月乙酉義武軍節度使張璠卒其子元益自稱留後庚子皇太子薨乙巳有彗星出于軫十一月壬戌降死罪以下

四年正月癸酉有彗星出于羽林閏月丙午出于卷舌五月丙申鄭覃陳夷行罷七月甲辰太常卿崔鄴同中書門下平章事八月辛亥鄜王憬薨十月丙寅立陳王成美爲皇太子甲戌地震十一月己亥降京畿死罪以下十二月乙卯乾陵寢宮火

五年正月戊寅不豫己卯左右神策軍護軍中尉魚弘志仇士良立穎王瀍爲皇太弟權尙當軍國事廢皇太子成美爲陳王庚辰仇士良殺仙韶院副使尉

遲璋辛巳皇帝崩于太和殿年三十三

武宗至道昭肅孝皇帝諱炎穆宗第五子也母曰宣懿皇太后韋氏始封潁王累加開府儀同三司檢校吏部尚書開成五年正月文宗疾大漸神策軍護軍中尉仇士良魚弘志矯詔廢皇太子成美復爲陳王立潁王爲皇太弟辛巳卽皇帝位于柩前辛卯殺陳王成美及安王溶賢妃楊氏甲午始聽政追尊母爲皇太后二月乙卯大赦庚申有彗星出于室壁四月甲子大風拔木五月己卯楊嗣復罷諸道鹽鐵轉運使刑部尚書崔珙同中書門下平章事壬寅大風拔木六月丙寅以旱避正殿理囚河北河南淮南浙東福建蝗疫州除其徭七月戊寅大風拔木八月甲寅雨壬戌葬元聖昭獻孝皇帝于章陵內樞密使劉弘逸薛季稜以兵殺仇士良不克伏誅庚午李珣罷九月丁丑淮南節度副大使李德裕爲門下侍郎同中書門下平章事十月癸卯回鶻寇天德軍十一月戊寅有彗星出于東方魏博節度使何進滔卒其子重霸自稱留後十二月封子峻爲杞王

會昌元年正月己卯朝獻于太清宮庚辰朝享于太廟辛巳有事于南郊大赦
改元三月御史大夫陳夷行爲門下侍郎同中書門下平章事七月有彗星出
于羽林壬辰漢水溢九月癸巳幽州盧龍軍將陳行泰殺其節度使史元忠自
稱知留務閏月幽州盧龍軍將張絳殺行泰自稱主軍務十月幽州盧龍軍逐
絳雄武軍使張仲武入于幽州十一月壬寅有彗星出于營室辛亥避正殿減
膳理囚罷輿作癸亥崔鄆罷

二年正月宋亳二州地震己亥李德裕爲司空回鶻寇橫水柵略天德振武軍
二月丁丑淮南節度副大使李紳爲中書侍郎同中書門下平章事三月回鶻
寇雲朔四月丁亥羣臣上尊號曰仁聖文武至神大孝皇帝大赦賜文武官階
勳爵五月丙申回鶻嗚沒斯降六月陳夷行罷河東節度使劉沔及回鶻戰于
雲州敗績七月幸左神策軍闕武尚書右丞兼御史中丞李讓夷爲中書侍郎
同中書門下平章事嵐州民田滿川反伏誅回鶻可汗寇大同川九月劉沔爲
回鶻南面招撫使幽州盧龍軍節度使張仲武爲東面招撫使右金吾衛大將

軍李思忠爲河西党項都將西南面招討使十月丁卯封子峴爲益王岐克王十一月獵于白鹿原十二月封子嶧爲德王嵯昌王癸未京師地震
三年正月庚子天德軍行營副使石雄及回鶻戰于殺胡山敗之二月庚申朔日有食之辛未崔珙罷是春大雨雪四月乙丑昭義軍節度使劉從諫卒其子稹自稱留後五月甲午震東都廣運樓災辛丑成德軍節度使王元逵爲北面招討澤潞使魏博節度使何弘敬爲東面招討澤潞使及河中節度使陳夷行河陽節度使王茂元劉沔以討劉稹戊申翰林學士承旨中書舍人崔鉉爲中書侍郎同中書門下平章事武寧軍節度使李彥佐爲晉絳行營諸軍節度招討使六月西內神龍寺火辛酉李德裕爲司徒是夏作望仙觀于禁中七月庚子免河東今歲秋稅九月辛卯忠武軍節度使王宰兼河陽行營攻討使丁未以兩霖理囚免京兆府秋稅十月己巳晉絳行營節度使石雄及劉稹戰于烏嶺敗之壬午日中月食太白是月党項羌寇鹽州十一月寇邠寧克王岐爲靈夏六道元帥安撫党項大使御史中丞李回副之安南軍亂逐其經略使武渾

十二月丁巳王宰克天井關

四年正月乙酉河東將楊弁逐其節度使李石二月甲寅朔日有食之辛酉楊弁伏誅三月石雄兼冀氏行營攻討使晉州刺史李丕副之六月己未中書門下御史臺慮囚閏七月壬戌李紳罷淮南節度副大使杜悰爲尚書右僕射兼中書侍郎同中書門下平章事丙子昭義軍將裴閭及邢州刺史崔叡以城降是月洛州刺史王釗磁州刺史安玉以城降八月乙未昭義軍將郭誼殺劉稹以降戊戌給復澤潞邢洛磁五州一歲免太原河陽及懷陝晉絳四州秋稅戊申李德裕爲太尉十月獵于鄠縣十二月獵于雲陽

五年正月己酉羣臣上尊號曰仁聖文武章天成功神德明道大孝皇帝是日朝獻于太清宮庚戌朝享于太廟辛亥有事于南郊大赦賜文武官階勳爵文宣公二王三恪子一子出身作仙臺于南郊庚申皇太后崩三月旱五月壬子葬恭僖皇太后于光陵壬戌杜悰崔鉉罷乙丑戶部侍郎李回爲中書侍郎同中書門下平章事六月甲申作望仙樓于神策軍七月丙午朔日有食之是月

山南東道節度使鄭肅校檢尚書右僕射同中書門下平章事八月壬午大毀佛寺復僧尼爲民十月作昭武廟于虎牢關

六年二月癸酉以旱降死罪以下免今歲夏稅庚辰夏綏銀節度使米暨爲東北道招討党項使三月壬戌不豫左神策軍護軍中尉馬元贄立光王怡爲皇太叔權句當軍國政事甲子皇帝崩于大明宮年三十三

宣宗元聖至明成武獻文睿智章仁神聰懿道大孝皇帝諱忱憲宗第十三子也母曰孝明皇太后鄭氏始封光王性嚴重寡言宮中或以爲不惠會昌六年武宗疾大漸左神策軍護軍中尉馬元贄立光王爲皇太叔三月甲子卽皇帝位于柩前四月乙亥始聽政尊母爲皇太后丙子李德裕罷辛卯李讓夷爲司空五月乙巳大赦翰林學士承旨兵部侍郎白敏中同中書門下平章事辛酉封子溫爲鄆王渼雍王涇雅王滋夔王沂慶王七月李讓夷罷八月辛未大行宮火壬申葬至道昭肅孝皇帝于端陵九月鄭肅罷兵部侍郎判度支盧商爲中書侍郎同中書門下平章事雲南蠻寇安南經略使裴元裕敗之十二月戊

辰朔日有食之

大中元年正月壬子朝獻于太清宮癸丑朝享于太廟甲寅有事于南郊大赦
改元復左降官死者官爵賜文武官階勳父老帛文宣王後及二王後三恪子
一子官二月癸未以旱避正殿減膳理京師囚罷太常教坊習樂損百官食出
宮女五百人放五坊鷹犬停飛龍馬粟三月盧商罷刑部尙書判度支崔元式
爲門下侍郎翰林學士承旨戶部侍郎韋琮爲中書侍郎同中書門下平章事
閏月大復佛寺四月己酉皇太后崩五月張仲武及奚北部落戰敗之吐蕃回
鶻寇河西河東節度使王宰敗之八月丙申李回罷庚子葬貞獻皇太后于光
陵十二月戊午貶太子少保李德裕爲潮州司馬

二年正月甲子羣臣上尊號曰聖敬文思和武光孝皇帝大赦宗子房未仕者
予一人出身賜文武官階勳爵二月封子澤爲濮王五月己未朔日有食之崔
元式罷兵部侍郎判度支周墀刑部侍郎諸道鹽鐵轉運使馬植同中書門下
平章事己卯太皇太后崩七月己巳續圖功臣于凌煙閣十一月壬午葬懿安

太皇太后于景陵貶韋琮爲太子賓客分司東都

三年二月吐蕃以秦原安樂三州石門驛藏木峽制勝六盤石峽蕭七關歸于有司三月詔待制官與刑法官諫官次對馬植罷是春隕霜殺桑四月乙酉周墀罷御史大夫崔鉉爲中書侍郎兵部侍郎判戶部事魏扶同中書門下平章事癸巳幽州盧龍軍節度使張仲武卒其子直方自稱留後五月武寧軍亂逐其節度使李廓十月辛巳京師地震是月振武及天德靈武鹽夏二州地震吐蕃以維州歸于有司十一月己卯封弟惕爲彭王十二月吐蕃以扶州歸于有司

四年正月庚辰大赦四月壬申以雨霖詔京師關輔理囚蠲度支鹽鐵戶部逋負六月戊申魏扶薨戶部尚書判度支崔龜從同中書門下平章事八月幽州盧龍軍亂逐其節度使張直方衙將張允伸自稱留後十月辛未翰林學士承旨兵部侍郎令狐綯同中書門下平章事十一月党項羌寇邠寧十二月鳳翔節度使李安業河東節度使李拭爲招討党項使

五年三月白敏中爲司空招討南山平夏党項行營兵馬都統四月赦平夏党項羌辛未給復靈鹽夏三州邠寧鄜坊等道三歲六月封子潤爲鄂王八月乙巳赦南山党項羌十月沙州人張義潮以瓜沙伊肅鄯甘河西蘭岷廓十一州歸子有司白敏中罷戊辰戶部侍郎判戶部魏謩同中書門下平章事十一月崔龜從罷十二月盜斫景陵門戟是歲湖南饑

六年三月有彗星出于觜參七月雍王渼蕘八月禮部尙書諸道鹽鐵轉運使裴休同中書門下平章事九月獠寇昌資二州十一月封弟惲爲棣王是歲淮南饑

七年正月丙午朝獻于太清宮丁未朝享于太廟戊申有事于南郊大赦

八年正月丙戌朔日有食之三月以旱理囚九月封子洽爲懷王訥昭王汶康王

九年正月甲申成德軍節度使王元逵卒其子紹鼎自稱留後閏四月辛丑禁嶺外民鬻男女者七月以旱遣使巡撫淮南減上供饋運蠲逋租發粟賑民丙

辰崔鉉罷庚申罷淮南宣歙浙西冬至元日常貢以代下戶租稅是月浙江東道軍亂逐其觀察使李訥

十年正月丁巳御史大夫鄭朗爲工部尙書同中書門下平章事九月封子灌爲衛王十月戊子裴休罷十二月壬辰戶部侍郎判戶部崔慎由爲工部尙書同中書門下平章事

十一年二月辛巳魏謩罷五月容管軍亂逐其經略使王球七月庚子兵部侍郎判度支蕭鄴同中書門下平章事成德軍節度副大使王紹鼎卒其弟紹懿自稱留後八月封子灃爲廣王九月乙未彗星出于房十月壬申鄭朗罷

十二年正月戊戌戶部侍郎判度支劉瑑同中書門下平章事二月廢穆宗忌日停光陵朝拜及守陵宮人壬申崔慎由罷閏月自十月不雨至于是月雨三月鹽州監軍使楊玄价殺其刺史劉臯四月庚子嶺南軍亂逐其節度使楊發戊申兵部侍郎諸道鹽鐵轉運使夏侯孜同中書門下平章事五月丙寅劉瑑薨庚辰湖南軍亂逐其觀察使韓琮六月丙申江西都將毛鶴逐其觀察使鄭

憲辛亥南蠻寇邊七月容州將來正反伏誅八月宣歙將康全泰逐其觀察使
鄭薰淮南節度使崔鉉兼宣歙池觀察處置使以討之丁巳太原地震十月康
全泰伏誅十二月毛鶴伏誅甲寅兵部侍郎判戶部蔣伸同中書門下平章事
十三年正月戊午大赦蠲度支戶部逋負放宮人八月壬辰左神策軍護軍中
尉王宗實立鄆王溫爲皇太子權句當軍國政事癸巳皇帝崩于咸寧殿年五
十諡曰聖武獻文孝皇帝咸通十三年加諡元聖至明成武獻文睿智章仁神
聰懿道大孝皇帝

贊曰春秋之法君弑而賊不討則深責其國以爲無臣子也憲宗之弑歷三世
而賊猶在至於文宗不能明弘志等罪惡以正國之典刑僅能殺之而已是可
歎也穆敬童昏失德以其在位不久故天下未至於敗亂而敬宗卒及其身是
豈有討賊之志哉文宗恭儉儒雅出於天性嘗讀太宗政要慨然慕之及卽位
銳意於治每延英對宰臣率漏下十一刻唐制天子以隻日視朝乃命輟朝放
朝皆用雙日凡除吏必召見訪問親察其能否故太和之初政事脩飭號爲清

明然其仁而少斷承父兄之弊宦官撓權制之不得其術故其終困以此甘露之事禍及忠良不勝冤憤歛恨而已由是言之其能殺弘志亦足伸其志也昔武丁得一傅說爲商高宗武宗用一李德裕遂成其功烈然其奮然除去浮圖之法甚銳而躬受道家之籙服藥以求長年以此見其非明智之不惑者特好惡有不同爾宣宗精於聽斷而以察爲明無復仁恩之意嗚呼自是而後唐衰矣

唐書卷八

Blank page with vertical lines for text.

唐書卷八考證

宣宗紀大中九年七月浙西東道軍亂逐觀察使李訥○
臣西按舊書十年正月始書李訥爲浙東觀察使未詳孰是

唐書卷八考證

書卷八

代故書李誠德清原真真對未始歸吳

宣統元年六月十日民德西原真真對未始歸吳 ○ 宣統元年五月

書卷八

唐書卷九

宋 翰 林 學 士 歐 陽 修 撰

本紀第九

懿宗昭聖恭惠孝皇帝諱灌宣宗長子也母曰元昭皇太后鼂氏始封鄆王宣宗愛夔王滋欲立爲皇太子而鄆王長故久不決大中十三年八月宣宗疾大漸以夔王屬內樞密使王歸長馬公儒宣徽南院使王居方等而左神策護軍中尉王宗實副使丁元實矯詔立鄆王爲皇太子癸巳卽皇帝位于柩前王宗實殺王歸長馬公儒王居方庚子始聽政癸卯令狐綯爲司空尊皇太后曰太皇太后九月庚申追尊母爲皇太后十月辛卯大赦賜文武官階勳爵耆老粟帛十一月戊午蕭鄴罷十二月甲申翰林學士承旨兵部侍郎杜審權同中書門下平章事丁酉令狐綯罷荆南節度使白敏中爲司徒兼門下侍郎同中書門下平章事是歲雲南蠻陷播州

咸通元年正月浙東人仇甫反安南經略使王式爲浙江東道觀察使以討之

二月丙申葬聖武獻文孝皇帝于貞陵五月京師地震袁王紳薨七月封叔恂
爲信王八月衛王灌薨己卯仇甫伏誅九月戊申白敏中爲中書令十月安南
都護李鄠克播州己亥夏侯孜罷戶部尙書判度支畢誠爲禮部尙書同中書
門下平章事閏月乙亥朝獻于太清宮十一月丙子朝享于太廟丁丑有事于
南郊大赦改元是月慶王沂薨十二月戊申雲南蠻寇安南癸亥福王綰爲司
空

二年二月白敏中罷尙書左僕射判度支杜悰兼門下侍郎同中書門下平章
事福王綰薨六月鹽州刺史王寬爲安南經略招討使八月雲南蠻寇邕州九
月寇蘄州

三年正月庚午羣臣上尊號曰睿文明聖孝德皇帝大赦是月蔣伸罷二月庚
子杜悰爲司空是月棟王惲薨湖南觀察使蔡襲爲安南經略招討使三月戊
寅歸義軍節度使張義潮克涼州七月武寧軍亂逐其節度使溫璋劍南西川
節度使夏侯孜爲尙書左僕射兼門下侍郎同中書門下平章事九月嶺南西

道軍亂逐其節度使蔡京十月丙申封子佾爲魏王佖涼王佶蜀王杜悰爲司徒十一月封叔祖緝爲蘄王叔憤榮王雲南蠻寇安南丙寅降囚罪免徐州秋稅十二月翼王縉薨

四年正月戊辰朝獻于太清宮己巳朝享于太廟庚午有事于南郊大赦雲南蠻陷安南蔡襲死之庚辰撫王紘爲司空二月拜十六陵秦州經略使高駢爲安南經略招討使四月畢誠罷五月己巳翰林學士承旨兵部侍郎楊收同中書門下平章事戊子杜審權罷閏六月杜悰罷兵部侍郎判度支曹確同中書門下平章事七月辛卯朔日有食之免安南戶稅丁錢二歲弛廉州珠池禁八月夔王滋薨十二月乙酉昭義軍亂殺其節度使沈詢

五年正月丙午雲南蠻寇嶺州三月寇邕州四月兵部侍郎判戶部蕭寘同中書門下平章事五月丁酉瘞邕嶺州死事者己亥有彗星出于婁八月丁卯夏侯孜爲司空十月貞陵隧陷十一月戊戌夏侯孜罷壬寅翰林學士承旨兵部侍郎路巖同中書門下平章事

六年三月蕭寘薨四月劍南東川節度使高瓌爲兵部侍郎同中書門下平章事五月高駢及雲南蠻戰于邕州敗之六月高瓌薨御史大夫徐商爲兵部侍郎同中書門下平章事七月封子侃爲郢王十二月晉絳二州地震壬子太皇太后崩

七年二月戊申免河南府同華陝號四州一歲稅湖南及桂邕容三管岳州夏秋稅之半三月成德軍節度使王紹懿卒其兄子景崇自稱留後閏月吐蕃寇邠寧五月甲辰葬孝明太皇太后于景陵之園六月魏博節度使何弘敬卒其子全皞自稱留後八月辛卯晝晦十月壬申楊收罷是月高駢克安南十一月辛亥大赦免咸通三年以前逋負賜文武官階勳爵

八年正月丁未河中府晉絳二州地震五月丙辰以不豫降囚罪出宮人五百縱神策五坊飛龍鷹鷄禁延慶端午節獻女口七月雨湯于下邳壬寅斬王緝薨乙巳懷州民亂逐其刺史劉仁規甲子兵部侍郎諸道鹽鐵轉運使于琮同中書門下平章事十一月辛丑疾愈避正殿賜民年七十而痼疾及軍士戰傷

者帛十二月信王恹薨

九年正月彗星出于婁胃七月武寧軍節度糧料判官龐勛反于桂州十月庚午陷宿州丁丑陷徐州觀察使崔彥曾死之十一月陷濠州刺史盧望回死之右金吾衛大將軍康承訓爲徐泗行營兵馬都招討使神武大將軍王晏權爲北面招討使羽林將軍戴可師爲南面招討使十二月龐勛陷和滁二州滁州刺史高錫望死之壬申戴可師及龐勛戰于都梁山死之是月前天雄軍節度使馬舉爲南面招討使泰寧軍節度使曹翔爲北面招討使

十年二月殺驩州流人楊收三月徙封侃爲威王四月殺鎮南軍節度使嚴譔康承訓及龐勛戰于柳子敗之六月神策軍將軍宋威爲西北面招討使戊戌以蝗旱理囚癸卯徐商罷翰林學士承旨戶部侍郎劉瞻同中書門下平章事八月有彗星出于大陵九月癸酉龐勛伏誅十月戊戌免徐宿濠泗四州三歲稅役十二月壬子雲南蠻寇嘉州

十一年正月甲寅羣臣上尊號曰睿文英武明德至仁大聖廣孝皇帝大赦雲

南蠻寇黎雅二州及成都二月甲申劍南西川節度副使王建立及雲南蠻戰于城北死之甲午劍南東川節度使顏慶復及雲南蠻戰于新都敗之三月曹確罷四月丙午翰林學士承旨兵部侍郎韋保衡同中書門下平章事八月殺醫待詔韓宗紹魏博軍亂殺其節度使何全皞其將韓君雄自稱留後九月丙辰劉瞻罷十一月辛亥禮部尚書判度支王鐸同中書門下平章事

十二年四月癸卯路巖罷五月庚申理囚十月兵部侍郎諸道鹽鐵轉運使劉鄴爲禮部尚書同中書門下平章事

十三年二月丁巳于琮罷刑部侍郎判戶部趙隱爲戶部侍郎同中書門下平章事幽州盧龍軍節度使張允伸卒其子簡會自稱留後三月癸酉平州刺史張公素逐簡會自稱留後四月庚子浙江東西道地震封子保爲吉王傑壽王倚睦王五月乙亥殺國子司業韋殷裕十一月王鐸爲司徒韋保衡爲司空十四年正月沙陀寇代北三月迎佛骨于鳳翔癸巳兩土四月并州民產子二頭四手壬寅大赦六月不豫王鐸罷七月辛巳皇帝崩于咸寧殿年四十一

僖宗惠聖恭定孝皇帝諱儂懿宗第五子也母曰惠安皇太后王氏始封普王名儼咸通十四年七月懿宗疾大漸左右神策護軍中尉劉行深韓文約立普王爲皇太子辛巳卽皇帝位于柩前八月癸巳始聽政丁未追尊母爲皇太后乙卯章保衡爲司徒九月貶保衡爲賀州刺史十月乙未尙書左僕射蕭倣爲中書侍郎同中書門下平章事十二月震電癸卯大赦免水旱州縣租賦罷貢鷹鷲雲南蠻寇黎州

乾符元年二月甲午葬昭聖恭惠孝皇帝于簡陵癸丑降死罪以下趙隱罷華州刺史裴坦爲中書侍郎同中書門下平章事四月辛卯以旱理囚五月乙未裴坦薨刑部尙書劉瞻爲中書侍郎同中書門下平章事八月辛未瞻薨兵部侍郎判度支崔彥昭爲中書侍郎同中書門下平章事十月劉鄴罷吏部侍郎鄭畋爲兵部侍郎翰林學士承旨戶部侍郎盧攜同中書門下平章事十一月庚寅改元羣臣上尊號曰聖神聰睿仁哲明孝皇帝是月蕭倣爲司空魏博節度使韓允中卒其子簡自稱留後十二月党項回鶻寇天德軍雲南蠻寇黎雅

二州河西河東山南東道東川兵伐雲南

二年正月己丑朝獻于太清宮庚寅朝享于太廟辛卯有事于南郊大赦賜文武官階勳爵文宣王及二王後三恪一子官雲南蠻請和四月庚辰太白晝見浙西突陣將王郢反五月右龍武軍大將軍宋皓討之蕭傲薨六月濮州賊王仙芝尙君長陷曹濮二州河南諸鎮兵討之吏部尙書李蔚爲中書侍郎同中書門下平章事幽州將李茂勳逐其節度使張公素自稱留後七月以蝗避正殿減膳十一月震電

三年二月丙子以旱降死罪以下三月葬暴骸平盧軍節度使宋威爲指揮諸道招討草賊使檢校左散騎常侍曾元裕副之募能捕賊三百人者官以將軍幽州盧龍軍節度使李茂勳立其子可舉爲留後五月庚子以旱理囚免浙東西一歲稅昭王泚薨六月乙丑雄州地震撫王紘爲太尉七月辛巳雄州地震鎮海軍節度使裴瑑及王郢戰敗之鄂王潤薨九月乙亥朔日有食之避正殿丙子王仙芝陷汝州執刺史王鐔十一月陷郢復二州十二月京師地震王仙

芝陷申光廬壽通舒六州忠武軍節度使崔安潛爲諸道行營都統宮苑使李琢爲諸軍行營招討草賊使右威衛上將軍張自勉副之是冬無雪

四年正月丁丑降死罪以下二等流人死者聽收葬崔彥昭爲司空二月王仙芝陷鄂州閏月崔彥昭罷昭義軍亂逐其節度使高湜宣武軍節度使王鐸檢校司徒兼門下侍郎同中書門下平章事三月宛句賊黃巢陷鄆沂二州天平軍節度使薛崇死之四月壬申朔日有食之是月陝州軍亂逐其觀察使崔碣江西賊柳彥璋陷江州執其刺史陶祥高安制置使鍾傳陷撫州五月有彗星避正殿減膳六月王鐸爲司徒庚寅雄州地震八月黃巢陷隋州執刺史崔休徵九月沙陀寇雲朔二州鹽州軍亂逐其刺史王承顏十月河中軍亂逐其節度使劉侔十一月尙君長降宋威殺之十二月安南戍兵亂逐桂管觀察使李瓚江州刺史劉秉仁及柳彥璋戰敗之

五年正月丁酉王仙芝陷江陵外郛壬寅曾元裕及王仙芝戰于申州敗之元裕爲諸道行營招討草賊使張自勉副之宋威罷招討使二月癸酉雲中守捉

使李克用殺大同軍防禦使段文楚己卯克用寇遮虜軍是月王仙芝伏誅其將王重隱陷饒州刺史顏標死之江西賊徐唐莒陷洪州三月黃巢陷濮州寇河南崔安潛罷都統張自勉爲東西面行營招討使湖南軍亂逐其觀察使崔瑾四月饒州將彭令璋克饒州自稱刺史徐唐莒伏誅五月丁酉鄭畋盧攜罷翰林學士承旨戶部侍郎豆盧瑑爲兵部侍郎吏部侍郎崔沆爲戶部侍郎同中書門下平章事是日雨雹大風拔木八月大同軍節度使李國昌陷岢嵐軍黃巢陷杭州九月李蔚罷吏部尚書鄭從讜爲中書侍郎同中書門下平章事黃巢陷越州執觀察使崔琢鎮海軍將張湊克越州十月昭義軍節度使李鈞幽州盧龍軍節度使李可舉討李國昌十一月丁未河東宣慰使崔季康爲河東節度代北行營招討使十二月甲戌黃巢陷福州庚辰崔季康李鈞及李克用戰于洪谷敗績是歲天平軍節度使張勣卒衙將崔君裕自知州事

六年正月鎮海軍節度使高駢爲諸道行營兵馬都統魏王份薨二月京師地震藍田山裂出水河東軍亂殺其節度使崔季康四月庚申朔日有食之涼王

佺薨王鐸爲荆南節度使南面行營招討都統五月泰寧軍節度使李係爲湖南觀察使副之黃巢陷廣州執嶺南東道節度使李迢陷安南八月甲子東都留守李蔚爲河東節度代北行營招討使閏十月黃巢陷潭澧二州澧州刺史李絢死之十一月丙辰兩日並出而鬪戊午河東節度使康傳圭爲代北行營招討使辛酉黃巢陷江陵殺李迢丁丑山南東道節度使劉巨容及黃巢戰于荆門敗之十二月壬辰克江陵是月貶王鐸爲太子賓客分司東都兵部尚書盧攜爲門下侍郎同中書門下平章事是歲淄州刺史曹全晷克鄆州殺崔君裕黃巢陷鄂宣歙池四州朗州賊周岳陷衡州逐其刺史徐顥荆南將雷滿陷朗州刺史崔翥死之石門蠻向瓌陷澧州權知州事呂自牧死之桂陽賊陳彥謙陷郴州刺史董岳死之

廣明元年正月乙卯改元免嶺南荆湖河中河東稅賦十之四戊寅荆南監軍楊復光泰寧軍將段彥謩殺其守將宋浩以常滋爲節度留後淮南將張鱗及黃巢戰于大雲倉敗之二月丙戌李國昌寇忻代二州戊戌河東軍亂殺其節

度使康傳圭壬子鄭從讜罷爲河東節度使代北行營招討使三月辛未以旱避正殿減膳四月甲申京師東都汝州雨雹大風拔木丁酉太府卿李琢爲蔚朔招討都統壬寅張遴克饒州五月汝州防禦使諸葛爽爲蔚朔招討副使泰寧軍將劉漢宏反張遴及黃巢戰于信州死之六月巢陷睦婺宣三州江華賊蔡結陷道州宿州賊魯景仁陷連州七月黃巢陷滁和二州辛酉天平軍節度使曹全晟爲東面副都統辛未劉漢宏降李可舉及李國昌戰于藥兒嶺敗之八月辛卯昭義軍亂殺其節度使李鈞癸卯榮王愐爲司空是月愐薨九月忠武軍將周岌殺其節度使薛能牙將秦宗權自稱權知蔡州事十月黃巢陷申州十一月河中都虞候王重榮逐其節度使李都黃巢陷汝州壬戌幸左神策軍閱武護軍中討田令孜爲諸道兵馬都指揮制置招討使忠武軍監軍楊復光副之丁卯東都留守劉允章叛附于黃巢壬申巢陷虢州田令孜爲汝洛晉絳同華都統十二月壬午黃巢陷潼關甲申貶盧攜爲太子賓客分司東都翰林學士承旨尙書左丞王徽爲戶部侍郎翰林學士戶部侍郎裴澈爲工部侍

郎同中書門下平章事行在咸陽丙戌左金吾衛大將軍張直方率武官叛附于黃巢巢陷京師辛卯次鳳翔丙申河陽節度使諸葛爽叛附于黃巢丁酉次興元庚子廣德公主豆盧瑑崔沆尚書左僕射劉鄴右僕射于琮太子少師裴諗御史中丞趙濛刑部侍郎李溥京兆尹李湯死于黃巢是歲兩血于靖陵

中和元年正月壬子如成都壬申兵部侍郎判度支蕭遘爲工部侍郎同中書門下平章事丁丑次成都二月己卯敕劍南三川太子少師王鐸爲司徒兼門下侍郎同中書門下平章事淮南節度使高駢爲京城四面都統邠寧節度使李存禮討黃巢鳳翔節度使鄭畋及巢戰于龍尾坡敗之邠寧將王玫陷邠州戊戌清平鎮使陳晟執睦州刺史韋諸自稱刺史三月辛亥黃巢陷鄧州執刺史趙戎辛酉鄭畋爲京城西面行營都統甲子畋及涇原節度使程宗楚天雄軍經略使仇公遇盟于鳳翔是月王徽罷諸葛爽以河陽降四月戊寅王玫伏誅程宗楚朔方軍節度使唐弘夫及黃巢戰于咸陽敗之壬午巢遜于灞上丁亥復入京師弘夫宗楚死之是月敕李國昌及其子克用以討黃巢五月丙辰

克用寇太原振武軍節度使契苾璋敗之辛酉大風雨土是月劉巨容爲南面
行營招討使楊復光克鄧州六月鄭賊鍾季文陷明州辛卯邠寧節度副使朱
玫及黃巢戰于興平敗績戊戌鄭畋爲司空兼門下侍郎同中書門下平章事
京城四面行營都統丙午李克用陷忻代二州七月丁巳大赦改元庚申翰林
學士承旨兵部侍郎韋昭度同中書門下平章事丙寅神策軍將郭琪反伏誅
辛未田令孜殺左拾遺孟昭圖義武軍節度使王處存爲東南面行營招討使
八月感化軍將時溥逐其節度使支詳自稱留後昭義軍節度使高潯及黃巢
戰于石橋敗績其將成麟殺潯入于潞州己丑衆星隕于成都九月丙午鄜延
節度使李孝章夏綏銀節度使拓拔思恭及黃巢戰于東渭橋敗績臨海賊杜
雄陷台州辛酉封子震爲建王己巳昭義軍戍將孟方立殺成麟自稱留後永
嘉賊朱褒陷温州是秋河東霜殺禾十月鳳翔行軍司馬李昌言逐其節度使
鄭畋十一月李昌言爲鳳翔節度行營招討使鄭畋裴澈罷遂昌賊盧約陷處
州十二月安南戍將閔頊逐湖南觀察使李裕自稱留後是歲霍丘鎮使王緒

陷壽光二州

二年正月辛亥王鐸爲諸道行營都都統承制封拜太子少師崔安潛副之高
駢罷都統辛未王處存爲京城東面都統李孝章爲北面都統拓拔思恭爲南
面都統二月甲戌黃巢陷同州己卯太子少傅分司東都鄭畋爲司空兼門下
侍郎同中書門下平章事丙戌李昌言爲京城西面都統邠寧節度使朱玫爲
河南都統諸谷防遏使三月邛州蠻阡能叛西川部將楊行遷討之李克用陷
蔚州六月朱玫爲京城西北面行營都統楊行遷及阡能戰于乾溪敗績己亥
荆南監軍朱敬玫殺其節度使段彥謩少尹李燧自稱留後七月保大軍節度
留後東方逵爲京城東面行營招討使撫州刺史鍾傳陷洪州江西觀察使高
茂卿奔于江州八月丁巳東方逵爲京城東北面行營都統拓拔思恭爲京城
四面都統魏博節度使韓簡陷孟州九月丙戌黃巢將朱温以同州降己亥温
爲右金吾衛大將軍河中行營招討副使是月太原桃李實嶺南西道軍亂逐
其節度使張從訓平盧軍將王敬武逐其節度使安師儒自稱留後十月嵐州

刺史湯羣以沙陀反韓簡寇鄆州天平軍節度使曹全晟死之部將崔用自稱留後諸葛爽陷孟州十一月荆南軍亂牙將陳儒自稱留後丙子湯羣伏誅是歲關中大饑南城賊危全諷陷撫州危仔倡陷信州廬州將楊行密逐其刺史郎幼復和州刺史秦彥逐宣歙觀察使竇滂

三年正月鴈門節度使李克用爲京城東北面行營都統乙亥王鐸罷二月魏博軍亂殺其節度使韓簡其將樂彥禎自稱留後己未建王震爲太保三月天有聲于浙西壬申李克用及黃巢戰于零口敗之四月甲辰又敗之于渭橋丙午復京師五月鄭畋爲司徒東都留守檢校司空鄭從讜爲司空同中書門下平章事淮南將張瓌陷復州奉國軍節度使秦宗權叛附于黃巢七月宣武軍節度副大使朱全忠爲東北面都招討使鄭畋罷兵部尙書判度支裴澈同中書門下平章事八月黃巢秦宗權寇陳州淮南將韓師德陷岳州九月武寧軍節度使時溥爲東面兵馬都統是秋晉州地震十月全椒賊許勅陷滁州李克用陷潞州刺史李殷銳死之十一月壬申劍南西川行軍司馬高仁厚及阆能

戰于邛州敗之十二月忠武軍將鹿晏弘逐興元節度使牛勗自稱留後是歲天平軍將曹存實克鄆州石鏡鎮將董昌逐杭州刺史路審中

四年正月婺州將王鎮執其刺史黃碣叛附于董昌二月鎮伏誅浦陽將蔣瓌

陷婺州舒州賊吳迥逐其刺史高瀛三月甲子劍南東川節度副大使楊師立

反西川節度使陳敬瑄爲西川東川山南西道都指揮招討使前杭州刺史路

審中陷鄂州五月辛酉朱全忠及黃巢戰敗之辛未河東節度使李克用及巢

戰于宛旬敗之癸酉高仁厚爲劍南東川節度使以討楊師立壬午福建團練

副使陳巖逐其觀察使鄭鑑自稱觀察使六月乙卯赦劍南三川瘞京畿骸骨

七月辛酉楊師立伏誅壬午黃巢伏誅九月山南西道節度使鹿晏弘反十月

蕭遘爲司空十一月鹿晏弘陷許州殺節度使周岌自稱留後十二月甲午荆

南行軍司馬張瓌逐其節度使陳儒自稱留後盜殺義昌軍節度使王鐸是歲

關中大饑濮州刺史朱宣逐天平軍節度使曹存實自稱留後武昌軍將杜洪

陷岳州

唐

書

卷九

本紀

九

中華書局聚

光啓元年正月庚辰荆南軍將成汭陷歸州是月王緒陷汀漳二州南康賊盧光稠陷虔州三月丁卯至自成都己巳大赦改元時溥爲蔡州四面行營兵馬都統蕭遘爲司徒韋昭度爲司空四月吳迴伏誅秦宗權陷襄州山南東道節度使劉巨容奔于成都武當賊馮行襲陷均州逐其刺史呂燁五月羣臣上尊號曰至德光烈皇帝六月幽州盧龍軍亂殺其節度使李可舉其將李全忠自稱留後壬戌秦宗權陷東都七月義昌軍亂逐其節度使楊全玫牙將盧彥威自稱留後八月光州賊王潮執王緒甲寅殺右補闕常濬樂彥植殺洛州刺史馬爽九月河中節度使王重榮反邠寧節度使朱玫討之十月癸丑朱全忠及秦宗權戰于雙丘敗績十一月河東節度使李克用叛附于王重榮重榮及克用寇同州刺史郭璋死之十二月癸酉朱玫及王重榮李克用戰于沙苑敗績乙亥克用犯京師丙子如鳳翔

二年正月辛巳鎮海軍將張郁陷常州戊子如興元癸巳朱玫叛寇鳳翔二月鄭從讜爲太傅三月壬午山南西道節度使石君涉奔于鳳翔遂州刺史鄭君

雄陷漢州丙申次興元戊戌御史大夫孔緯翰林學士承旨兵部尚書杜讓能
爲兵部侍郎同中書門下平章事是春成都地震鳳翔女子化爲丈夫四月乙
卯朱玫以嗣襄王煜入于京師五月丙戌有星孛于箕尾武寧軍將丁從實陷
常州逐其刺史張郁六月淮西將黃皓殺欽化軍節度使閔頊衡州刺史周岳
陷潭州自稱節度使七月秦宗權陷許州忠武軍節度使鹿晏弘死之八月王
潮陷泉州刺史廖彥若死之幽州盧龍軍節度使李全忠卒其子匡威自稱留
後九月有星隕于揚州戊寅靜難軍將王行瑜陷興鳳二州十月丙午嗣襄王
煜自立爲皇帝尊皇帝爲太上元皇聖帝朱全忠陷滑州執義成軍節度使安
師儒丙辰杭州刺史董昌攻越州浙東觀察使劉漢宏奔于台州是月河陽節
度使諸葛爽卒其子仲方自稱留後神策行營先鋒使滿存克興鳳二州感義
軍節度使楊晟陷文州武寧軍將張雄陷蘇州十一月庚子秦宗權陷鄭州十
二月魏州地震丙子台州刺史杜雄執劉漢宏降于董昌昌自稱浙東觀察使
丙辰朱玫伏誅丁巳煜伏誅秦宗權陷孟州諸葛仲方奔于汴州是歲天平軍

將朱瑾逐秦寧軍節度使齊克讓自稱留後湘陰賊鄧進思陷岳州杜洪陷鄂州自稱武昌軍節度留後

三年三月癸未蕭遘裴澈兵部侍郎鄭昌圖有罪伏誅壬辰如鳳翔鄭從讜罷韋昭度爲司徒癸巳鎮海軍將劉浩逐其節度使周寶度支催勸使薛朗自稱知府事四月甲辰六合鎮遏使徐約陷蘇州逐其刺史張雄甲子淮南兵馬使畢師鐸陷揚州執其節度使高駢是月維州山崩五月甲戌宣歙觀察使秦彥入于揚州癸未秦宗權陷鄭州六月陷孟州河陽將李罕之入于孟州張全義入于東都已酉鳳翔節度使李昌符反庚戌犯大安門不克奔于隴州壬子武定軍節度使李茂貞爲隴州招討使丁巳護國軍將常行儒殺其節度使王重榮其兄重盈自稱留後壬戌亳州將謝殷逐其刺史宋袞七月丁亥降死罪以下貞觀開元建中興元功臣後子一子九品正員官減常膳三之一賜民九十以上粟帛七月李昌符伏誅八月韋昭度爲太保壬寅謝殷伏誅朱全忠陷亳州壬子陷曹州刺史丘弘禮死之九月戶部侍郎判度支張濬爲兵部侍郎同

中書門下平章事秦彥殺高駢十月丁未朱全忠陷濮州甲寅封子陞爲益王
杭州刺史錢鏐陷常州丁卯鏐殺周寶是月秦宗權將孫儒寇揚州十一月壬
申廬州刺史楊行密陷揚州秦彥畢師鐸奔于孫儒十二月癸巳淮西將趙德
諲陷江陵荆南節度使張瓌死之朱全忠爲東南面招討使饒州刺史陳儒陷
衢州上蔡賊馮敬章陷蘄州

文德元年正月甲寅孫儒殺秦彥畢師鐸癸亥朱全忠爲蔡州四面行營都統
丙寅薛朗伏誅錢鏐陷潤州二月乙亥不豫己丑至自鳳翔庚寅謁于太廟大
赦改元是月魏博軍亂殺其節度使樂彥禎其將羅弘信自稱權知留後三月
戊戌朔日有食之旣壬寅疾大漸立壽王傑爲皇太弟知軍國事癸卯皇帝崩
于武德殿年二十七

贊曰唐自穆宗以來八世而爲宦官所立者七君然則唐之衰亡豈止方鎮之
患蓋朝廷天下之本也人君者朝廷之本也始卽位者人君之本也其本始不
正欲以正天下其可得乎懿僖當唐政之始衰而以昏庸相繼乾符之際歲大

唐書卷九考證

懿宗紀咸通四年十二月乙酉昭義軍亂殺其節度使沈詢○臣西按舊書是

年正月河東節度盧簡求致仕以昭義節度劉潼代三月以李贛為昭義節

度是潼之後贛贛之後詢矣而新書沈傳師傳乃云詢遇害潼代為節度誅

害詢者豈潼本在詢後耶當是年月傳誤耳

七年六月何弘敬卒其子全皞自稱留後○舊書在十年十月臣西按舊書十

年正月書弘敬赴行營十二月書起復何全皞其前後記載歷歷不宜有譌

或是新書傳誤耳

十月壬申楊收罷○舊書在八年臣西按新書本傳收相凡五年自四年入相

至八年始為五年當以舊書為是

僖宗紀廣明元年八月辛卯昭義軍亂殺其節度使李鈞○舊書乾符五年鈞

與沙陀戰于洪合王師大敗鈞中流矢而卒新書為下所殺舊書沒于陣且

相去二年未知孰是

是歲兩血于靖陵○沈炳震曰靖陵僖宗陵名靖字誤臣西按德宗紀貞元三

年二月甲申葬昭德皇后于靖陵則唐時原有兩靖陵此所記者乃昭德皇

后之陵耳沈似失考○舊書卷五十八

中和元年正月壬子如成都○舊書在七月乙未幸成都未知孰是

十八月甲申葬文德○舊書卷五十八

史長壽寺○舊書卷五十八

唐書卷九考證○舊書卷五十八

十月甲申葬李其子全○舊書卷五十八

善書卷五十八○舊書卷五十八

史長壽寺○舊書卷五十八

中五月甲申葬文德○舊書卷五十八

史長壽寺○舊書卷五十八

史長壽寺○舊書卷五十八

唐書卷十

宋 翰 林 學 士 歐 陽 修 撰

本紀第十

昭宗聖穆景文孝皇帝諱曄懿宗第七子也母曰恭憲皇太后王氏始封壽王
乾符三年領幽州盧龍軍節度使僖宗遇亂再出奔壽王握兵侍左右尤見倚
信文德元年三月僖宗疾大漸羣臣以吉王長且欲立之觀軍容使楊復恭率
兵迎壽王立爲皇太弟改名敏乙巳卽皇帝位于柩前四月戊辰孫儒陷揚州
自稱淮南節度使楊行密奔于廬州庚午追尊母爲皇太后韋昭度爲中書令
孔緯爲司空乙亥張全義陷孟州李罕之奔于河東成汭陷江陵自稱留後辛
卯朱全忠及秦宗權戰于蔡州敗之五月壬寅趙德諱以襄州降以德諱爲忠
義軍節度使蔡州四面行營副都統六月閩州防禦使王建陷漢州執刺史張
頊遂寇成都韋昭度罷爲劍南西川節度副大使兼兩川招撫制置使十月陳
敬瑄反辛卯葬惠聖恭定孝皇帝于靖陵十一月丙申秦宗權陷許州執忠武

軍節度使王縝辛酉奉國軍將申叢執秦宗權十二月丁亥韋昭度為行營招討使及永平軍節度使王建討陳敬瑄山南西道節度使楊守厚陷夔州

龍紀元年正月癸巳大赦改元翰林學士承旨兵部侍郎劉崇望同中書門下

平章事壬子宣武軍將郭璠殺奉國軍留後申叢自稱留後二月戊辰朱全忠

俘秦宗權以獻己丑宗權伏誅三月孔緯為司徒杜讓能為司空丙申錢鏐陷

蘇州逐刺史徐約六月李克用寇邢州昭義軍節度使孟方立卒其弟遷自稱

留後楊行密陷宣州宣歙觀察使趙鐙死之廬州刺史蔡儔叛附于孫儒八月

甲戌孟遷叛附于李克用十月平盧軍節度使王敬武卒其子師範自稱留後

陷棣州刺史張蟾死之宣歙觀察使楊行密陷常州刺史杜陵死之錢鏐陷潤

州十一月丁未朝獻于太清宮戊申朝享于太廟己酉有事于南郊大赦十二

月孫儒陷常潤二州戊午孔緯為太保杜讓能為司徒壬申眉州刺史山行章

叛附于王建

大順元年正月戊子羣臣上尊號曰聖文睿德光武弘孝皇帝大赦改元壬寅

簡州將杜有遷執其刺史員虔嵩叛附于王建二月己未資州將侯元綽執其
刺史楊戡叛附于建三月戊申昭義軍節度使李克修卒其弟克恭自稱留後
四月丙辰宿州將張筠逐其刺史張紹光丙寅嘉州刺史朱實叛附于王建丙
子戎州將文武堅執其刺史謝承恩叛附于建五月張濬爲河東行營都招討
宣慰使京兆尹孫揆副之幽州盧龍軍節度使李匡威爲北面招討使雲州防
禦使赫連鐸副之朱全忠爲南面招討使王鎔爲東面招討使以討李克用壬
寅昭義軍將安居受殺其節度使李克恭叛附于朱全忠癸丑劍南東川節度
使顧彥朗卒其弟彥暉自稱留後六月辛酉雅州將謝從本殺其刺史張承簡
叛附于王建辛未朱全忠爲河東東面行營招討使是月河東將安知建以邢
洛滋三州叛附于全忠七月楊行密陷潤州戊申李克用執昭義軍節度使孫
揆八月錢鏐殺蘇州刺史杜孺休楊行密陷蘇州淮南節度使孫儒陷潤州庚
午朱全忠爲中書令九月李克用陷潞州楊行密陷潤常二州閏月孫儒陷常
州壬戌邛州將任可知殺其刺史毛湘十月癸未蜀州刺史李行周叛附于王

建李克用陷邢洛磁三州十一月丁卯李匡威陷蔚州是月張濬及李克用戰于陰地敗績孫儒陷蘇州十二月李克用陷晉州

二年正月庚申孔緯張濬罷翰林學士承旨兵部侍郎崔昭緯御史中丞徐彥若爲戶部侍郎同中書門下平章事甘露鎮使陳可言陷常州錢鏐陷蘇州二月乙巳赦陳敬瑄丁未詔王建罷兵不受命是春淮南大饑四月庚辰有彗星入于太微甲申大赦避正殿減膳徹樂賜兩軍金帛贖所略男女還其家民年八十以上及疾不能自存者長吏存卹訪武德功臣子孫癸卯王建寇成都五月孫儒陷和滁二州六月楊行密陷和滁二州丙午封子祐爲德王七月李克用陷雲州防禦使赫連鐸奔于退渾孫儒焚揚州以逃八月庚子王建陷成都執劍南西川節度使陳敬瑄自稱留後十月壬午朱全忠陷宿州十一月己未曹州將郭銖殺其刺史郭詞叛附于全忠辛未全忠陷壽州

景福元年正月己未朱全忠陷孟州逐河陽節度使趙克裕丙寅大赦改元二月劉崇望罷錢鏐陷蘇州甲申朱全忠寇鄆州天平軍節度使朱宣敗之二月

戶部尙書鄭延昌爲中書侍郎同中書門下平章事乙巳楊行密陷楚州執刺史劉瓚又陷常州刺史陳可言死之丙辰武定軍節度使楊守忠龍劍節度使楊守貞會楊守厚兵寇梓州丙寅福建觀察使陳巖卒護閩都將范暉自稱留後庚午泉州刺史王潮寇福州四月辛巳杜讓能爲太尉六月戊寅楊行密陷揚州己巳鳳翔隴右節度使李茂貞陷鳳州感義軍節度使滿存奔于興元遂陷興洋二州八月壬申寇興元楊守亮滿存奔于閬州丙戌降京畿關輔囚罪免淮南浙西宣州逋負十月蔡儔以廬州叛附于朱全忠河東將李存孝以邢州叛附于全忠十一月有星孛于斗牛辛丑武寧軍將張燧張諫以濠泗二州叛附于朱全忠乙巳朱友裕陷濮州執刺史邵儒孫儒將王壇陷婺州刺史蔣瓌奔于越州是歲明州刺史鍾文季卒其將黃晟自稱刺史

二年正月徐彥若罷爲鳳翔隴右節度使李茂貞爲山南西道節度使茂貞不受命二月楊行密陷常州三月辛酉幽州盧龍軍兵馬留後李匡籌逐其兄匡威自稱節度留後四月乙亥王建殺陳敬瑄及劍南西川監軍田令孜乙酉有

彗星入于太微丁亥王鎔殺李匡威戊子朱全忠陷徐州武寧軍節度使時溥
死之五月庚子王潮陷福州范暉死之潮自稱留後七月楊行密陷廬州蔡儔
死之八月丙申嗣覃王嗣周爲京西路招討使神策大將軍李鐡副之以討李
茂貞庚子昇州刺史張雄卒其將馮弘鐸自稱刺史是月楊行密陷歙州九月
壬午嗣覃王嗣周及李茂貞戰于興平敗績甲申茂貞犯京師乙酉茂貞殺觀
軍容使西門重遂內樞密使李周謹段誦貶杜讓能爲梧州刺史壬辰東都留
守檢校司徒韋昭度爲司徒御史中丞崔胤爲戶部侍郎同中書門下平章事
是月昇州刺史馮弘鐸叛附于楊行密十月乙未殺杜讓能及戶部侍郎杜弘
徽楊行密陷舒州十二月韋昭度爲太傅邵州刺史鄧處訥陷潭州欽化軍節
度使周岳死之處訥自稱留後是歲建州刺史徐歸範汀州刺史鍾全慕叛附
于王潮

乾寧元年正月有星孛于鶉首乙丑大赦改元李茂貞以兵來朝二月右散騎
常侍鄭瓘爲禮部侍郎同中書門下平章事彰義軍節度使張鈞卒其兄鐸自

稱留後三月甲申李克用寇邢州執李存孝殺之五月丙子王建陷彭州威戎軍節度使楊晟死之是月鄭延昌罷孫儒將劉建鋒馬殷陷潭州武安軍節度使鄧處訥死之建鋒自稱留後武岡指揮使蔣勛陷邵州六月大同軍防禦使赫連鐸及李克用戰于雲州死之戊午翰林學士承旨禮部尚書李磻同中書門下平章事庚申磻罷御史大夫徐彥若爲中書侍郎同中書門下平章事七月以兩霖避正殿減膳鄭絜罷李茂貞陷閬州八月楊守亮伏誅癸巳滅京畿興元洋金商州賦役九月庚申李克用陷潞州昭義軍節度使康君立死之十月丁酉封子禠爲棣王禊虔王禕沂王禕遂王十一月李克用陷武州十二月陷新州甲寅幽州盧龍軍節度使李匡籌奔于滄州義昌軍節度使盧彥威殺之丙辰李克用陷幽州是冬楊行密陷黃州執刺史吳討

二年正月己巳給事中陸希聲爲戶部侍郎同中書門下平章事壬申護國軍節度使王重盈卒其子珂自稱留後二月乙未太子太傅李磻爲戶部侍郎同中書門下平章事三月崔胤李磻罷戶部侍郎判戶部王搏爲中書侍郎同中

書門下平章事楊行密陷濠州執刺史張燧庚午河東地震四月蘇州大雨雪
陸希聲韋昭度罷泰寧軍節度使朱瑾及朱全忠戰于高梧敗績其將安福慶
死之楊行密陷壽州執刺史江從勗五月甲子靜難軍節度使王行瑜鎮國軍
節度使韓建及李茂貞犯京師殺太保致仕韋昭度太子少師李磈是月李克
用陷絳州刺史王瑤死之六月庚寅鎮海軍節度使錢鏐爲浙江東道招討使
癸巳吏部尚書孔緯爲司空兼門下侍郎同中書門下平章事七月丙辰李克
用以兵屯于河中戊午匡國軍節度使王行約奔于京師庚申左右神策軍護
軍中尉駱全瓘劉景宣指揮使王行實李繼鵬反行在莎城嗣薛王知柔權知
中書事壬戌李克用陷同州甲子次石門前護國軍節度使崔胤爲中書侍郎
同中書門下平章事八月戊戌李克用爲邠寧四面行營招討使保大軍節度
使李思孝爲北面招討使定難軍節度使李思諫爲東北面招討使彰義軍節
度使張鐸爲西面招討使辛丑李克用爲邠寧四面行營都統李繼鵬伏誅赦
李茂貞辛亥至自石門壬子崔昭緯罷九月丙辰徐彥若爲司空癸亥孔緯薨

前昭義軍節度使李罕之爲邠寧四面行營副都統十月京兆尹孫僊爲戶部侍郎同中書門下平章事丙戌李克用及王行瑜戰于梨園敗之庚寅王行約焚寧州以逃義武軍節度使王處存卒其子郃自稱留後十一月丁巳李克用及王行瑜戰于龍泉敗之辛酉衢州刺史陳儒卒其弟岌自稱刺史丁卯王行瑜伏誅壬申齊州刺史朱瓊叛附于朱全忠丁丑王建陷利州刺史李繼顥死之十二月癸未赦京師復大順以來削奪官爵非其罪者甲申閬州防禦使李繼雍蓬州刺史費存渠州刺史陳璠叛附于王建丙申建寇梓州戊辰通州刺史李彥昭叛附于建是歲安州防禦使宣晟陷桂州靜江軍節度使周元靜部將劉士政死之晟自稱知軍府事

三年正月癸丑王建陷龍州刺史田昉死之閏月丁亥果州刺史周雄叛附于建四月壬子武安軍亂殺其節度使劉建峯其將馬殷自稱留後五月癸未楊行密陷蘇州執刺史成及陷光州刺史劉存死之庚寅成汭陷黔州武泰軍節度使王建肇奔于成都乙未董昌伏誅是月蘄州刺史馮行章叛附于楊行密

六月庚戌李茂貞犯京師嗣延王戒丕禦之丙寅及茂貞戰于婁館敗績七月
癸巳行在渭北甲午韓建來朝次華州乙巳崔胤罷丙午翰林學士承旨尚書
左丞陸扆爲戶部侍郎同中書門下平章事八月甲寅王搏罷乙丑國子毛詩
博士朱朴爲左諫議大夫同中書門下平章事九月乙未武安軍節度使崔胤
爲中書侍郎翰林學士承旨戶部侍郎崔遠同中書門下平章事丁酉貶陸扆
爲峽州刺史十月李克用及羅弘信戰于白龍潭敗之壬子孫偓持節鳳翔四
面行營節度諸軍都統招討處置使戊午威勝軍節度使王搏爲吏部尚書同
中書門下平章事十一月戊子忠國軍節度使李師悅卒其子繼徽自稱留後
四年正月乙酉韓建以兵圍行宮殺扈蹕都將李筠丙申朱全忠陷鄆州天平
軍節度使朱宣死之己亥孫偓罷都統二月朱全忠寇兗州泰寧軍節度使朱
瑾奔于淮南其子用貞以兗州叛附于全忠全忠陷沂海密三州保義軍節度
使王琪寇河中韓建殺太子詹事馬道殷將作監許巖士楊行密爲江南諸道
行營都統癸丑王建陷瀘州刺史馬敬儒死之己未立德王裕爲皇太子大赦

饗于行廟辛未王建陷渝州乙亥孫僇朱朴罷五月壬午朱全忠陷黃州刺史
瞿璋死之六月貶王建爲南州刺史以李茂貞爲劍南西川節度使嗣覃王嗣
周爲鳳翔隴右節度使茂貞不受命嗣周及茂貞戰于奉天敗績八月韓建殺
通王滋沂王禪韶王彭王嗣韓王嗣陳王嗣覃王嗣周嗣延王戒不嗣丹王允
九月錢鏐陷湖州忠國軍節度使李繼徽奔于淮南彰義軍節度使張璠爲鳳
翔西北行營招討使靜難軍節度使李思諫爲鳳翔四面行營副都統以討李
茂貞十月壬子遂州刺史侯紹叛附于王建乙卯合州刺史王仁威叛附于建
庚申建陷梓州劍南東川節度使顧彥暉死之甲子封子祕爲景王祚輝王祺
祁王十一月癸酉楊行密及朱全忠戰于清口敗之丙子錢鏐陷台州十二月
丁未威武軍節度使王潮卒其弟審知自稱留後

光化元年正月徐彥若爲司徒二月赦李茂貞三月幽州盧龍軍節度使劉仁
恭之子守文陷滄州義昌軍節度使盧彥威奔于汴州四月丙寅立淑妃何氏
爲皇后五月己巳大赦辛未朱全忠陷洛州刺史邢善益死之又陷邢州壬午

陷磁州刺史袁奉韜死之是月馬殷陷邵衡永州刺史蔣勛楊師遠唐旻死
之七月丙申朱全忠陷唐州又陷隋州執刺史趙匡璘八月戊午陷鄧州執刺
史國湘壬戌至自華州甲子大赦改元九月丙子有星隕于北方甲申錢鏐陷
蘇州十月魏博節度使羅弘信卒其子紹威自稱留後己亥朱全忠陷安州刺
史武瑜死之十一月衢州刺史陳岌叛附于楊行密甲寅封子禎爲雅王祥瓊
王十二月癸未李罕之陷潞州自稱節度留後李克用陷澤州

二年正月乙未給復綿劍二州二年丁未崔胤罷兵部尙書陸扆同中書門下
平章事是月李罕之陷沁州劉仁恭陷貝州二月甲子朱全忠陷蔡州奉國軍
節度使崔洪奔于淮南三月丁巳全忠陷澤州六月丁丑保義軍亂殺其節度
使王珙其將李璠叛附于全忠七月壬辰海州戍將陳漢賓以其州叛附于楊
行密馬殷陷道州刺史蔡結死之八月李克用陷澤潞懷三州十一月徐彥若
爲太保王搏爲司空馬殷陷郴連二州刺史陳彥謙魯景仁死之辛丑保義軍
將朱簡殺其節度使李璠叛附于朱全忠

三年四月辛未皇后及皇太子享于太廟六月丁卯清海軍節度使崔胤爲尙書左僕射兼門下侍郎同中書門下平章事王搏罷己巳殺之七月浙江盜八月庚辰李克用陷洛州執刺史朱紹宗九月朱全忠陷洛州錢鏐陷婺州刺史王壇奔于宣州衢州刺史陳岌叛附于錢鏐乙巳徐彥若罷丙午崔遠罷戊申刑部尙書裴贇爲中書侍郎同中書門下平章事甲寅朱全忠陷瀛州十月丙辰陷景州執刺史劉仁霸辛酉陷莫州辛巳陷祁州刺史楊約死之甲申陷定州義武軍節度使王郃奔于太原十一月己丑左右神策軍中尉楊季述王仲先內樞密使王彥範薛齊偓作亂皇帝居于少陽院辛卯季述以皇太子裕爲皇帝丁未太白晝見十二月劉季述殺睦王倚是歲馬殷陷桂宜巖柳象五州睦州刺史陳晟卒其弟詢自稱刺史

天復元年正月乙酉左神策軍將孫德昭董彥弼周承誨以兵討亂皇帝復于位劉季述薛齊偓伏誅降封皇太子裕爲德王戊申朱全忠陷絳州壬子崔胤爲司空朱全忠陷晉州二月甲寅以旱避正殿減膳戊辰朱全忠陷河中執護

國軍節度使王珂辛未封全忠爲梁王是月翰林學士戶部侍郎王溥爲中書侍郎吏部侍郎裴樞爲戶部侍郎同中書門下平章事三月辛亥昭義軍節度使孟遷叛附于朱全忠四月壬子全忠陷沁澤二州丁巳儀州刺史張鄂叛附于全忠甲戌享于太廟丙子大赦改元武德貞觀配饗功臣主祭子孫敘進之介公懌公後予一子九品正員官免光化以來畿內逋負五月李茂貞來朝六月李克用陷隰慈二州十月戊戌朱全忠犯京師十一月己酉陷同州壬子如鳳翔丁巳朱全忠陷華州鎮國軍節度使韓建叛附于全忠辛酉兵部侍郎盧光啓權句當中書事癸亥李茂貞及朱全忠戰于武功敗績丁卯盧光啓爲右諫議大夫參知機務戊辰朱全忠犯鳳翔辛未陷邠州靜難軍節度使李繼徽叛附于全忠甲戌崔胤裴樞罷十二月鍾傳陷吉州是歲清海軍節度使徐彥若卒行軍司馬劉隱自稱留後武貞軍節度使雷蒲卒其子彥威自稱留後二年正月丁卯給事中韋貽範爲工部侍郎同中書門下平章事丙子給事中嚴龜爲汴岐和協使二月己亥盜發蘭陵王建陷利州昭武軍節度使李繼忠

奔于鳳翔三月庚戌晝晦癸丑朱全忠陷汾州乙卯浙西大雨雪戊午朱全忠陷慈隰二州丁卯李克用陷汾慈隰三州四月盧光啓罷丙申温州刺史朱巖卒其兄敖自稱刺史楊行密陷昇州五月丙午李茂貞及朱全忠戰于武功敗績庚午韋貽範罷六月丙子中書舍人蘇檢爲工部侍郎同中書門下平章事丙戌朱全忠陷鳳州七月甲辰陷成州乙巳陷隴州八月己亥韋貽範起復辛丑王建陷興元山南西道節度使王萬弘叛附于建九月戊申李茂貞及朱全忠戰于槐林敗績武定軍節度使拓拔思恭叛附于王建十月癸酉楊行密爲東面諸道行營都統及湖南節度使馬殷討朱全忠王建陷興州十一月癸卯保大軍節度使李茂勳以兵援鳳翔丙辰韋貽範薨十二月癸巳温州將丁章逐其刺史朱敖己亥朱全忠陷鄜州保大軍節度使李茂勳叛附于全忠是歲盧光稠陷韶州岳州刺史鄧進思卒其弟進忠自稱刺史

三年正月丙午平盧軍節度使王師範取兗州戊申殺左右神策軍護軍中尉韓全誨張彥弘內樞密使袁易簡周敬容辛亥翰林學士姚洎爲汴岐和協使

壬子工部尙書崔胤爲司空兼門下侍郎同中書門下平章事甲子幸朱全忠軍已巳至自鳳翔哭于太廟大赦庚午崔胤及朱全忠殺中官七百餘人辛未胤判六軍十二衛事丁章伏誅二月兩土甲戌貶陸展爲沂王傅分司東都丙子王溥罷朱全忠殺蘇檢吏部侍郎盧光啓戊寅降京畿河中鳳翔興德府同邠鄜三州死罪以下己卯輝王祚爲諸道兵馬都元帥庚辰朱全忠爲太尉中書令副之崔胤爲司徒乙未清海軍節度使裴樞爲門下侍郎同中書門下平章事三月朱全忠陷青州楊行密陷密州刺史劉康乂死之四月己卯朱全忠判元帥府事五月壬子荆南節度使成汭及楊行密戰于君山死之武貞軍節度使雷彥威之弟彥恭陷江陵六月乙亥朱全忠陷登州九月楊行密殺奉國軍節度使朱延壽辛亥朱全忠陷棣州刺史邵播死之陷密州戊午平盧軍節度使王師範叛附于全忠十月忠義軍將趙匡明陷江陵自稱留後王建陷忠萬施三州甲戌陷夔州丁丑平盧軍將劉鄩以兗州叛附于朱全忠十二月裴贄罷楊行密陷宣州寧國軍節度使田頔死之辛巳禮部尙書獨孤損爲兵部

侍郎同中書門下平章事丙申朱全忠殺尙書左僕射致仕張濬

天祐元年正月乙巳崔胤罷裴樞判左三軍事獨孤損判右三軍事兵部尙書
崔遠爲中書侍郎翰林學士右拾遺柳璨爲右諫議大夫同中書門下平章事
己酉朱全忠殺太子少傅崔胤及京兆尹鄭元規威遠軍使陳班戊午全忠遷
唐都于洛陽二月丙寅日中見北斗戊寅次陝州朱全忠來朝甲申封子禎爲
端王祁豐王福和王禧登王祐嘉王三月丁未朱全忠兼判左右神策及六軍
諸衛事閏四月壬寅次穀水朱全忠來朝甲辰至自西都享于太廟大風雨土
乙巳大赦改元六月靜難軍節度使楊崇本會李克用王建兵以討朱全忠七
月乙丑全忠以兵屯于河中八月壬寅全忠以左右龍武統軍朱友恭氏叔琮
樞密使蔣玄暉兵犯宮門是夕皇帝崩年三十八明年起居郎蘇楷請更諡恭
靈莊閔廟號襄宗至後唐同光初復故號諡云

昭宣光烈孝皇帝諱祝昭宗第九子也母曰皇太后何氏始封輝王朱全忠已
弑昭宗矯詔立爲皇太子監軍國事

天祐元年八月丙午卽皇帝位于樞前衢州刺史陳璋睦州刺史陳詢叛附于楊行密九月庚午尊皇后爲皇太后十月辛卯朔日有食之癸巳朱全忠來朝甲午全忠殺朱友恭氏叔琮十一月全忠陷光州是歲虔州刺史盧光稠卒衙將李圖自稱知州事

二年正月盧約陷温州楊行密殺平盧軍節度使安仁義丁丑盜焚乾陵下宮二月楊行密陷鄂州武昌軍節度使杜洪死之戊戌朱全忠殺德王裕及棣王禕虔王禊遂王禕景王祕祁王祺瓊王祥己酉葬聖穆景文孝皇帝于和陵三月甲子裴樞罷戊寅獨孤損罷禮部侍郎張文蔚同中書門下平章事甲申崔遠罷吏部侍郎楊涉同中書門下平章事四月乙未以旱避正殿減膳庚子有彗星出于西北甲辰出于北河辛亥降京畿死罪以下給復山陵役者一年五月王建陷金州戎昭軍節度使馮行襲奔于均州六月行襲克金州楊行密陷婺州執刺史沈夏戊子朱全忠殺裴樞及靜海軍節度使獨孤損左僕射崔遠吏部尙書陸扆工部尙書王溥司空致仕裴贄檢校司空兼太子太保致仕趙

崇兵部侍郎王贊七月卜郊岳州刺史鄧進忠叛附于馬殷九月甲子朱全忠陷襄州忠義軍節度使趙匡凝奔于淮南丙寅封弟裕爲潁王祐蔡王朱全忠陷江陵留後趙匡明奔于成都乙酉改卜郊十月丙戌朱全忠爲諸道兵馬元帥十一月庚午三卜郊庚辰淮南節度使楊行密卒以其子渥爲淮南節度副大使東面諸道行營都統辛巳朱全忠爲相國總百揆封魏王十二月乙未全忠爲天下兵馬元帥殺蔣玄暉及豐德庫使應頊尙食使朱建武癸卯柳璨爲司空戊申朱全忠弑皇太后辛亥罷郊癸丑貶柳璨爲登州刺史甲寅殺璨及太常卿張廷範

三年正月壬戌淮南將王茂章以宣歙二州叛附于錢鏐二月楊渥陷岳州癸巳王建陷歸州四月癸未朔日有食之鎮南軍節度使鍾傳卒其子匡時自稱留後六月錢鏐陷衢睦二州刺史陳璋陳詢奔于淮南七月楊渥陷饒州八月癸未朱全忠陷相州九月楊渥陷洪州執鍾匡時乙亥匡國軍節度使劉知俊陷坊州執刺史劉彥暉十月辛巳楊崇本會鳳翔涇原鄜延秦隴兵以討朱全

忠戰于美原敗績十一月忠國軍節度使高彥卒其子禮自稱留後閏十二月
戊辰李克用陷潞州昭義軍節度使丁會叛附于克用乙亥震電雨雪

四年三月劉守光囚其父仁恭自稱幽州盧龍軍節度使四月戊午錢鏐陷温
州甲子皇帝遜于位徙于曹州號濟陰王梁開平二年二月遇弑年十七諡曰
哀帝後唐明宗追諡昭宣光烈孝皇帝陵曰温陵

贊曰自古亡國未必皆愚庸暴虐之君也其禍亂之來有漸積及其大勢已去
適丁斯時故雖有智勇有不能爲者矣可謂真不幸也昭宗是已昭宗爲人明
雋初亦有志於興復而外患已成內無賢佐頗亦慨然思得非常之材而用匪
其人徒以益亂自唐之亡也其遺毒餘酷更五代五十餘年至於天下分裂大
壞極亂而後止跡其禍亂其漸積豈一朝一夕哉

唐書卷十考證

昭宗紀乾寧四年十月甲子封子祕爲景王祚輝王祺祁王○舊書與雅王瓊
王俱在是年二月封沈炳震曰是時韓建方囚八王請封皇子昭宗不得已
封之耳若在十月始封則建已害諸王不應更封皇子也疑當從舊紀
天復元年二月王溥爲中書侍郎○舊書三年二月乙未拜

唐書卷十考證

唐書卷十一

宋 翰 林 學 士 歐 陽 修 撰

禮樂志第一

由三代而上治出於一而禮樂達于天下由三代而下治出於二而禮樂爲虛
名古者宮室車輿以爲居衣裳冕弁以爲服尊爵俎豆以爲器金石絲竹以爲
樂以適郊廟以臨朝廷以事神而治民其歲時聚會以爲朝覲聘問懽欣交接
以爲射鄉食饗合衆興事以爲師田學校下至里閭田晦吉凶哀樂凡民之事
莫不一出於禮由之以教其民爲孝慈友悌忠信仁義者常不出於居處動作
衣服飲食之間蓋其朝夕從事者無非乎此也此所謂治出於一而禮樂達天
下使天下安習而行之不知所以遷善遠罪而成俗也及三代已亡遭秦變古
後之有天下者自天子百官名號位序國家制度宮車服器一切用秦其間雖
有欲治之主思所改作不能超然遠復三代之上而牽其時俗稍卽以損益大
抵安於苟簡而已其朝夕從事則以簿書獄訟兵食爲急曰此爲政也所以治

民至於三代禮樂具其名物而藏於有司時出而用之郊廟朝廷曰此爲禮也所以教民此所謂治出於二而禮樂爲虛名故自漢以來史官所記事物名數降登揖讓拜俛伏興之節皆有司之事爾所謂禮之末節也然用之郊廟朝廷自搢紳大夫從事其間者皆莫能曉習而天下之人至於老死未嘗見也況欲識禮樂之盛曉然諭其意而被其教化以成俗乎嗚呼習其器而不知其意忘其本而存其末又不能備具所謂朝覲聘問射鄉食饗師田學校冠婚喪葬之禮在者幾何自梁以來始以其當時所行傳於周官五禮之名各立一家之學唐初卽用隋禮至太宗時中書令房玄齡祕書監魏徵與禮官學士等因隋之禮增以天子上陵朝廟養老大射講武讀時令納皇后皇太子入學太常行陵合朔陳兵太社等爲吉禮六十一篇賓禮四篇軍禮二十篇嘉禮四十二篇凶禮十一篇是爲貞觀禮高宗又詔太尉長孫無忌中書令杜正倫李義府中書侍郎李友益黃門侍郎劉祥道許圜師太子賓客許敬宗太常卿韋琨等增之爲一百三十卷是爲顯慶禮其文雜以式令而義府敬宗方得幸多希旨傳會

事既施行議者皆以爲非上元三年詔復用貞觀禮由是終高宗世貞觀顯慶二禮兼行而有司臨事遠引古義與二禮參考增損之無復定制武氏中宗繼以亂敗無可言者博士掌禮備官而已玄宗開元十年以國子司業韋縉爲禮儀使以掌五禮十四年通事舍人王岳上疏請刪去禮記舊文而益以今事詔付集賢院議學士張說以爲禮記不刊之書去聖久遠不可改易而唐貞觀顯慶禮儀注前後不同宜加折衷以爲唐禮乃詔集賢院學士右散騎常侍徐堅左拾遺李銳及太常博士施敬本撰述歷年未就而銳卒蕭嵩代銳爲學士奏起居舍人王仲丘撰定爲一百五十卷是爲大唐開元禮由是唐之五禮之文始備而後世用之雖時小有損益不能過也貞元中太常禮院脩撰王涇考次歷代郊廟沿革之制及其工歌祝號而圖其壇屋陟降之序爲郊祀錄十卷元和十一年祕書郎修撰韋公肅又錄開元已後禮文損益爲禮閣新儀三十卷十三年太常博士王彥威爲曲臺新禮三十卷又採元和以來王公士民昏祭喪葬之禮爲續曲臺禮三十卷嗚呼考其文記可謂備矣以之施於貞觀開元

之間亦可謂盛矣而不能至三代之隆者具其文而意不在焉此所謂禮樂爲虛名也哉五禮一曰吉禮大祀天地宗廟五帝及追尊之帝后中祀社稷日月星辰岳鎮海瀆帝社先蠶七祀文宣武成王及古帝王贈太子小祀司中司命司人司祿風伯雨師靈星山林川澤司寒馬祖先牧馬社馬步州縣之社稷釋奠而天子親祠者二十有四三歲一禘五歲一禘當其歲則舉其餘二十有二一歲之間不能徧舉則有司攝事其非常祀者有時而行之而皇后皇太子歲行事者各一其餘皆有司行事凡歲之常祀二十有二冬至正月上辛祈穀孟夏雩祀昊天上帝于圓丘季秋大享于明堂臘蜡百神于南郊春分朝日于東郊秋分夕月于西郊夏至祭地祇于方丘孟冬祭神州地祇于北郊仲春仲秋上戊祭于太社立春立夏夏季夏之土王立秋立冬祀五帝于四郊孟春孟夏孟秋孟冬臘享于太廟孟春吉亥享先農遂以耕籍凡祭祀之節有六一曰卜日二曰齋戒三曰陳設四曰省牲器五曰奠玉帛宗廟之晨裸六曰進熟饋食一曰卜日凡大祀中祀無常日者卜小祀則筮皆于太廟卜日前祀四十有五

卜于廟南門之外布卜席闌西闕外太常卿立門東太卜正占者立門西卜正奠龜於席西首灼龜之具在龜北乃執龜立席東北向太卜令進受龜詣卿示高卿受視已令受龜少退俟命卿曰皇帝以某日祇祀於某令曰諾遂還席西向坐命龜曰假爾太龜有常與授卜正龜卜正負東扉坐作龜與令進受龜示卿卿受反之令復位東向占之不釋龜進告於卿曰某日從乃以龜還卜正凡卜日必舉初旬不吉卽繇中及下如初儀若筮日則卜正啓贛出策兼執之受命還席以贛擊策述命曰假爾太筮有常乃釋贛坐策執卦以示如卜儀小祀筮日則太卜令莅之日吉乃用遇廢務皆勿避二曰齋戒其別有三曰散齋曰致齋曰清齋大祀散齋四曰致齋三日中祀散齋三日致齋二日小祀散齋二日致齋一日大祀前期七日太尉誓百官於尙書省曰某日祀某神祇于某所各揚其職不供其事國有常刑於是乃齋皇帝散齋于別殿致齋其二日于太極殿一日于行宮前致齋一日尙舍奉御設御幄於太極殿西序及室內皆東向尙舍直長張帷於前楹下致齋之日質明諸衛勒所部屯門列仗晝漏上水

一刻侍中版奏請中嚴諸衛之屬各督其隊入陳於殿庭通事舍人引文武五品以上袴褶陪位諸侍衛之官服其器服諸侍臣齋者結佩詣閣奉迎二刻侍中版奏外辦三刻皇帝服袞冕結佩乘輿出自西房曲直華蓋警蹕侍衛卽御座東向侍臣夾侍一刻頃侍中前跪奏稱侍中臣某言請就齋室皇帝降座入室文武侍臣還本司陪位者以次出凡豫祀之官散齋理事如舊唯不弔喪問疾不作樂不判署刑殺文書不行刑罰不預穢惡致齋唯行祀事其祀官已齋而闕者攝其餘清齋一日三日陳設其別有五有侍事之次有卽事之位有門外之位有牲器之位有席神之位前祀三日尙舍直長施大次於外壝東門之內道北南向衛尉設文武侍臣之次於其前左右相向設祀官次於東壝之外道南從祀文官九品於其東東方南方朝集使又於其東蕃客又於其東重行異位北向西上介公鄴公於西壝之外道南武官九品於其西西方北方朝集使又於其西蕃客又於其西東上其褒聖侯若在朝位於文官三品下設陳饌幔於內壝東西門之外道北南向北門之外道東西向明日奉禮郎設御位於壇之東南西向望

燎位當柴壇之北南向祀官公卿位於內壝東門之內道南分獻之官於公卿之南執事者又於其後異位重行西向北上御史位於壇下一在東南西向一在西南東向奉禮郎位於樂縣東北贊者在南差退皆西向又設奉禮郎贊者位於燎壇東北西向皆北上協律郎位於壇上南陛之西東向太樂令位於北縣之間當壇北向從祀文官九品位於執事之南東方南方朝集使又於其南蕃客又於其南西向北上介公儻公位於中壝西門之內道南武官九品又於其南西方北方朝集使又於其南蕃客又於其南東向北上所以卽而行事也又設祀官及從祀羣官位於東西壝門之外如設次所以省牲及祀之日將入而序立也設牲勝於東壝之外當門西向蒼牲一居前又蒼牲一又青牲一在北少退南上次赤牲一次黃牲一白牲一玄牲一又赤牲一白牲一在南少退北上廩犧令位於牲西南祝史陪其後皆北向諸太祝位於牲東各當牲後祝史陪其後西向太常卿位於牲前少北御史位於其西皆南向又設酒尊之位上帝太尊著尊犧尊山壘各二在壇上東南隅北向象尊壺尊山壘各二在壇

下南陛之東北向俱西上配帝著尊犧尊象尊山壘各二在壇上於上帝酒尊

之東北向西上五帝日月各太尊二在第一等內官每陛間各象尊二在第二

等中官每陛間各壺尊二在第三等外官每道間各概尊二於下壇下衆星每

道間各散尊二於內壝之外凡尊設於神座之左而右向尊皆加勺幕五帝日月以上皆有坫以置

也設御洗於午陛東南亞獻終獻同洗於卯陛之南皆北向壘水在洗東篚在

洗西南肆篚實以中爵也分獻壘洗篚冪各於其方陛道之左內向執尊壘篚冪者各

立於其後玉幣之篚於壇上下尊坫之所前祀一日晡後太史令郊社令各常

服帥其屬升設昊天上帝神座於壇上北方南向席以橐秸高祖神堯皇帝神

座於東方西向席以莞五方帝日月於壇第一等青帝於東陛之北赤帝於南

陛之東黃帝於南陛之西白帝於西陛之南黑帝於北陛之西大明於東陛之

南夜明於西陛之北席皆以橐秸五星十二辰河漢及內官五十有五於第二

等十有二陛之間各依其方席皆內向其內官有北辰座於東陛之北曜魄寶

於北陛之西北斗於南陛之東天一太一皆在北斗之東五帝內座於曜魄寶

之東皆差在前二十八宿及中官一百五十有九於第三等其二十八宿及帝座七公日星帝席大角攝提太微太子明堂軒轅三台五車諸王月星織女建星天紀等一十有七皆差在前外官一百有五於內壝之內衆星三百六十於內壝之外各依方次十有二道之間席皆以莞若在宗廟則前享三日尙舍直長施大次於廟東門之外道北南向守宮設文武侍臣次於其後文左武右俱南向設諸享官九廟子孫於齋坊內道東近南西向北上文官九品又於其南東方南方蕃客又於其南西向北上介公讜公於廟西門之外近南武官九品於其南西方北方蕃客又於其南東向北上前享一日奉禮郎設御位於廟東南南向設享官公卿位於東門之內道南執事者位於其後西向北上御史位於廟堂之下一在東南西向一在西南東向令史各陪其後奉禮郎位於樂縣東北贊者二人在南差退俱西向協律郎位於廟堂上前楹之間近西東向太樂令位於北縣之間北向設從享之官位九廟子孫於享官公卿之南昭穆異位文官九品以上又於其南東方南方蕃客又於其南西向北上介公讜公位

於西門之內道南武官九品於其南少西西方北方蕃客又於其南東向北上設牲牓於東門之外如郊之位設尊彝之位於廟堂之上下每座設彝一黃彝一犧尊象尊著尊山壘各二在堂上皆於神座之左獻祖太祖高祖高宗尊彝在前楹間北向懿祖代祖太宗中宗睿宗尊彝在戶外南向各有坫焉其壺尊二太尊二山壘四皆在堂下階間北向西上簋鉶邊豆在堂上俱東側階之北每座四簋居前四簋次之六登次之六鉶次之邊豆爲後皆以南爲上屈陳而下御洗在東階東南亞獻又於東南俱北向壘水在洗東篚在洗西南肆享日未明五刻太廟令服其服布昭穆之座於戶外自西序以東獻祖太祖高祖高宗皆北廂南向懿祖代祖太宗中宗睿宗南廂北向每座黼辰莞席紛純藻席畫純次席黼純左右几四曰省牲器省牲之日午後十刻去壇二百步所禁行人晡後二刻郊社令丞帥府史三人及齋郎以尊坫壘洗篚罍入設於位三刻謁者贊引各引祀官公卿及牲皆就位謁者引司空贊引引御史入詣壇東陛升行掃除於上降行樂縣於下初司空將升謁者引太常卿贊引引御史入詣

壇東陞升視滌濯降就省牲位南向立廩犧令少前曰請省牲太常卿省牲廩犧令北面舉手曰牯諸太祝各循牲一匝西向舉手曰充諸太祝與廩犧令以次牽牲詣廚授太官謁者引光祿卿詣廚省鼎鑊申視濯漑祀官御史省饌具乃還齋所祀日未明十五刻太官令帥宰人以鸞刀割牲祝史以豆取毛血各置於饌所遂烹牲其于廟亦如之五曰奠玉帛祀日未明三刻郊社令良醢令各帥其屬入實尊壘太祝以玉幣置於筐太官令帥進饌者實諸籩豆簋簠於饌幔未明二刻奉禮郎帥贊者先入就位贊者引御史博士諸太祝及令史祝史與執事者入自東門壇南北向西上奉禮郎曰再拜贊者承傳御史以下皆再拜執尊壘篚冪者各就位贊者引御史諸太祝升壇東陞御史一人太祝二人行掃除於上及第一等御史一人太祝七人行掃除於下未明一刻謁者贊引各引羣臣就門外位太樂令帥工人二舞以次入文舞陳於縣內武舞立於縣南謁者引司空入奉禮郎曰再拜司空再拜升自東陞行掃除於上降行樂縣於下謁者贊引各引羣臣入就位初未明三刻諸衛列大駕仗衛侍中版奏

請中嚴乘黃令進王輅於行宮南門外南向未明一刻侍中版奏外辦皇帝服
袞冕乘輿以出皇帝升輅如初黃門侍郎奏請進發至大次門外南向侍中請
降輅皇帝降輅乘輿之次半刻頃太常博士引太常卿立於大次外當門北向
侍中版奏外辦質明皇帝服大裘而冕博士引太常卿太常卿引皇帝至中壝
門外殿中監進大珪尚衣奉御又以鎮珪授殿中監以進皇帝搢大珪執鎮珪
禮部尚書與近侍者從皇帝至版位西向立太常卿前奏請再拜皇帝再拜奉
禮郎曰衆官再拜在位者皆再拜太常卿前曰有司謹具請行事協律郎跪俛
伏舉麾樂舞六成偃麾戩敵樂止太常卿前奏請再拜皇帝再拜奉禮郎曰衆
官再拜在位者皆再拜諸太祝跪取玉幣於篚各立於尊所皇帝升壇自南陛
北向立太祝以玉幣授侍中東向以進皇帝搢鎮珪受之跪奠於昊天上帝俛
伏興少退再拜立於西方東向太祝以幣授侍中以進皇帝受幣跪奠於高祖
神堯皇帝俛伏興拜降自南陛復于位皇帝將奠配帝之幣謁者七人分引獻
官奉玉幣俱進跪奠於諸神之位祝史齋郎助奠初衆官再拜祝史各奉毛血

之豆入各由其陞升諸太祝迎取於壇上奠之退立於尊所若宗廟曰晨裸享日未明四刻太廟令良醞令各帥其屬入實尊疊太官令帥進饌者實諸籩豆簋盥未明三刻奉禮郎帥贊者先入就位贊者引御史博士宮闈令太祝及令史祝史與執事者入自東門當階間北向西上奉禮郎曰再拜御史以下皆再拜執尊疊篚冪者各就位贊者引御史諸太祝升自東階行掃除於堂上令史祝史行掃除於下太廟令帥其屬陳瑞物太階之西上瑞爲前列次瑞次之下瑞爲後又陳伐國寶器亦如之皆北向西上藉以席未明二刻陳腰輿於東階之東每室各二皆西向北上贊者引太廟令太祝宮闈令帥內外執事者以腰輿升自東階入獻祖室開堦室太祝宮闈令奉神主各置於輿出置於座次出懿祖以下神主如獻祖鑾駕將至謁者贊者各引享官通事舍人分引從享羣臣九廟子孫諸方客使皆就門外位鑾駕至大次門外回輅南向將軍降立於輅右侍中請降輅皇帝降輅乘輿之大次通事舍人引文武五品以上從享之官皆就門外位太樂令帥工人二舞入謁者引司空入就位奉禮郎曰再拜司

空再拜升自東階行掃除於堂上降行樂縣於下初司空行樂縣謁者贊引各引享官通事舍人分引九廟子孫從享羣官諸方客使入就位皇帝停大次半刻頃侍中版奏外辦皇帝出太常卿引皇帝至廟門外殿中監進鎮珪皇帝執鎮珪近侍者從入皇帝至版位西向立太常卿前曰再拜皇帝再拜奉禮郎曰衆官再拜在位者皆再拜太常卿前曰有司謹具請行事協律郎舉麾鼓祝樂舞九成偃麾戛歌樂止太常卿曰再拜皇帝再拜奉禮郎曰衆官再拜在位者皆再拜皇帝詣壘洗侍中跪取匜與沃水又跪取盤與承水皇帝搯珪盥手黃門侍郎跪取巾於篚與以悅受巾跪奠於篚又取瓚於篚與以進皇帝受瓚侍中酌水奉盤皇帝洗瓚黃門侍郎授巾如初皇帝拭瓚升自阼階就獻祖尊彝所執尊者舉冪侍中贊酌鬱酒進獻祖神座前北向跪以鬯裸地奠之俛伏與少退北向再拜又就懿祖尊彝所執尊者舉冪侍中取瓚於坩以進皇帝受瓚侍中贊酌鬱酒進懿祖神座前南向跪以鬯裸地奠之次裸太祖以下皆如懿祖皇帝降自阼階復于版位初羣官已再拜祝史各奉毛血及肝膋之豆立於

東門外齋郎奉爐炭蕭稷黍各立於其後以次入自正門升自太階諸太祝各
迎取毛血肝膋於階上進奠於神座前祝史退立於尊所齋郎奉爐炭置於神
座之左其蕭稷黍各置於其下降自阼階以出諸太祝取肝膋燔於爐還尊所

唐書卷十一

引享官禮部合入全朝大獻于深養平章實是官官人地位是幸做大

項台申版版外款是出太常卿引主命正禮外中書樞密注里

項台申版版外款是出太常卿引主命正禮外中書樞密注里

項台申版版外款是出太常卿引主命正禮外中書樞密注里

項台申版版外款是出太常卿引主命正禮外中書樞密注里

項台申版版外款是出太常卿引主命正禮外中書樞密注里

項台申版版外款是出太常卿引主命正禮外中書樞密注里

項台申版版外款是出太常卿引主命正禮外中書樞密注里

項台申版版外款是出太常卿引主命正禮外中書樞密注里

項台申版版外款是出太常卿引主命正禮外中書樞密注里

項台申版版外款是出太常卿引主命正禮外中書樞密注里

項台申版版外款是出太常卿引主命正禮外中書樞密注里

項台申版版外款是出太常卿引主命正禮外中書樞密注里

項台申版版外款是出太常卿引主命正禮外中書樞密注里

唐書卷十二

宋 翰 林 學 士 歐 陽 修 撰

禮樂志第二

六曰進熟皇帝既升奠玉幣太官令帥進饌者奉饌各陳於內壝門外謁者引司徒出詣饌所司徒奉昊天上帝之俎太官令引饌入門各至其陛祝史俱進跪徹毛血之豆降自東陛以出諸太祝迎饌於壇上司徒太官令俱降自東陛以出又進設外官衆星之饌皇帝詣盪洗盥手洗爵升壇自南陛司徒升自東陛立於尊所齋郎奉俎從升立於司徒後皇帝詣上帝尊所執尊者舉冪侍中贊酌汎齊進昊天上帝前北向跪奠爵與少退立太祝持版進於神右東向跪讀祝文曰維某年歲次月朔日嗣天子臣某敢昭告于昊天上帝皇帝再拜詣配帝酒尊所執尊者舉冪侍中取爵於坫以進皇帝受爵侍中贊酌汎齊進高祖神堯皇帝前東向跪奠與少退立太祝持版進於左北向跪讀祝文曰維某年歲次月朔日曾孫開元神武皇帝臣某敢昭告于高祖神堯皇帝皇帝再拜

進昊天上帝前北向立太祝各以爵酌上尊福酒合置一爵太祝持爵授侍中以進皇帝再拜受爵跪祭酒啐酒奠爵俛伏興太祝各帥齋郎進俎太祝減神前胙肉共置一俎授司徒以進皇帝受以授左右皇帝跪取爵遂飲卒爵侍中進受虛爵復於坵皇帝俛伏興再拜降自南陛復于位文舞出武舞入初皇帝將復位謁者引太尉詣疊洗盥手洗匏爵自東陛升壇詣昊天上帝著尊所執尊者舉冪太尉酌醴齊進昊天上帝前北向跪奠爵興再拜詣配帝犧尊所取爵於坵酌醴齊進高祖神堯皇帝前東向跪奠爵興再拜進昊天上帝前北向立諸太祝各以爵酌福酒合置一爵進于右西向立太尉再拜受爵跪祭酒遂飲卒爵太祝進受虛爵復於坵太尉再拜降復位初太尉獻將畢謁者引光祿卿詣疊洗盥手洗匏爵升酌盎齊終獻如亞獻太尉將升獻謁者七人分引五方帝及大明夜明等獻官詣疊洗盥手洗匏爵各由其陛升酌汎齊進跪奠於神前初第一等獻官將升謁者五人次引獻官各詣疊洗盥洗各由其陛升壇詣第二等內官酒尊所酌汎齊以獻贊者四人次引獻官詣疊洗盥洗詣外官

酒尊所酌清酒以獻贊者四次引獻官詣盪洗盥洗詣衆星酒尊所酌昔酒以獻其祝史齋郎酌酒取奠皆如內官上下諸祝各進跪徹豆還尊所奉禮郎曰賜胙贊者曰衆官再拜在位者皆再拜太常卿前奏請再拜皇帝再拜奉禮郎曰衆官再拜在位者皆再拜樂作一成太常卿前奏請就望燎位皇帝就位南向立上下諸祝各執篚取玉幣祝版禮物以上齋郎以俎載牲醴稷黍飯及爵酒各由其陞降壇詣柴壇自南陞登以幣祝版饌物置於柴上戶內諸祝又以內官以下禮幣皆從燎奉禮郎曰可燎東西面各六人以炬燎火半柴太常卿前曰禮畢皇帝還大次出中壝門殿中監前受鎮珪以授尙衣奉御殿中監又前受大珪皇帝入次謁者贊引各引祀官通事舍人分引從祀羣官諸方客使以次出贊者引御史太祝以下俱復執事位奉禮郎曰再拜御史以下皆再拜出工人二舞以次出若宗廟曰饋食皇帝既升裸太官令出帥進饌者奉饌陳於東門之外西向南上謁者引司徒出詣饌所司徒奉獻祖之俎太官引饌入自正門至于太階祝史俱進徹毛血之豆降自阼階以出諸太祝迎饌於階

上設之乃取蕭稷黍濡於脂燔於爐太常卿引皇帝詣疊洗盥手洗爵升自阼階詣獻祖尊彝所執尊者舉冪侍中贊酌汎齊進獻祖前北向跪奠爵又詣尊所侍中取爵於坵以進酌汎齊進神前北向跪奠爵退立太祝持版進於神右東面跪讀祝文曰維某年歲次月朔日孝曾孫開元神武皇帝某敢昭告于獻祖宣皇帝祖妣宣莊皇后張氏皇帝再拜又再拜奠詣懿祖尊彝酌汎齊進神前南向跪奠爵少西俛伏興又酌汎齊進神前南向跪爵少東退立祝史西面跪讀祝文皇帝再拜又再拜次奠太祖代祖高祖太宗高宗中宗睿宗皆如懿祖乃詣東序西向立司徒升自阼階立於前楹間北面東上諸太祝各以爵酌上尊福酒合置一爵太祝持爵授侍中以進皇帝再拜受爵跪祭酒啐酒奠爵俛伏興諸太祝各帥齋郎進俎太祝減神前三牲胙肉共置一俎上以黍稷飯共置一籩授司徒以進太祝又以胙肉授司徒以進皇帝每受以授左右乃跪取爵飲卒爵侍中進受虛爵以授太祝復於坵皇帝降自阼階復于版位文舞出武舞入初皇帝將復位太尉詣疊洗盥手洗爵升自阼階詣獻祖尊彝所酌

醴齊進神前北向跪奠爵少東與再拜又取爵於坵酌醴齊進神前北向跪奠爵少西北向再拜次奠懿祖太祖代祖高祖太宗高宗中宗睿宗如獻祖乃詣東序西向立諸太祝各以爵酌福酒合置一爵太祝持爵進於左北向立太尉再拜受爵跪祭酒遂飲卒爵太祝進受爵復於坵太尉與再拜復于位初太尉獻將畢謁者引光祿卿詣壘洗盥洗升酌盞齊終獻如亞獻諸太祝各進徹豆還尊所奉禮郎曰賜胙贊者曰衆官再拜在位者皆再拜太常卿前奏請再拜皇帝再拜奉禮郎曰衆官再拜在位者皆再拜樂一成止太常卿前曰禮畢皇帝出門殿中監前受鎮珪通事舍人謁者贊引各引享官九廟子孫及從享羣官諸方客使以次出贊引引御史太祝以下俱復執事位奉禮郎曰再拜御史以下皆再拜以出工人二舞以次出太廟令與太祝宮闈令帥腰輿升納神主其祝版燔於齋坊七祀各因其時享司命戶以春竈以夏中霤以季夏土王之日門厲以秋行以冬時享之日太廟令布神席于廟庭西門之內道南東向北上設酒尊於東南壘洗又於東南太廟令良醞令實尊篚太官丞引饌光祿卿

升終獻獻官乃卽事一獻而止其配享功臣各位於其廟室太階之東少南西向以北爲上壺尊二於坐左設洗於終獻洗東南北向以太官令奉饌廟享已亞獻然後獻官卽事而助奠者分奠一獻而止此冬至祀昊天上帝于圓丘孟冬祫于太廟之禮在乎壇壝宗廟之間禮盛而物備者莫過乎此也其壇堂之上下壝門之內外次位之尊卑與其向立之方出入降登之節大抵可推而見其盛且備者如此則其小且略者又可推而知也至於壇坫神位尊爵玉幣籩豆簠簋牲牢冊祝之數皆略依古四成而成高八尺一寸下成廣二十丈而五減之至于五丈而十有二陛者圓丘也八觚三成成高四尺上廣十有六步設八陛上陛廣八尺中陛一丈下陛丈有二尺者方丘也高廣皆四丈者神州之壇也其廣皆四丈而高八尺者青帝七尺者赤帝五尺者黃帝九尺者白帝六尺者黑帝之壇也廣四丈高八尺者朝日之壇也爲坎深三尺縱廣四丈壇於其中高一尺方廣四丈者夕月之壇也廣五丈以五土爲之者社稷之壇也高尺廣丈蜡壇也高五尺周四十步者先農先蠶之壇也其高皆三尺廣皆丈者

小祀之壇也嶽鎮海瀆祭於其廟無廟則爲之壇於坎廣一丈四向爲陛者海瀆之壇也廣二丈五尺高三尺四出陛者古帝王之壇也廣一丈高一丈二尺戶方六尺者大祀之燎壇也廣八尺高一丈戶方三尺者中祀之燎壇也廣五尺戶方二尺者小祀之燎壇也皆開上南出瘞坎皆在內壝之外壬地南出陛方深足容物此壇埴之制也冬至祀昊天上帝於圓丘以高祖神堯皇帝配東方青帝靈威仰南方赤帝赤熛怒中央黃帝含樞紐西方白帝白招拒北方黑帝汁光紀及大明夜明在壇之第一等天皇大帝北辰北斗天一太一紫微五帝座並差在行位前餘內官諸座及五星十二辰河漢四十九座在第二等十有二陛之間中官市垣帝座七公日星帝席大角攝提太微五帝太子明堂軒轅三台五車諸王月星織女建星天紀十七座及二十八宿差在前列其餘中官一百四十二座皆在第三等十二陛之間外官一百五在內壝之內衆星三百六十在內壝之外正月上辛祈穀祀昊天上帝以高祖神堯皇帝配五帝在四方之陛孟夏雩祀昊天上帝以太宗文武聖皇帝配五方帝在第一等五帝

在第二等五官在壇下之東南季秋祀昊天上帝以睿宗大聖真皇帝配五方
帝在五室五帝各在其左右五官在庭各依其方立春祀青帝以太皞氏配歲
星三辰在壇下之東北七宿在西北句芒在東南立夏祀赤帝以神農氏配熒
惑三辰七宿祝融氏之位如青帝季夏土王之日祀黃帝以軒轅氏配鎮星后
土氏之位如赤帝立秋祀白帝以少昊氏配太白三辰七宿蓐收之位如赤帝
立冬祀黑帝以顓頊氏配辰星三辰七宿玄冥氏之位如白帝蜡祭百神大明
夜明在壇上神農伊耆各在其壇上后稷在壇東五官田峻各在其方五星十
二次二十八宿五方之岳鎮海瀆山林川澤丘陵墳衍原隰井泉各在其方之
壇龍鱗朱鳥騶虞玄武鱗羽羸毛介水墉坊郵表礮於菟貓各在其方壇之後
夏至祭皇地祇以高祖配五方之岳鎮海瀆原隰丘陵墳衍在內壝之內各居
其方而中岳以下在西南孟冬祭神州地祇以太宗配社以后土稷以后稷配
吉亥祭神農以后稷配而朝日夕月無配席尊者以稟結卑者以莞此神位之
序也太尊實汎齊著尊實醴齊犧尊實盎齊山壘實酒皆二以象尊實醴齊

壺尊實汎齊皆二山壘實酒四以祀昊天上帝皇地祇神州地祇以著尊實汎
齊犧尊實醴齊象尊實盎齊山壘實酒皆二以祀配帝以著尊二實醴齊以祀
內官以犧尊二實盎齊以祀中官以象尊二實醴齊以祀外官以壺尊二實昔
酒以祀衆星日月以上皆有坩迎氣五方帝五人帝以六尊惟山壘皆減上帝
之半五方帝大享於明堂太尊著尊犧尊山壘各二五方帝從祀於圓丘以太
尊實汎齊皆二五人帝從享於明堂以著尊實醴齊皆二日月以太尊實醴齊
著尊實盎齊皆二以山壘實酒一從祀於圓丘以太尊二實汎齊神州地祇從
祀於方丘以太尊二實汎齊五官五星三辰后稷以象尊實醴齊七宿以壺尊
實沈齊皆二蜡祭神農伊耆氏以著尊皆二實盎齊田畯龍鱗朱鳥騶虞玄武
以壺尊實沈齊鱗羽羸毛介丘陵墳衍原隰井泉水墉坊郵表啜虎貓昆蟲以
散尊實沈酒皆二嶽鎮海瀆以山尊實醴齊山林川澤以蜃尊實沈齊皆二伊
耆氏以上皆有坩太社以太壘實醴齊著尊實盎齊皆二山壘一太稷后稷氏
亦如之其餘中祀皆以犧尊實醴齊象尊實盎齊山壘實酒皆二小祀皆以象

尊二實醴齊宗廟祫享室以學彝實明水黃彝實鬯皆一犧尊實汎齊象尊實醴齊著尊實盎齊山罍實酒皆二設堂上壺尊實醴齊太尊實沈齊山罍實酒皆二設堂下禘享雞彝鳥彝一時享春夏室以雞彝鳥彝一秋冬以學彝黃彝一皆有坵七祀及功臣配享以壺尊二實醴齊別廟之享春夏以雞彝實明水鳥彝實鬯皆一犧尊實醴齊象尊實盎齊山罍實酒皆二秋冬以學彝黃彝皆一著尊壺尊山罍皆二太子之廟以犧尊實醴齊象尊實盎齊山罍實酒皆二凡祀五齊之上尊必皆實明水山罍之上尊必皆實明酒小祀之上尊亦實明水此尊爵之數也冬至祀昊天上帝以蒼璧上辛明堂以四圭有邸與配帝之幣皆以蒼內官以下幣如方色皇地祇以黃琮與配帝之幣皆以黃青帝以青圭赤帝以赤璋黃帝以黃琮白帝以白琥黑帝以黑璜幣如其玉日以圭璧幣以青月以圭璧幣以白神州社稷以兩圭有邸幣以黑嶽鎮海瀆以兩圭有邸幣如其方色神農之幣以赤伊耆以黑五星以方色先農之幣以青先蠶之幣以黑配坐皆如之宅祀幣皆以白其長丈八尺此玉幣之制也冬至祀圓丘昊

天上帝配帝籩十二豆十二簋一籩一瓚一俎一五方上帝大明夜明籩八豆
八簋一籩一瓚一俎一五星十二辰河漢及內官中官籩二豆二簋一籩一俎
一外官衆星籩豆簋籩俎各一正月上辛祈穀圓丘昊天配帝五方帝如冬至
孟夏雩祀圓丘昊天配帝五方帝如冬至五人帝籩四豆四簋一籩一俎一五
官籩二豆二簋一籩一俎一季秋大享明堂如雩祀立春祀青帝及太昊氏籩
豆皆十二簋一籩一瓚一俎一歲星三辰句芒七宿籩二豆二簋一籩一俎一
其赤帝黃帝白帝黑帝皆如之蜡祭百神大明夜明籩十豆十簋一籩一瓚一
俎一神農伊耆籩豆各四簋籩瓚各一五星十二辰后稷五方田峻岳鎮海瀆
二十八宿五方山林川澤籩豆各二簋籩俎各一丘陵墳衍原隰龍鱗朱鳥白
虎玄武鱗羽毛介於菟等籩豆各一簋籩俎各一又井泉籩豆各一簋籩俎各
一春分朝日秋分夕月籩十豆十簋一籩一瓚一俎一四時祭風師雨師靈星
司中司命司人司祿籩八豆八簋一籩一俎一夏至祭方丘皇地祇及配帝籩
豆皆十二簋一籩一瓚一俎一神州籩四豆四簋一籩一瓚一俎一其五嶽四

鎮四海四瀆及五方山川林澤籩二豆二簋籩俎各一孟冬祭神州及配帝籩豆皆十二簋一籩一瓚一俎一春秋祭太社太稷及配坐籩豆皆十簋二簋二鉶三俎三四時祭馬祖馬社先牧馬步籩豆皆八簋一籩一俎一時享太廟每室籩豆皆十二簋二籩二瓚三鉶三俎三七祀籩二豆二簋二籩二俎二祫享功臣配享如七祀孟春祭帝社及配坐籩豆皆十簋二籩二瓚三鉶三俎三季春祭先蠶籩豆皆十簋二籩二瓚三鉶三俎三孟冬祭司寒籩豆皆八簋一籩一俎一春秋釋奠於孔宣父先聖先師籩豆十簋二籩二瓚三鉶三俎三若從祀籩豆皆二籩一籩一俎一春秋釋奠於齊太公留侯籩豆皆十簋二籩二瓚三鉶三俎三仲春祭五龍籩豆皆八簋一籩一俎一四時祭五岳四鎮四海四瀆各籩豆十簋二籩二俎三三年祭先代帝王及配坐籩豆皆十簋二籩二俎三州縣祭社稷先聖釋奠於先師籩豆皆八簋二籩二俎三籩以石鹽橐魚棗栗榛菱芡之實鹿脯白餅黑餅糗餌粉粢豆以韭菹醢醢菁菹鹿醢芹菹兔醢荀菹魚醢脾析菹豚胎鮓食糝食中祀之籩無糗餌粉粢豆無鮓食糝食小祀

之籩無白餅黑餅豆無脾析菹豚胎凡用皆四者籩以石鹽棗實栗黃鹿脯豆以芹菹兔醢菁菹鹿醢用皆二者籩以栗黃牛脯豆以葵菹鹿醢用皆一者籩以牛脯豆以鹿醢用牛脯者通以羊凡簋簠皆一者簋以稷籩以黍用皆二者簋以黍稷籩以稻梁實甗以大羹鉶以肉羹此籩豆簋簠甗鉶之實也昊天上帝蒼犢五方帝方色犢大明青犢夜明白犢神州地祇黑犢配帝之犢天以蒼地以黃神州以黑皆一宗廟太社太稷帝社先蠶古帝王嶽鎮海瀆皆太牢社稷之牲以黑五官五星三辰七宿皆少牢蜡祭神農氏伊耆氏少牢后稷及五方十二次五官五田峻五嶽四鎮海瀆日月方以犢二星辰以降方皆少牢五井泉皆羊一非順成之方則闕風師雨師靈星司中司命司人司祿馬祖先牧馬社馬步皆羊一司寒黑牲一凡牲在滌大祀九甸中祀三甸小祀一甸養而不卜無方色則用純必有副焉省牲而犢鳴則免之而用副禁其捶拊死則瘞之創病者請代犢告祈之牲不養凡祀皆以其日未明十五刻太官令帥宰人以鸞刀割牲祝史以豆斂毛血置饌所祭則奉之以入遂亨之肉載以俎皆升

右胖體十一前節三肩臂臑後節二肫脰正脊一艇脊一橫脊一正脊一短脊
一代脊一皆並骨別祭用太牢者酒二斗脯一段醢四合用少牢者酒減半此
牲牢之別也祝版其長一尺一分廣八寸厚二分其木梓楸凡大祀中祀署版
必拜皇帝親祠至大次郊社令以祝版進署受以出奠於坵宗廟則太廟令進
之若有司攝事則進而御署皇帝北向再拜侍臣奉版郊社令受以出皇后親
祠則郊社令預送內侍享前一日進署后北向再拜近侍奉以出授內侍送享
所享日之平明女祝奠於坵此冊祝之制也

唐書卷十二

唐書卷十二考證

禮樂志二古帝王嶽鎮海瀆○此句下通典有孔宣父齊太公諸太子廟十字

今本缺

唐書卷十二考證

唐書卷十三

宋 翰 林 學 士 歐 陽 修 撰

禮樂志第三

自周衰禮樂壞于戰國而廢絕于秦漢興六經在者皆錯亂散亡雜僞而諸儒方共補緝以意解詁未得其真而讖緯之書出以亂經矣自鄭玄之徒號稱大儒皆主其說學者由此牽惑沒溺而時君不能斷決以爲有其舉之莫可廢也由是郊丘明堂之論至於紛然而莫知所止禮曰以禋祀祀昊天上帝此天也玄以爲天皇帝者北辰耀魄寶也又曰兆五帝於四郊此五行精氣之神也玄以爲青帝靈威仰赤帝赤熛怒黃帝含樞紐白帝白招拒黑帝汁光紀者五天也由是有六天之說後世莫能廢焉唐初貞觀禮冬至祀昊天上帝于圓丘正月辛日祀感生帝靈威仰于南郊以祈穀而孟夏雩于南郊季秋大享于明堂皆祀五天帝至高宗時禮官以謂太史圓丘祭昊天上帝在壇上而耀魄寶在壇第一等則昊天上帝非耀魄寶可知而祠令及顯慶禮猶著六天之說顯

慶二年禮部尙書許敬宗與禮官等議曰六天出於緯書而南郊圓丘一也玄以爲二物郊及明堂本以祭天而玄皆以爲祭太微五帝傳曰凡祀啓蟄而郊郊而後耕故郊祀后稷以祈農事而玄謂周祭感帝靈威仰配以后稷因而祈穀皆繆論也由是盡黜玄說而南郊祈穀孟夏雩明堂大享皆祭昊天上帝乾封元年詔祈穀復祀感帝二年又詔明堂兼祀昊天上帝及五帝開元中起居舍人王仲丘議曰按貞觀禮祈穀祀感帝而顯慶禮祀昊天上帝傳曰郊而後耕詩曰噫嘻春夏祈穀于上帝禮記亦曰上辛祈穀于上帝而鄭玄乃云天之五帝迭王王者之興必感其一因別祭尊之故夏正之月祭其所生之帝於南郊以其祖配之故周祭靈威仰以后稷配因以祈穀然則祈穀非祭之本意乃因后稷爲配爾此非祈穀之本義也夫祈穀本以祭天也然五帝者五行之精所以生九穀也宜於祈穀祭昊天而兼祭五帝又曰月令大雩大享帝皆盛祭也而孟夏雩季秋大享貞觀禮皆祭五方帝而顯慶禮皆祭昊天上帝宜兼用之以合大雩大享之義既而蕭嵩等譏定開元禮雖未能合古而天神之位別

矣其配神之主武德中冬至及孟夏雩祭皇地祇于方丘神州地祇於北郊以景帝配而上辛祈穀祀感帝于南郊季秋祀五方天帝於明堂以元帝配貞觀初圓丘明堂北郊以高祖配而元帝惟配感帝高宗永徽二年以太宗配祀明堂而有司乃以高祖配五天帝太宗配五人帝太尉長孫无忌等與禮官議以謂自三代以來歷漢魏晉宋無父子同配於明堂者祭法曰周人禘饗而郊稷祖文王而宗武王鄭玄以祖宗合爲一祭謂祭五帝五神于明堂以文武共配而王肅駁曰古者祖功宗德自是不毀之名非謂配食於明堂春秋傳曰禘郊祖宗報五者國之典祀也以此知祖宗非一祭於是以高祖配于圓丘太宗配于明堂乾封二年詔圓丘五方明堂感帝神州皆以高祖太宗並配則天垂拱元年詔有司議而成均助教孔玄義太子右諭德沈伯儀鳳閣舍人元萬頃范履冰議皆不同而卒用萬頃履冰之說由是郊丘諸祠常以高祖太宗高宗並配開元十一年親享圓丘中書令張說衛尉少卿韋縉爲禮儀使乃以高祖配而罷三祖並配至二十年蕭高等定禮而祖宗之配定矣寶應元年太常卿杜

鴻漸禮儀使判官薛頴歸崇敬等言禘者冬至祭天於圓丘周人配以遠祖唐高祖非始封之君不得爲太祖以配天地而太祖景皇帝受封于唐卽殷之契周之后稷也請以太祖郊配天地諫議大夫黎幹以謂禘者宗廟之事非祭天而太祖非受命之君不宜作配爲十詰十難以非之書奏不報乃罷高祖以景皇帝配明年旱言事者以爲高祖不得配之過也代宗疑之詔羣臣議太常博士獨孤及議曰受命於神宗禹也而夏后氏祖顓頊而郊鯀纘禹黜夏湯也而殷人郊冥而祖契革命作周武王也而周人郊稷而祖文王太祖景皇帝始封于唐天所命也由是配享不易嗚呼禮之失也豈獨緯書之罪哉在於學者好爲曲說而人君一切臨時申其私意以增多爲盡禮而不知煩數之爲黷也古者祭天於圓丘在國之南祭地於澤中之方丘在國之北所以順陰陽因高下而事天地以其類也其方位旣別而其燎壇瘞坎樂舞變數亦皆不同而後世有合祭之文則天天冊萬歲元年親享南郊始合祭天地睿宗卽位將有事於南郊諫議大夫賈曾議曰祭法有虞氏禘黃帝而郊饗夏后氏禘黃帝而郊鯀

郊之與廟皆有禘也禘於廟則祖宗合食於太祖禘於郊則地祇羣望皆合於圓丘以始祖配享蓋有事之大祭非常祀也三輔故事祭于圓丘上帝后土位皆南面則漢嘗合祭矣國子祭酒褚无量司業郭山惲等皆以曾言爲然是時睿宗將祭地於北郊故曾之議寢玄宗旣已定開元禮天寶元年遂合祭天地于南郊是時神仙道家之說興陳王府參軍田同秀言玄元皇帝降丹鳳門乃建玄元廟二月辛卯親享玄元皇帝廟甲午親享太廟丙申有事于南郊其後遂以爲故事終唐之世莫能改也爲禮者可不慎哉夫男女之不相褻於內外也况郊廟乎中宗時將享南郊國子祭酒祝欽明言皇后當助祭太常博士唐紹蔣欽緒以爲不可左僕射韋巨源獨以欽明說爲是於是以皇后爲亞獻補大臣李嶠等女爲齋娘以執籩豆焉至德宗貞元六年又以皇太子爲亞獻親王爲終獻孝經曰宗祀文王於明堂以配上帝而三代有其名而無其制度故自漢以來諸儒之論不一至於莫知所從則一切臨時增損而不能合言然推其本旨要於布政交神於王者尊嚴之居而已其制作何必與古同然爲之者

至無所據依乃引天地四時風氣乾坤五行數象之類以為倣像而眾說亦不
 克成隋無明堂而季秋大享常寓零壇唐高祖太宗時寓于圓丘貞觀中禮部
 尚書豆盧寬國子助教劉伯莊議從崑崙道上層以祭天下層以布政而太子
 中允孔穎達以為非侍中魏徵以謂五室重屋上圓下方上以祭天下以布政
 自前世儒者所言雖異而以為如此者多同至於高下廣狹丈尺之制可以因
 事制宜也秘書監顏師古曰周書敘明堂有應門雉門之制以此知為王者之
 常居爾其青陽總章玄堂太廟左右个皆路寢之名也文王居明堂之篇帶弓
 韜禮高禘九門礫禳國有酒以合三族推其事皆與月令合則皆在路寢也大
 戴禮曰在近郊又曰文王之廟也此奚足以取信哉且門有臯庫豈得施於郊
 野謂宜近在宮中徵及師古等皆當世名儒其論止於如此高宗時改元總章
 分萬年置明堂縣示欲必立之而議者益紛然或以為五室或以為九室而高
 宗依兩議以帟幕為之與公卿臨觀而議益不一乃下詔率意班其制度至取
 象黃琮上設鴟尾其言益不經而明堂亦不能立至則天始毀東都乾元殿以

其地立明堂其制淫侈無復可觀皆不足記其後火焚之既而又復立開元五年復以爲乾元殿而不毀初則天以木爲瓦夾紵漆之二十五年玄宗遣將作大匠康晷素毀之晷素以爲勞人乃去其上層易以真瓦而迄唐之世季秋大享皆寓圓丘書曰七世之廟可以觀德而禮家之說世數不同然自禮記王制祭法禮器大儒荀卿劉歆班固王肅之徒以爲七廟者多蓋自漢魏以來創業之君特起其上世微又無功德以備祖宗故其初皆不能立七廟唐武德元年始立四廟曰宣簡公懿王景皇帝元皇帝貞觀九年高祖崩太宗詔有司定議諫議大夫朱子奢請立太廟虛太祖之室以待於是尙書八座議禮曰天子三昭三穆與太祖之廟而七晉宋齊梁皆立親廟六此故事也制曰可於是祔弘農府君及高祖爲六室二十三年太宗崩弘農府君以世遠毀藏夾室遂祔太宗及高宗崩宣皇帝遷于夾室而祔高宗皆爲六室武氏亂敗中宗神龍元年已復京太廟又立太廟于東都議立始祖爲七廟而議者欲以涼武昭王爲始祖太常博士張齊賢議以爲不可因曰古者有天下者事七世而始封之君謂

之太祖太祖之廟百世不遷至禘祭則毀廟皆以昭穆合食于太祖商祖玄王周祖后稷其世數遠而遷廟之主皆出太祖後故合食之序尊卑不差漢以高皇帝爲太祖而太上皇不在合食之列爲其尊於太祖故也魏以武帝爲太祖晉以宣帝爲太祖武宣而上廟室皆不合食于禘至隋亦然唐受天命景皇帝始封之君太祖也以其世近而在三昭三穆之內而光皇帝以上皆以屬尊不列合食今宜以景皇帝爲太祖復祔宣皇帝爲七室而太祖以上四室皆不合食于禘博士劉承慶尹知章議曰三昭三穆與太祖爲七廟者禮也而王迹有淺深太祖有遠近太祖以功建昭穆以親崇有功者不遷親盡者則毀今以太祖近而廟數不備乃欲於昭穆之外遠立當遷之主以足七廟而乖迭毀之義不可天子下其議大臣禮部尚書祝欽明兩用其言於是以景皇帝爲始祖而不祔宣皇帝已而以孝敬皇帝爲義宗祔于廟由是爲七室而京太廟亦七室中宗崩中書令姚元之吏部尚書宋璟以謂義宗追尊之帝不宜列昭穆而其葬在洛州請立別廟于東都而有司時享其京廟神主藏于夾室由是祔中宗

而光皇帝不遷遂爲七室矣睿宗崩博士陳貞節蘇獻等議曰古者兄弟不相爲後殷之盤庚不序於陽甲漢之光武不嗣於孝成而晉懷帝亦繼世祖而不繼惠帝蓋兄弟相代昭穆位同至其當遷不可兼毀二廟荀卿子曰有天下者事七世謂從禰以上也若旁容兄弟上毀祖考則天子有不得事七世者矣孝和皇帝有中興之功而無後宜如殷之陽甲出爲別廟祔睿宗以繼高宗於是立中宗廟于太廟之西開元十年詔宣皇帝復祔于正室諡爲獻祖并諡光皇帝爲懿祖又以中宗還祔太廟於是太廟爲九室將親祔之而遇雨不克行乃命有司行事寶應二年祧獻祖懿祖祔玄宗肅宗自是之後常爲九室矣代宗崩禮儀使顏真卿議太祖高祖太宗皆不毀而代祖元皇帝當遷於是遷元皇帝而祔代宗德宗崩禮儀使杜黃裳議高宗在三昭三穆外當遷於是遷高宗而祔德宗蓋以中睿爲昭穆矣順宗崩當遷中宗而有司疑之以謂則天革命中宗中興之主也博士王涇史官蔣武皆以爲中宗得失在己非漢光武晉元帝之比不得爲中興不遷之君由是遷中宗而祔順宗自憲宗穆宗敬宗文宗

四世祔廟睿玄肅代以次遷至武宗崩德宗以次當遷而於世次爲高祖禮官始覺其非以謂兄弟不相爲後不得爲昭穆乃議復祔代宗而議者言已祧之主不得復入太廟禮官曰昔晉元明之世已遷豫章潁川後皆復祔此故事也議者又言廟室有定數而無後之主當置別廟禮官曰晉武帝時景文同廟廟雖六代其實七主至元帝明帝廟皆十室故賀循曰廟以容主爲限而無常數也於是復祔代宗而以敬宗文宗武宗同爲一代初玄宗之復祔獻祖也詔曰使親而不盡遠而不祧蓋其率意而言爾非本於禮也而後之爲說者乃遷就其事以謂三昭三穆與太祖祖功宗德三廟不遷爲九廟者周制也及敬文武三宗爲一代故終唐之世常爲九代十一室焉開元五年太廟四室壞奉其神主于太極殿天子素服避正殿輟朝三日時將行幸東都遂謁神主于太極殿而後行安祿山之亂宗廟爲賊所焚肅宗復京師設次光順門外嚮廟而哭輟朝三日其後黃巢陷京師焚毀宗廟而僖宗出奔神主法物從行皆爲賊所掠巢敗復京師素服哭于廟而後入初唐建東西二都而東都無廟則天皇后僭

號稱周立周七廟于東都以祀武氏改西京唐太廟爲享德廟神龍元年中宗復位遷武氏廟主于西京爲崇尊廟而以東都武氏故廟爲唐太廟祔光皇帝以下七室而親享焉由是東西二都皆有廟歲時並享其後安祿山陷兩京宗廟皆焚毀肅宗卽位西都建廟作主而東都太廟毀爲軍營九室神主亡失至大曆中始於人間得之寓于太微宮不復祔享自建中至于會昌議者不一或以爲東西二京宜皆有廟而舊主當瘞虛其廟以俟巡幸則載主而行或謂宜藏其神主于夾室或曰周豐洛有廟者因遷都乃立廟爾今東都不因遷而立廟非也又曰古者載主以行者惟新遷一室之主爾未有載羣廟之主者也至武宗時悉廢羣議詔有司擇日脩東都廟已而武宗崩宣宗竟以太微神主祔東都廟焉其追贈皇后追尊皇太后贈皇太子往往皆立別廟其近於禮者後世當求諸禮其不合於禮而出於私意者蓋其制作與其論議皆不足取焉故不著也宣宗已復河湟三州七關歸其功順宗憲宗而加諡號博士李稠請改作神主易書新諡右司郎中楊發等議以謂古者已祔之主無改作加諡追尊

非禮也始於則天然猶不改主易書宜以新諡寶冊告于陵廟可也是時宰相以謂士族之廟皆就易書乃就舊主易書新諡焉禘祫大祭也祫以昭穆合食于太祖而禘以審諦其尊卑此祫禘之義而爲禮者失之至於年數不同祖宗失位而議者莫知所從禮曰三年一祫五年一禘傳曰五年再殷祭高宗上元三年十月當祫而有司疑其年數太學博士史玄璨等議以爲新君喪畢而祫明年而禘自是之後五年而再祭蓋後禘去前禘五年而祫常在禘後三年禘常在祫後二年魯宣公八年禘僖公蓋二年喪畢而祫明年而禘至八年而再禘昭公二十年禘至二十五年又禘此可知也議者以玄璨等言有經據遂從之睿宗崩開元六年喪畢而祫明年而禘自是之後祫禘各自以年不相通數凡七祫五禘至二十七年禘祫並在一歲有司覺其非乃議以爲一禘一祫五年再殷宜通數而禘後置祫歲數遠近二說不同鄭玄用高堂隆先三而後二年再殷先二後三而邈以謂二禘相去爲月六十中分三十置一祫焉此最爲得遂用其說由是一禘一祫在五年之間合於再殷之義而置祫先後則不同焉

禮禘祫太祖位于西而東向其子孫列爲昭穆昭南向而穆北向雖已毀廟之主皆出而序于昭穆殷周之興太祖世遠而羣廟之主皆出其後故其禮易明漢魏以來其興也暴又其上世微故創國之君爲太祖而世近毀朝之主皆在太祖之上於是禘祫不得如古而漢魏之制太祖而上毀廟之主皆不合食唐興以景皇帝爲太祖而世近在三昭三穆之內至禘祫乃虛東向之位而太祖與羣廟列於昭穆代宗卽位祔玄宗肅宗而遷獻祖懿祖于夾室於是太祖居第一室禘祫得正其位而東向而獻懿不合食建中二年太學博士陳京請爲獻祖懿祖立別廟至禘祫則享禮儀使顏真卿議曰太祖景皇帝居百代不遷之尊而禘祫之時暫居昭穆屈己以奉祖宗可也乃引晉蔡謨議以獻祖居東向而懿祖太祖以下左右爲昭穆由是議者紛然貞元十七年太常卿裴郁議以太祖百代不遷獻懿二祖親盡廟遷而居東向非是請下百寮議工部郎中張薦等議與真卿同太子左庶子李嶸等七人曰真卿所用晉蔡謨之議也謨爲禹不先鯀之說雖有其言當時不用獻懿二祖宜藏夾室以合祭法遠廟爲

祧而壇墀有禱則祭無禱則止之義吏部郎中柳冕等十二人曰周禮有先公之祧遷祖藏於后稷之廟其周未受命之祧乎又有先王之祧其遷主藏於文武之廟其周已受命之祧乎今獻祖懿祖猶周先公也請築別廟以居之司勳員外郎裴樞曰建石室於寢園以藏神主至禘祫之歲則祭之考功員外郎陳京同官縣尉仲子陵皆曰遷神主於德門興聖廟京兆少尹韋武曰祫則獻祖東向禘則太祖東向十一年左司郎中陸淳曰議者多矣不過三而已一曰復太祖之正位二曰並列昭穆而虛東向三曰祫則獻祖禘則太祖迭居東向而復正太祖之位爲是然太祖復位則獻懿之主宜有所歸一曰藏諸夾室二曰置之別廟三曰遷于園寢四曰祔於興聖然而藏諸夾室則無饗獻之期置之別廟則非禮經之文遷于寢園則亂宗廟之儀唯祔于興聖爲是至十九年左僕射姚南仲等獻議五十七封付都省集議戶部尙書王紹等五十五人請遷懿祖祔興聖廟議遂定由是太祖始復東向之位若諸臣之享其親廟室服器之數視其品開元十二年著令一品二品四廟三品三廟五品二廟嫡士一廟

庶人祭于寢及定禮二品以上四廟三品三廟三品以上不須爵者亦四廟四廟有始封爲五廟四品五品有兼爵亦三廟六品以下達于庶人祭於寢天寶十載京官正員四品清望及四品五品清官聽立廟勿限兼爵雖品及而建廟未逮亦聽寢祭廟之制三品以上九架廈兩旁三廟者五間中爲三室左右廈一間前後虛之無重栱藻井室皆爲石室一於西墉二之一近南距地四尺容二主廟垣周之爲南門東門門屋三室而上間以廟增建神廚於廟東之少南齋院於東門之外少北制勿逾於廟三品以上有神主五品以上有几筵牲以少牢羊豕一六品以下特豚不以祖禰貴賤皆子孫之牲牲闕代以野獸五品以上室異牲六品以下共牲二品以上室以籩豆十三品以八四品五品以六五品以上室皆簋二簋二鉶二俎三尊二壘二勺二爵六盤一坩一筐一牙盤胙俎一祭服三品以上玄冕五品以上爵弁六品以下進賢冠各以其服凡祔皆給休五日時享皆四日散齋二日於正寢致齋一日於廟子孫陪者齋一宿於家始廟則署主而祔後喪闋乃祔喪二十八月上旬卜而祔始神事之

矣王公之主載以輅夫人之主以翟車其餘皆以輿天子以四孟臘享太廟諸臣避之祭仲而不臘三歲一禘五歲一禘若祔若常享若禘禘卜日齋戒省牲視滌濯鼎鑊亨牲實饌三獻飲福受胙進退之數大抵如宗廟之祀以國官亞終獻無則以親賓以子弟其後不卜日而筮用亥祭寢者春秋以分冬夏以至日若祭春分則廢元日然元正歲之始冬至陽之復二節最重祭不欲數乃廢春分通爲四祠器以烏漆差小常制祭服以進賢冠主婦花釵禮衣後或改衣冠從公服無則常服凡祭之在廟在寢旣畢皆親賓子孫慰主人以常服見若宗子有故庶子攝祭則祝曰孝子某使介子某執其常事通祭三代而宗子卑則以上牲祭宗子家祝曰孝子某爲其介子某薦其常事庶子官尊而立廟其主祭則以支庶封官依大宗主祭兄陪於位以廟由弟立己不得延神也或兄弟分官則各祭考妣於正寢古殤及無後皆祔食於祖無祝而不拜設坐祖左而西向亞獻者奠祝乃奠之一獻而止其後廟制設幄當中南向祔坐無所施皆祭室戶外之東而西向親伯叔之無後者祔曾祖親昆弟及從父昆弟祔於

祖親子姪祔於禰寢祭之位西上祖東向而昭穆南北則伯叔之祔者居禰下之穆位北向昆弟從父昆弟居祖下之昭位南向子姪居伯叔之下穆位北向以序尊卑凡殤無後以周親及大功爲斷古者廟於大門內秦出寢於陵側故王公亦建廟於墓既廟與居異則宮中有喪而祭三年之喪齊衰大功皆廢祭外喪齊衰以下行之

唐書卷十三

卷之十三

大興縣志以平字

王公衣製... 宮中... 登三... 之... 大... 督...

以... 年... 日... 縣... 及... 大... 為... 古... 香... 廊... 故... 大... 門... 內... 奉... 出... 縣... 故... 刻... 碑... 誌...

文... 於... 山... 南... 向... 午... 鐘... 聲... 所... 於... 之... 不... 縣... 山... 南...

不... 於... 山... 南... 向... 午... 鐘... 聲... 所... 於... 之... 不... 縣... 山... 南...

唐書卷十四

宋

翰

學

士

歐

陽

修

撰

禮樂志第四

其非常祀天子有時而行之者曰封禪巡守視學耕藉拜陵文中子曰封禪非古也其秦漢之侈心乎蓋其曠世不常行而於禮無所本故自漢以來儒生學官論議不同而至於不能決則出於時君率意而行之爾隋文帝嘗令牛弘辛彥之等撰定儀註爲壇泰山山下設祭如南郊而已未嘗升山也唐太宗已平突厥而年穀屢豐羣臣請封泰山太宗初頗非之已而遣中書侍郎杜正倫行太山上七十二君壇迹以是歲兩河大水而止其後羣臣言封禪者多乃命祕書少監顏師古諫議大夫朱子奢等集當時名儒博士雜議不能決於是左僕射房玄齡特進魏徵中書令楊師道博採衆議奏上之其議曰爲壇於泰山下祀昊天上帝壇之廣十二丈高丈二尺玉牒長一尺三寸廣厚五寸玉檢如之厚減三寸其印齒如璽纏以金繩五周玉策四皆長一尺三寸廣寸五分厚五分

唐

書

卷十四

禮樂志

一

中華書局聚

每策皆五簡聯以金昊天上帝配以太祖皇地祇配以高祖已祀而歸格于廟
威以金匱匱高六寸廣足容之制如表函纏以金繩封以金泥印以受命之璽
而玉牒藏于山上以方石三枚爲再累纏以金繩封以石泥印以受命之璽其
山上之圓壇土以五色高九尺廣五丈四面爲一階天子升自南階而封玉牒
已封而加以土築爲封高一丈二尺廣二丈其禪社首亦如之其石檢封以受
命璽而玉檢別製璽方一寸二分文如受命璽以石距非經不用又爲告至壇
方八十一尺高三尺四出陛以燔柴告至望秩羣神遂著于禮其他降禪朝覲
皆不著至十五年將東幸行至洛陽而彗星見乃止高宗乾封元年封泰山爲
圓壇山南四里如圓丘三壇壇上飾以青四方如其色號封祀壇玉策三以玉
爲簡長一尺二寸廣一寸二分厚三分刻而金文玉匱一長一尺三寸以藏上
帝之冊金匱二以藏配帝之冊纏以金繩五周金泥玉璽璽方一寸二分文如
受命璽石礎以方石再累皆方五尺厚一尺刻方其中以容玉匱礎旁施檢刻
深三寸三分闊一尺當繩刻深三分闊一寸五分石檢十枚以檢石礎皆長三

尺闊一尺厚七分印齒三道皆深四寸當璽方五寸當繩闊一寸五分檢立於
礮旁南方北方皆三東方西方皆二去礮隅皆一尺礮纏以金繩五周封以石
泥距石十二分距礮隅皆再累皆闊二尺長一丈斜刻其首令與礮隅相應又
爲壇於山上廣五丈高九尺四出陛一壝號登封壇玉牒玉檢石礮石距玉匱
石檢皆如之爲降禪壇於社首山上入隅一成八陛如方丘三壝上飾以黃四
方如其色其餘皆如登封其議略定而天子詔曰古今之制文質不同今封禪
以玉牒金繩而瓦尊匏爵結席宜改從文於是昊天上帝禱以蒼地祇禱以黃
配禱皆以紫而尊爵亦更焉是歲正月天子祀昊天上上帝于山下之封祀壇以
高祖太宗配如圓丘之禮親封玉冊置石礮聚五色土封之徑一丈二尺高尺
已事升山明日又封玉冊于登封壇又明日祀皇地祇于社首山之降禪壇如
方丘之禮以太穆皇后文德皇后配而以皇后武氏爲亞獻越國太妃燕氏爲
終獻率六宮以登其帷帟皆錦繡羣臣瞻望多竊笑之又明日御朝覲壇以朝
羣臣如元日之禮乃詔立登封降禪朝覲之碑名封祀壇曰舞鶴臺登封壇曰

萬歲臺降禪壇曰景雲臺以紀瑞焉其後將封嵩嶽以吐蕃突厥寇邊而止永淳元年又作奉天宮於嵩山南遂幸焉將以明年十一月封禪詔諸儒國子司業李行偉考功員外郎賈大隱等草具其儀已而遇疾不克封至武后遂登封焉玄宗開元十二年四方治定歲屢豐稔羣臣多言封禪中書令張說又固請乃下制以十三年有事泰山於是說與右散騎常侍徐堅太常少卿韋紹祕書少監康子元國子博士侯行果刊定儀注立圓臺於山上廣五丈高九尺上色各依其方又於圓臺上起方壇廣一丈二尺高九尺其壇臺四面爲一階又積柴爲燎壇於圓臺之東南量地之宜柴高一丈二尺方一丈開上南出戶六尺又爲圓壇於山下三成十二階如圓丘之制又積柴於壇南爲燎壇如山上又爲玉冊玉匱石臧皆如高宗之制玄宗初以謂升中於崇山精享也不可諠譁欲使亞獻以下皆行禮山下壇召禮官講議學士賀知章等言昊天上帝君也五方精帝臣也陛下享君於上羣臣祀臣於下可謂變禮之中然禮成於三亞終之獻不可異也於是三獻皆升山而五方帝及諸神皆祭山下壇玄宗問前

世何爲祕玉牒知章曰玉牒以通意於天前代或祈長年希神仙旨尙微密故外莫知帝曰朕今爲民祈福無一祕請卽出玉牒以示百寮乃祀昊天上帝於山上壇以高祖配祀五帝以下諸神於山下其祀禮皆如圓丘而卜日告天及廟社大駕所經及告至閏百年朝覲皆如巡狩之禮其登山也爲大次於中道止休三刻而後升其已祭燔燎侍中前跪稱具官臣某言請封玉冊皇帝升自南陛北向立太尉進昊天上帝神座前跪取玉冊置於案以進皇帝受玉冊跪內之玉匱纏以金繩封以金泥侍中取受命寶跪以進皇帝取寶以印玉匱侍中受寶以授符寶郎太尉進皇帝跪捧玉匱授太尉太尉退復立太常卿前奏請再拜皇帝再拜退入于次太尉奉玉匱之案於石臧南北向立執事者發石蓋太尉奉玉匱跪藏於石臧內執事者覆石蓋檢以石檢纏以金繩封以石泥以玉寶編印引降復位帥執事者以石距封固又以五色土圜封其配座玉牒封於金匱皆如封玉匱太尉奉金匱從降俱復位以金匱內太廟藏於高祖神堯皇帝之石室其禪于社首皆如方丘之禮天子將巡狩告於其方之州曰皇

帝以某月于某巡狩各脩乃守考乃職事敢不敬戒國有常刑將發告于圓丘
前一日皇帝齋如郊祀告昊天上帝又告于太廟社稷具大駕鹵簿所過州縣
刺史令候於境通事舍人承制問高年祭古帝王名臣烈士既至刺史令皆先
奉見將作築告至圓壇於嶽下四出陛設昊天上帝配帝位天子至執事皆齋
一日明日望於嶽鎮海瀆山川林澤丘陵墳衍原隰所司爲壇設祭官次於東
壙門外道南北向設饌幔內壙東門外道北南向設宮縣登歌爲瘞瘞祭官執
事皆齋一日嶽鎮海瀆山川林澤丘陵墳衍原隰之尊在壇上南陛之東北向
設玉筐及洗設神坐壇上北方獻官奠玉幣及爵於嶽神祝史助奠鎮海以下
明日乃肆覲將作於行宮南爲壇三分壙間之二在南爲壇於北廣九丈六尺
高九尺四出陛設宮縣壇南御坐壇上之北解劍席南陛之西文武官次門外
東西刺史令次文官南蕃客次武官南列輦路壇南文官九品位壇東南武官
西南相向刺史令位壇南三分庭一蕃客位於西又設門外位建牙旗於壙外
黃麾大仗屯門鉞戟陳壙中吏部主客戶部贊羣官客使就門外位刺史令贊

其土之寶錦綺繒布葛越皆五兩爲束錦以黃帊常貢之物皆筐其屬執列令後文武九品先入就位皇帝乘輿入北壝門繇北陞升壇卽坐南向刺史蕃客皆入壝門至位再拜奠贄與執贄侍中降于刺史東北皆拜宣已又拜蕃客以舍人稱制如之戶部導貢物入刺史前龜首之金次之丹漆絲纒四海九州之美物重行陳執者退就東西文武前側立通事舍人導刺史一人解劍脫舄執贄升前北向跪奏官封臣姓名等敢獻壤奠遂奠贄舍人跪舉以東授所司刺史劍舄復位初刺史升奠贄在庭者以次奠於位前皆再拜戶部尙書壇間北向跪請以貢物付所司侍中承制曰可所司受贄出東門中書侍郎以州鎮表方一案俟于西門外給事中以瑞案俟于東門外乃就侍臣位初刺史將入乃各引案分進東西陛下刺史將升中書令黃門侍郎降立旣升乃取表升尙書旣請受贄中書令乃前跪讀黃門侍郎給事中進跪奏瑞侍郎給事中導案退文武刺史國客皆再拜北向位者出就門外位皇帝降北陞以入東西位者出設會如正至刺史蕃客入門皆奏樂如上公會之明日考制度太常卿採詩陳

之以觀風俗命市納賈以觀民之好惡典禮者考時定日同律禮樂制度衣服正之山川神祇有不舉爲不恭宗廟有不慎爲不孝皆黜爵革制度衣服者爲叛有討有功德於百姓者爵賞之皇帝視學設大次于學堂後皇太子次于大次東設御座堂上講榻北向皇太子座御座東南西向文臣三品以上坐太子南少退武臣三品以上於講榻西南執讀座於前楹北向侍講座執讀者西北武官之前論義座於講榻前北向執如意立於侍講之東北向三館學官座武官後設堂下版位脫履席西階下皇太子位於東階東南執經於西階西南文武三品以上分位於南執如意者一人在執經者後學生位于文武後其日皇帝乘馬祭酒帥監官學生迎于道左皇帝入次執經侍講執如意者與文武學生皆就位堂下皇太子立于學堂門外西向侍中奏外辦皇帝升北階卽坐皇太子乃入就位在位皆再拜侍中敕皇太子王公升皆再拜乃坐執讀執經釋義執如意者以授侍講秉詣論義坐問所疑退以如意授執者還坐乃皆降若賜會則侍中宣制皇帝返次羣官既會皇帝還監官學生辭於道左皇帝孟春

吉亥享先農遂以耕藉前享一日奉禮設御坐於壇東西向望瘞位於壇西南
北向從官位於內壝東門之內道南執事者居後奉禮位於樂縣東北贊者在
南又設御耕藉位於外壝南門之外十步所南向從耕三公諸王尚書卿位於
御坐東南重行西向以其推數爲列其三公諸王尚書卿等非耕者位於耕者
之東重行西向北上介公鄴公於御位西南東向北上尚舍設御耒席於三公
之北少西南向奉禮又設司農卿之位於南少退諸執耒耜者位於公卿耕者
之後非耕者之前西向

御耒耜一具三公耒耜三具諸王尚書卿各三人
合耒耜九具以下耒耜太常各令藉田農人執之皇帝

已享乃以耕根車載耒耜於御者間皇帝乘車自行宮降大次乘黃令以耒耜
授廩犧令橫執之左耜實於席遂守之皇帝將望瘞謁者引三公及從耕侍耕
者司農卿與執耒耜者皆就位皇帝出就耕位南向立廩犧令進耒席南北向
解韜出耒執以與少退北向立司農卿進受之以授侍中奉以進皇帝受之耕
三推侍中前受耒耜反之司農卿卿反之廩犧令令復耒於韜執以與復位皇
帝初耕執耒耜者皆以耒耜授侍耕者皇帝耕止三公諸王耕五推尚書卿九推

執耒者前受之皇帝還入自南門出內壝東門入大次享官從享者出太常卿帥其屬耕于千畝皇帝還宮明日班勞酒於太極殿如元會不賀不爲壽藉田之穀斂而鍾之神倉以擬粢盛及五齊三酒穰稟以食牲藉田稟先農唐初爲帝社亦曰藉田壇貞觀三年太宗將親耕給事中孔穎達議曰禮天子藉田南郊諸侯東郊晉武帝猶東南今帝社乃東壇未合於古太宗曰書稱平秩東作而青輅黛耜順春氣也吾方位少陽田宜于東郊乃耕于東郊垂拱中武后藉田壇曰先農壇神龍元年禮部尙書祝欽明議曰周頌載芟春藉田而祈社稷禮天子爲藉千畝諸侯百畝則緣田爲社曰王社侯社今日先農失王社之義宜正名爲帝社太常少卿韋叔夏博士張齊賢等議曰祭法王者立太社然後立王社所置之地則無傳也漢興已有官社未立官稷乃立于官社之後以夏禹配官社以后稷配官稷臣瓚曰高紀立漢社稷所謂太社也官社配以禹所謂王社也至光武乃不立官稷相承至今魏以官社爲帝社故摯虞謂魏氏故事立太社是也晉或廢或置皆無處所或曰二社並處而王社居西崔氏皇甫

氏皆曰王社在藉田按衛宏漢儀春始東耕於藉田引詩先農則神農也又五經要義曰壇於田以祀先農如社魏秦靜議風伯雨師靈星先農社稷爲國六神晉太始四年耕於東郊以太牢祀先農周隋舊儀及國朝先農皆祭神農于帝社配以后稷則王社先農不可一也今宜於藉田立帝社帝稷配以禹棄則先農帝社並祠叶於周之載芟之義欽明又議曰藉田之祭本王社古之祀先農句龍后稷也烈山之子亦謂之農而周棄繼之皆祀爲稷共工之子曰后土湯勝夏欲遷而不可故二神社稷主也黃帝以降不以義農列常祀豈社稷而祭神農乎社稷之祭不取神農耒耜大功而專於共工烈山蓋以三皇洪荒之迹無取爲教彼秦靜何人而知社稷先農爲二而藉田有二壇乎先農王社一也皆后稷句龍異名而分祭祀以四牢欽明又言漢祀禹謬也今欲正王社先農之號而未決乃更加二祀不可叔夏齊賢等乃奏言經無先農禮曰王自爲立社曰王社先儒以爲在藉田也永徽中猶曰藉田垂拱後乃爲先農然則先農與社一神今先農壇請改曰帝社壇以合古王社之義其祭準令以孟春吉

亥祠后土以句龍氏配於是爲帝社壇又立帝稷壇於西如太社太稷而壇不設方色以異於太社開元十九年停帝稷而祀神農氏於壇上以后稷配二十三年親祀神農於東郊配以句芒遂躬耕盡壠止肅宗乾元二年詔去耒耜雕刻命有司改造之天子出通化門釋輶而入壇遂祭神農氏以后稷配冕而朱紘躬九推焉憲宗元和五年詔以來歲正月藉田太常修撰韋公肅言藉田禮廢久矣有司無可考乃據禮經參采開元乾元故事爲先農壇於藉田皇帝夾侍二人正衣二人侍中一人奉耒耜中書令一人禮部尙書一人侍從司農卿一人授耒耜於侍中太僕卿一人執牛左右衛將軍各一人侍衛三公以宰相攝九卿以左右僕射尙書御史大夫攝三諸侯以正員一品官及嗣王攝推數一用古制禮儀使一人太常卿一人贊禮三公九卿諸侯執牛三十人用六品以下官皆服袴褶御耒耜二并鞞皆以青其制度取合農用不雕飾畢日收之籍耒耜丈席二先農壇高五尺廣五丈四出陛其色青三公九卿諸侯耒十有五御耒之牛四其二副也并牛衣每牛各一人絳衣介幘取閑農務者禮司以

人贊導之執耒持耜以高品中官二人不袴褶皇帝詣望耕位通事舍人分導文武就耕所太常帥其屬用庶人二十八以郊社令一人押之太常少卿一人率庶人趨耕所博士六人分贊耕禮司農少卿一人督視庶人終于晦廩犧令二人間一人奉耒耜授司農卿以五品六品清官攝一人掌耒耜太常寺用本官三公九卿諸侯耕牛四十其十副也牛各一人庶人耕牛四十各二牛一人庶人耒耜二十具鍤二具木爲刃主藉田縣令一人具朝服當耕時立田側畢乃退畿甸諸縣令先期集以常服陪耕所耆艾二十人陪於庶人耕位南三公從者各三人九卿諸侯從者各一人以助耕皆絳服介幘用其本司隸是時雖草具其儀如此以水旱用兵而止皇帝謁陵行宮距陵十里設坐於齋室設小次於陵所道西南大次於寢西南侍臣次於大次西南陪位者次又於西南皆東向文官於北武官於南朝集使又於其南皆相地之宜前行二日遣太尉告於廟皇帝至行宮卽齋室陵令以玉冊進署設御位於陵東南隅西向有岡麓之闕則隨地之宜又設位於寢宮之殿東陞之東南西向尊坵陳于堂戶東南

百官行從宗室客使位神道左右寢宮則分方序立大次前其日未明五刻陳黃麾大仗於陵寢三刻行事官及宗室親五等諸親三等以上并客使之當陪者就位皇帝素服乘馬華蓋繖扇侍臣騎從詣小次步出次至位再拜又再拜在位皆再拜又再拜少選太常卿請辭皇帝再拜又再拜奉禮曰奉辭在位者再拜皇帝還小次乘馬詣大次仗衛列立以俟行百官宗室諸親客使序立次前皇帝步至寢宮南門仗衛止乃入繇東序進殿陞東南位再拜升自東階北向再拜又再拜入省服玩杖拭帳簣進太牢之饌加珍羞皇帝出尊所酌酒入三奠爵北向立太祝二人持玉冊于戶外東向跪讀皇帝再拜又再拜乃出戶當前北向立太常卿請辭皇帝再拜出東門還大次宿行宮若太子諸王公主陪葬柏城者皆祭寢殿東廡功臣陪葬者祭東序爲位奠饌以有司行事或皇后從謁則設大次寢宮東先朝妃嬪次於大次南大長公主諸親命婦之次又於其南皆東向以行帷具障謁所內謁者設皇后位於寢宮東大次前少東先朝妃嬪位西南各於次東司贊位妃嬪東北皆東向皇帝既發行宮皇后乘四

望車之大次改服假髻白練單衣內典引導妃嬪以下就位皇后再拜陪者皆拜少選遂辭又拜陪者皆拜皇后還寢東大次陪者退皇后鈿釵禮衣乘輿詣寢宮先朝妃嬪大長公主以下從至北門降輿入大次詣寢殿前西階之西妃嬪公主位於西司贊位妃嬪東北皆東向皇后再拜在位者皆拜皇后繇西階入室詣先帝前再拜復詣先后前再拜進省先后服玩退西廂東向立進食皇帝出乃降西階位辭再拜妃嬪皆拜詣大次更衣皇帝過乃出寢宮北門乘車還天子不躬謁則以太常卿行陵所司撰日車府令具輅車一馬清道青衣團扇曲蓋繖列俟于太常寺門設次陵南百步道東西向右校令具雍器以備汎掃太常卿公服乘車奉禮郎以下從至次設卿位北門外之左陵官位卿東南執事又於其南皆西向奉禮郎位陵官之西贊引二人居南太常卿以下再拜在位皆拜謁者導卿贊引導衆官入奉行復位皆拜出乘車之宅陵有芟治則命之凡國陵之制皇祖以上至太祖陵皆朔望上食元日冬至寒食伏臘社各一祭皇考陵朔望及節祭而日進食又薦新於諸陵其物五十有六品始將進

御所司必先以送太常與尚食滋味薦之如宗廟貞觀十三年太宗謁獻陵帝至小次降輿納履入闕門西向再拜慟哭俯伏殆不能興禮畢改服入寢宮執饌以薦閱高祖及太穆后服御悲感左右步出司馬北門泥行二百步永徽二年有司言先帝時獻陵既三年惟朔望冬至夏伏臘清明社上食今昭陵喪期畢請上食如獻陵從之六年正月朔高宗謁昭陵行哭就位再拜擗踊畢易服謁寢宮入寢哭踴進東階西向拜號久乃薦太牢之饌加珍羞拜哭奠饌閱服御而後辭行哭出寢北門御小輦還顯慶五年詔歲春秋季一巡宜以三公行陵太常少卿貳之太常給鹵簿仍著於令始貞觀禮歲以春秋仲月巡陵至武后時乃以四季月生日忌日遣使詣陵起居景龍二年右臺侍御史唐紹上書曰禮不祭墓唐家之制春秋仲月以使具鹵簿衣冠巡陵天授之後乃有起居遂爲故事夫起居者參候動止事生之道非陵寢法請停四季及生日忌日節日起居準式二時巡陵手敕曰乾陵歲冬至寒食以外使二忌以內使朝奉宅陵如紹奏至是又獻昭乾陵皆日祭太常博士彭景直上疏曰禮無日祭陵惟

宗廟月有祭故王者設廟祧壇墀爲親疎多少之數立七廟一壇一墀曰考廟
曰王考廟曰皇考廟曰顯考廟皆月祭之遠廟爲祧享嘗乃止去祧爲壇去壇
爲墀有禱焉祭之無禱乃止又譙周祭志天子始祖高祖曾祖祖考之廟皆月
朔加薦以象平生朔食謂之月祭二祧之廟無月祭則古皆無日祭者今諸陵
朔望食則近於古之殷事諸節日食近於古之薦新鄭注禮記殷事月朔半薦
新之奠也又既大祥卽四時焉此其祭皆在廟近代始以朔望諸節祭陵寢唯
四時及臘五享廟考經據禮固無日祭於陵唯漢七廟議京師自高祖下至宣
帝與太上皇悼皇考陵旁立廟園各有寢便殿故日祭於寢月祭於便殿元帝
時貢禹以禮節煩數願罷郡國廟丞相韋玄成等又議七廟外寢園皆無復議
者亦以祭不欲數宜復古四時祭於廟後劉歆引春秋傳日祭月祀時享歲貢
祖禰則日祭曾高則月祀二祧則時享壇墀則歲貢後漢陵寢之祭無傳焉魏
晉以降皆不祭墓國家諸陵日祭請停如禮疏奏天子以語侍臣曰禮官言諸
陵不當日進食夫禮以人情沿革何專古爲乾陵宜朝晡進奠如故昭獻二陵

日一進或所司苦於費可減朕常膳爲之開元十五年敕宣皇帝光皇帝陵以縣令檢校州長官歲一巡又敕歲春秋巡陵公卿具仗出城至陵十里復十七年玄宗謁橋陵至壩垣西闕下馬望陵涕泗行及神午門號慟再拜且以三府兵馬供衛遂謁定陵獻陵昭陵乾陵乃還二十三年詔獻昭乾定橋五陵朔望上食歲冬至寒食各日設一祭若節與朔望忌日合卽準節祭料橋陵日進半羊食二十七年敕公卿巡陵乘輅其令太僕寺陵給輅二乘及仗明年制以宣皇帝光皇帝景皇帝元皇帝追尊號諡有制而陵寢所奉未稱建初啓運陵如興寧永康陵置署官陵戶春秋仲月分命公卿巡謁二十年詔建初啓運興寧永康陵歲四時八節所司與陵署具食進天寶二年始以九月朔薦衣於諸陵又常以寒食薦錫粥雞毬雷車五月五日薦衣扇陵司舊曰署十三載改獻昭乾定橋五陵署爲臺官爲臺令陞舊一階是後諸陵署皆稱臺大曆十四年禮儀使顏真卿奏今元陵請朔望節祭日薦如故事秦陵惟朔望歲冬至寒食伏臘社一祭而罷日食制曰可貞元四年國子祭酒包佶言歲二月八月公卿朝

拜諸陵臺所由導至陵下禮略無以盡恭於是太常約舊禮草定曰所司先撰吉日公卿輅車鹵簿就太常寺發抵陵南道東設次西向北上公卿既至次奉禮郎設位北門外之左陵官位其東南執事官又於其南謁者導公卿典引導衆官就位皆拜公卿衆官以次奉行拜而還故事朝陵公卿發天子視事不廢十六年拜陵官發會董晉卒廢朝是後公卿發乃因之不視事元和元年禮儀使杜黃裳請如故事豐陵日祭崇陵唯祭朔望節日伏臘二年宰臣建言禮有著定後世徇一時之慕過於煩并故陵廟有薦新而節有遣使請歲太廟以時享朔望上食諸陵以朔望奠親陵以朝晡奠其餘享及忌日告陵皆停

唐書卷十四

日一庭或所同者於愛可微厥家應備之謂元十五年故定其會...

臨公於州長官... 又較或會... 使...

德寧亦十四... 下... 再...

兵... 二十三...

正... 日...

德... 又... 又...

亦... 又... 而...

德... 日... 日...

德... 又... 不...

德... 又... 不...

德... 又... 不...

德... 又... 不...

德... 又... 不...

德... 又... 不...

德... 又... 不...

唐書卷十四考證

禮樂志四關二尺長一丈○此句下通典有厚一尺三字

唐書卷十四考證